


NKONKO NÈ MANDAMUNA

PA EBÈLÙ CITUPÀ I

 Mmunyi mùdiyekù mufwànyine kucyènza kabùyi bwà Nzambi? Aci's ncifwànyine kwikala cyà cilelèlà, kí mmwômò anyi? Kí ncifwànyine kwenjiibwa kabùyi bwà Mukalenge nànsha.

Ncyàkuyiisha pa byònsò abi to. Kàdi mvwa mwelè meeji ne mvwakù mufwànyine kutwà cyanza pa cintu kampàndà cyà bujitu, nudi bamanyè's, pa nàнку mbimpè ngiikalè mudilongolòle. Kàdi, kaa, cìvwa cipeepèle, pèèpèlèè. Pa nàнку pàmwàpa kakwèna nkonko yàbùngi menemene munkaci mwà bantu díbà adi to, bìdi ànu bipeepèle menemene ne nkonko mipeepèle. Èè, ndi ne disànkà dyà kuteeta kuyàndamunakù ne mwànyì pàànyì mwònsò, ku dikwàcisha dyà Mukalenge.

² Nèнку Mwanèètù wa bakàji Arganbright yèyèpu dílòòlò edi... Mwanèètù wa bakàji Ruth. Udi pù anyì Mwanèètù wa bakàji Ruth? Lwà apa nùnkù. Ndi ne... Kaa, èyowà, ndi ne mwaba wùdiye musòmbèle kaaba aka, ne... To, ncyèna naawù to. Èè, ndi mwà kuwùpetela ne lùkàsà lwònsò kaaba aka. Mvwa naawù mu mpùntùmùnyì wanyì, kàdi ndi mushiye mpùtùmùnyì wanyì awu kumbèlu. Mpindyewu, mpùlushì yèyè kumwàte mu dyalukila dyà kwànyì kumbèlu, Mwanèètù Fleeman, wàlwakù bwà kungaakwila. Wàmбилè Billy ne ndi... ndi mushiye mpùtùmùnyì wanyì kumbèlu, ndi ngendesha kàshinyì ncìyi ne mukàndà wà bwendeshi dílòòlò edi to. Pàànyì's mvwa ngeela meeji ne mvwa nendè mu mpaayà mwanyì emu; ndi mushintùlùle ànu bilàmbà cyanàà'nà's. Mvwa mubwelè lubilu, mu mapingaja emu, mvwa nkòsa mashìndè lùkàsàlùkàsà ne kukèngelabi bwà mèmè kuumuka ne kulwijakaja bwà kubwela, kushintulula bilàmbà ne kwasa lubilu mutàngile kaaba aka. Nèнку ndi—ndi mulwe ne nkòngamyakù, kàdi nudi mwà kumupeta ànu paanyimà pàà bamanè kupàtuka mwòmò amu.

³ Kanùdyùmvù bibi bwà mukàndà mumfùndila awu to. Byòbì ne kacya ncitukù mwanji kupeta mubi kutàmba wòwò awu to, awu mmufwànyine kwikala mukàndà mwìmpè. Awu wùvwa mwìmpè. Awu wùvwa mulenga, mulenga wà dikèma. Mvwa munwàmбилè ne ncìvwa mwà kuwùbala to, kàdi ndi mukawùtwe cyanza, nudi bamanyè's, ncìyikù ànu mufwànyine kukwata kàbìdì mwoyi to. Mvwa ànu ndikonka cyùvwa wamba's. Kàdi wùvwa mulenga be, be, mufunde menemene ànu mùvwàbì bìkèngela bwà mulongeshi wa kàlaasà kufundayè. Wùvwa mwìmpè, ne mèmè ndi muwànyishe. Ne cidi—cidi cikupèèsha...

⁴ Nudi numòna's, mèmè ntu munangè mikàndà mimfùndila kùdi muntu kampànda udi mufwànyine—mufwànyine kubènganganakù neebè ndambù. Nwamònu's, wèwè wenda ànu uya dîbà dyònsò, muntu nànsha umwe kàyi ubènganganakù neebè to, s'udi ushààla musaapùke. Bikèngela ùpetèku tuntu ndambù twà bàbèngangana neebè bwà wamònakù mwà kuumvwa ne kumbula mu ndòndò. Ne—ne udi ukabwela ànu mu biibidilu ànu bìmwèbìmwè abi wèwè kùyi mutàngile bìmpè; dîbà adi udi—dîbà adi udi upeta lutàtù paùdi wenza nàнку awu. Bikèngelakù ànu utùngunuka ne kuya kàdi kupetakù muntu kampànda wa ùbèngangana neebè ne ùkubìndululakù ku musangu ne ku musangu.

⁵ Mu Àfrikè mwàmwa mvwa musangàne tuntambwe túbìdi tukesè, ne tùvwa twà tukesè menemene, twipacila bunène *ebu*. Kantambwe kàà makejimizeji, kakesè, kakesè menemene; kantambwe kalùme kakesè, kantambwe kakàji kakesè. Nènku mpindyewu, tùvwa tùmweka bu twànà twà mpuusu, tùvwa tukesè be mùshindù awu, tukesè...tuntu tukesè tutàmbe bulenga mu mùshindù wà ne, tùvwa ànu tùnàya cyanààna. Ne mèmè mvwa muswè kwalukila naatù mu Àmèrikè, mvwa mutwélè mu nsànji wa tunyuunyi. Mvwa muswè kwalukila naatù, kàdi ncivwa mwà kupeta cintu nànsha cimwè—nànsha cimwè bwà kutúsàla to, bwanga kampànda. Ne kabàvwakù bafwànyine kungaanyishila bwà mèmè kulwa naatù mu États-Unis katùyi dyàmbedi twanji kutwibwa cisàlù to, pàànyi ncìyikù mwà kucipeta mu Àfrikè mujimà amu to. Kàdi bu wèwè muswè kumanya ne kàvwa nkànà kàà ntambwe anyi kî nkòkò, kàtuute ànu tuumapì ndambù cyanààna. Kàvwa kafwànyine kujuukila kuulu bwà mvità bwà kukuleeja ne nkànà kàà ntambwe, bwà—bwà mu mùshindù awu kàkuleeja mwaba wùvwàku kiimànyine.

⁶ Ki mùdìbi bikèngelà wèwè kwenza ku musangu ne ku musangu, udi mumanyè's, kubìndulula, bwà kujandulakù. Kàdi, mpindyewu, katwèna tufiika munda bu kànà kàà ntambwe to; tudi ànu—tudi ànu tunanga aci cyanààna, bwà...bwà bantu kwelabò nkonko. Ne nkonko yà mùshindù awu ayi, Mwanèètu wa bakàji Ruth, mmìmpè be, bwànyi mèmè. Yìdi...Ntu—ntu munangè nàнку, wamònu's. Yà mùshindù wà lwonji ayi nyìdi yìngenza bibì. Kadi ayi yìdi...alu lùvwa lulenga.

⁷ Mpindyewu tudi ne ndambu wa nkonko mîmpè, yà yìsàngulujangana, miikàle ànu ya kwètù kumbèlu. Kùdi muiyishi paanyimà pààpa mu cibambalu cyà paanyimà cyàcyà mpindyewu mene, uvwa munkonkè, wàmba ne: “Bapròfeta bàbìdì bàà mu Bwàkabuulwibwà 11 abu, mbafwànyine kulwa kumpàlà kwà Dyambwibwa anyi? Anyi pabwìpì menemene ne kuumusha kwà Izàlèlèlè mu cyalu? Ne ncinyì...” Mpindyewu, nkonko yà mùshindù awu nyìdi—nyìdi—nyìdi yìkutàcisha mu meeji. Kàdi nkonko mipèpèlè yà mùshindù ewu yòyi kayèna ne bwalu to.

Kàdi mpindyewu, kumpàlà kwà twètù kubanga, twinyikàayi mitù yètù bwà disambila.

⁸ Taatù, mbimanya ne paÛvwà ne bidimu dikùmi ne bìbìdì, bààkaKusangana mu Ntempèlù ne bafùndi ne beena meeji, uyiikilangana naabò pa Mifùndu. Ne bóbò—bóbò bàakakèma bikolè bwà... bantu bàà kale, ne balongeshiibwe bimpè mu Mifùndu, kàdi bàmona Mwàna wa balùme mukèsè wa bidimu bitwè ku dikùmi ne bìbìdì mufwànyine ànu—ànu kubwejakajangana lungènyi, mu dyumvwija dyà Mifùndu. Wèwè uvwa mudifile ku maalù a Taatù Webè. Wákambila mamw'Èbè ne: “Kwèna mumanyè ne Ndi ne cyà kwikala mudifile ku maalù a Taatù Wanyì anyì?” bwà kuumvwija Mifùndu ne dyumvwija dyàyì dyà mu nyumà.

⁹ Nènku mpindyewu nyewù tulòmba, Mukalenge, ne—ne bu mùdì Wèwè mumanyè mutùdi ne mateketa ne bapuuyile, ne mutùdi twenza bilèma, bwà Ùlwekù ànu neetù dilòlòlò edi mu mmwènekèlu wa Nyumà Mwímpè, ne utùmvwijèku Mifùndu. Ndi mèmè mwindile ne muKweyèmène Wèwè. Ne byòbì bifwànyine kwenzeka ne, pa dîbà kanà dyònsò, mèmè nteetè kwela meeji àànyì sungasunga anyì dyumvwija anyì cintu kampàndà cyà budisu, bwà kuteeta kucifikisha ku dimwèka ne mùshindù wùndi mèmè nyumvwija awu ngùdi mufwànyine kwikala wà cyà bushùwà, ùmbwikidijeku mukana, Mukalenge, mÛdì mufwànyine... muWàkabwikidijà nyama yà ntambwe, pààkalwilayì Danyèlè apu amu. Wèwè ucìdi ànu Nzambi umwèumwè awu.

¹⁰ Nènku biikalèku byònsò... Bu mutùdi beeyèmène Nyumà Mwímpè, swàku bwà Yèyè àtùbuulwilè ànu bintu ebi cyanààna. Ne dîbà adi pàdiYe ùbyàmba apu, bivwijèku bitòòke tòò mu mùshindù wà ne ewu udi mwelè lukonko awu àpetè mwà kuCyàkidila. Ne cyòci cyandàmùne bibèngàngàne ne cìntù mèmè misangu yònsò mwitàbùùje, dîbà adi mwoyi wànyì wùsankè pààwù, Mukalenge, bwà kumanya ne ngààpeci cintu kampàndà cyà cipyacìpyà, ne mùshindù kampàndà mwímpè wà Mukalenge. Bwalu Wèwè wákamba ne: “Kenkètaayi Mifùndu, bwalu mu Yòyì nudi nwela meeji ne nudi ne Mwoyi wà Cyendèlèlèlè, kàdi pààbì Yòyì ayi n'Yidì yìMfidilà bujaadiki.”

¹¹ Mpindyewu, paanyimà pàà dilongesha dyà Mifùndu edi, ndifwànyine cyà bushùwà kujuula meeji àbùngì ne bikwàbò. Nènku ndi ndòmba, Nzambi, mpindyewu udi nkonko yònsò eyi mimwèke bu ne mmyela ne kalolo ne musàngèelu wònsò ewu, swàku bwà Nyumà Mwímpè ayàndàmùnè ne musàngèelu ne kalolo kònsò. Bwalu tudì tulòmba nùnkù mu Dìnà dyà Yesù, ne bwà butùmbi bwà Nzambi, ne bwà diibaka dyà Èkèlezziyà Wendè. Amen.

¹² Kùdi misangu yàbùngì kùkaadi túbìngilà twà citù twà nì ncinyì cyònsò, twikale ànu tùnyangakaja bulenga bwàcì bwinè.

Nènku mpindyewu, nkonko mmyediibwe pa Mufundu ewu.

¹³ Mpindyewu, mèmè ngaakula byèla kashibà dilòòlò edi, ndi ne dínù ditùùla. Kàdi pândi ndyàluja, ncyènà mpeta mwà kuyiisha to, ndi nteksha lubilu pândi nyiisha; pândi ndyùmusha, ndi bu udi wela kashibà.

¹⁴ Mândàmù Billy Graham ùvwa ùlonda bwalu bwa bàyendè ne, musangu wùkaadiyekù mumumòne mutàmbe kubìnduluka, wùvwa, mpàvwàye ne dínù dyumusha lwà kumpàla eku. Kàdi kudijimijayè, pèndè ne ndongamu wa ku télévìsion ànu piinè apu, nènku—nènku kàyi mufwányine. . . Dìvwa pa dilòngù pàmwè ne mènù makwàbò a ku binyànyàngà mateekapù. Nènku pàdiye ùbanga kwakula, ùvwa wèla tushibà ne “hwi, hwi” wèlela pa dínù adi. Nènku mukàjì awu ùvwa ùlonda ne bàyendè ùvwa mutwè binù, ùsambila ne ùkòpakana, tusunsa dikùmi kumpàlà kwà tudyòmbà twà ku télévìsion atu, ne ndekeelu wa byònsò kusanganabò mwaba wùvwàdi dimacile mu cibelu cyà mùpanù wèndè diya mu mwánankàsà wa bisàbaatà byèndè. Umwe wa ku beena mudimu bàà ku cilààla-beenyi nguvwa mudyàngùle, dínù dyà cyamù adi. Ki Mândàmù Graham kulondayè bwalu abu bwà bàyendè, ciinè aci ng’apa’s. Kàdi mèmè ndi naadi mu kapesè kakesè kàà dibèji, ngeela meeji ne ndi naakù mu Bible wanyi ewu emu.

¹⁵ Nènku cìdi bu. . . patùdi tukùlakaja ndambù ne tulwa bakòòke, nudi bamanyè’s, ne bikèngela bwà twètù kujìmija ôwò aa, s’bidi byènza bibi. Nènku ewu ndi. . . pàmvwà mupàtùke ne Mwanèètù Roberson udi paanyimà pààpa wàwa, ne bakwàbò, mvwa ndisukula ne bùloosù mu dindà kampànda kàdi kudyàpula kapesè, ne kukèngelabi bwà nye naadi kùdi ngàngàbukà, bwà kudyàkajayè. Nènku Nzambi àsakidilèku mabènesha Endè.

¹⁶ Mpindyewu netwìkalè, mpindyewu, nênteetè bwà kujikija lwònsò lwà ku yôyi, mèmè ne mùshindù. Nènku, Mwanèètù Tony, ku ngàsà wa Nzambi, ndi mupetè dyumvwija dyà cilòòtà cyèbè, ne cìvwa cìmpè be. Ndi ne disànkà dyàbùngi dyà kumòna cyòci aci. Ne ndyumvwija dìmpè, mu mùshindù wà ne ndi ngeela meeji ne kabìvwa bikèngela kucyàmba bantu bònsò batèèleje kaaba aka to, pa nànkù nènkupèèshèci pàà nkààyeetù bu wèwè—bu wèwè kùyi mwà. . . wèwè muswè bwà kwikalaci mùshindù awu. Yéyè ùvwa munkonkè dilòòlò adi, ùvwa ne cilòòtà, kàdi ncìvwa mwà kumwambila cìvwàci menemene to pàmvwà nciyi muyè kùdi Mukalenge ne mucìsambidile. Pashiishe Mukalenge kucìmbuulwila Yè ne kungambile Yè cìvwà dyumvwija. Mbilenga be, ne mmukenji mulenga bwèbè wèwè, Mwanèètù Tony.

¹⁷ Mpindyewu, mu lukonko lwà kumpàla. Mpindyewu, ncyènà ànu mumanyè pàà kwanji kubangila to, bwalu yònsò mmìmpè. Kàdi, mpindyewu, tudi tuteeta bwà kubènga kwangata

mukùngùlù mupitèpìte bule, kàdi pàmwápa tudi mwà kuyìjikija mu dyàlumingu, twètù katùyi bayìjikije.

51. Umvwìjàku cidi “dinyooka dyà kashidi” dyùmvwija, mu Maatàayi 25.46. “Kàdi . . .” Ki lukonko ndwòlò alu.

52. Pashiishe, lukonko lwibìdi : “**Kàdi bânà bàà bukalenge nebèèdiibwè mu mìdimà ya pambèlu,**” aci cidi bu mwomùmwè ne kubèèla pambèlù pàà meeji a Nzambì anyi?

¹⁸ Èè, mpindyewu, angàtà lukonko lwèbè lwà kumpàla alu, lùdi lùsanganyibwà mu Maatàayi Munsàntu, nshapità wa makùmi abìdi ne . . . wa 25 awu alu. Mpindyewu netwìkalè . . . Mpindyewu, ncyènàku mulongè yòyi eyi to, ndi mutàpeku ànu dísù cyanàànà paanyimà pààpa, ne muteetè ànu ne mwànyi mwònsò bwà kuyitàngila mwònsò mùmvwàku pàanyi—mùmvwàku pàanyi mumanyè amu. Ne wànyi . . . Buulùlaayikù pàmwè naanyi mu Bibles yènù amu, patùdi tuCìlonga apa. Mpindyewu, mvwa muswè kupàtwila cyòci eci mu nkòngamyakù wa cyena-Ngelikà kabìdi, bwà nùpetèku cyà—cyà ku cibangidilu cyà cyòci aci. Ne mèmè ntu—ntu munangè nàнку awu. Pa nàнку dìbà adi netùCìpetèle ne mu—ne mu—mu cyena-Ngelikà ne mu cikwàbò. Ne mpindyewu eci necìikalè—necìikalè ne lujòòkò ndambù, ne kulonga, bwalu bidì bikèngela bwà mèmè kwolola cyanza kukwàta Mifùndu ànu mwaba wùndi mwà kuyipetela awu, ne kuyitèeka mu kaaba kàayi. Èyo.

¹⁹ Mpindyewu, kùdi muntu ùkeba Bible wa kulonga nendè anyi? Wèwè nendè dijinga, ela cyanza muulu. Nènku tudi . . . Ngeela meeji ne tudi naayi yisàtù anyi yinaayi kaaba aka. Wèwè muswè kulongela ku Mifùndu, èyo. Mwanèètu Cox, udikù mwà kulwa kaaba aka bwà kumpeteshakù Bibles eyi anyi? Ne bidì—bidì bimpè bwèbè wèwè, bu wèwè mwà kucyènza, bwà . . . (umwèpelè nyèyè awu, nènku yàngàte ànu—ànu cyanààna wèwè muswè, bungi abu). Nènku kwòkò muntu muswè umwe, lamà ànu cyanza cyèbè aci muulu, nsongàalumè awu neàkutwàdìlèye buludì, wamònu’s. Nènku tudi baswè kulonga eyi pàmwè, ne ànu . . .

²⁰ Mpindyewu, pa kubala eku ne nshapità yà ndekeelu eyi . . . nshapità mwandamutekètè yà kumpàla yà Mukàndà wa Ebèlù. Paanyimà pàà dilongesha, mu bushùwà bwà bwalu, nsongàalumè udi mubifunde ewu, byena-bwalu ebi, Mwanèètu Mercier ne Mwanèètu Goad, bàdi naabi ne bàdi mpindyewu munkaci mwà kubìlongolola bwà kubipàtula bu mukàndà. Nènku bòbò bàdi naabi. Mpindyewu . . . ne katwèna ne cintu nànsha cìmwè citùdiku basaasulùle bafikè pankaci to, tudi bakoonyè ànu pamutùpamutù. Ne ndi ngeela meeji ne mbayìcincike . . . ne bapàtùle bi—bimpokoto abi mu . . . ne biikale ànu bàpelula bimpokoto abi, ànu ndambù wa bimpokoto byà dilongesha dyà Ebèlù. Mwanèètu Mercier neikalè naabi àdi

panshì aa, bituuta ku cyamù, bwà muntu yònsò udi naabì dijinga awu.

²¹ Mpindyewu eci mwômò emu, cidi citwàla... Kwênà anu mwà kulonga... mu èkèleeziyà wa butangadiki, bwalu ewu ng'èkèleeziyà wa butangadiki. Kwênà mwà kwenza di—dilongesha kùyi ujuula minungànyì ne meeji byà bantu bààbúngi to. Nebìkebè ànu mwà kwenza nàнку awu. Mpindyewu, mémè ndi kule be ne kwikala mulongeshi, ncyèna muumvwiji wa Bible to nànsa kakesè. Kàdi ncitukù nteeta bwà—bwà kwamba nì ncinyì nì ncinyì, anyì mene kwenza nì ncinyì nì ncinyì, nciyi mwanjì—mwanjì kukonkoloja anyì kujandula cintu cyànyì cyà citàmbe bwimpè bwàci to.

²² Bàvwa bangeelè lukonko kùdi mwanèètù wa balùme munanga kampànda, makèlèlè dilòlò awu, wàmba ne: “Mwanèètù Branham, Mwanèètù Seward wákamba musangu kampànda ne wèwè—wèwè kabèènà ànu mwà kukubàmbidikilakù panshì mwaba nànsà wùmwè to. Wamònu's, udi misangu yònsò ànu upeta mùshindù kampànda wà kupàtukamù anyì wà kufinukilapù.”

²³ Mémè kwamba ne: “Èè, kabingilà kàà aci kàdi ne, ntu misangu yònsò ànu nteeta kwela meeji kumpàlà kwà kwenza nì ncinyì cyònsò. Wamònu anyì? Ne pashìishe pàkaadi bantu bànkonka, díbà adi ndikù mwà kubàmbila civwà meeji àànyì. Wamònu anyì?” Kàdi ngwèwè wela meeji majaanlame's. Ne kumpàlà kwà wèwè kwenza cintu kanà cyònsò, teetaku bwà kwangata luseke lùvwà Nzambi mufwànyine kwikala muswè bwà wèwè kwangata alu, díbà adi mbifwànyine cyà bushùwà kwikala bikolè bwà kukubàmbidikilabò panshì.

²⁴ Kanwèna bafwànyine kudifwànyikijila musangu wùvwà—wùvwà Aakàbà úteeta bwà kubàmbidikila Eliyà panshì awu to. Nudikù mwà kudifwànyikijila musangu wùvwà Bàfaalèsà bàteeta bwà kubàmbidikila Yesù panshì awu anyì? Nwamònu's, Yèyè úvwa—Yèyè úvwa úpeta dyandamuna ne lukàsà lwònsò, bwalu cyònsò civwàYe wèza, Úvwa úcyèza ku diswa dyà Nzambi, ne Yèyè...ki mùshindù úvwaYe—úvwaYe mwà kucipeta ngwòwò awu. Mpindyewu, mùshindù awu ngutùdi baswè ku cyòci eci.

Mpindyewu lukonko ndwedibwe, netùshaalè balamàte ku lukonko alu:

Umvwijàku cidi “dinyooka dyà kashidi” dyùmvwija, mu Maatàayi 25.46.

²⁵ Mpindyewu tèelejàayi ne ntèmà yònsò. Bantu bònsò mpindyewu, Maatàayi 25.46:

Nèнку аба бòбò nebàbwelè mu dinyooka dyà kashidi...

26 Mpindyewu, lukonko ludi ne: “Ncinyi...Umvwijàku...” Mpindyewu mwakù *dyà kashidi* wùdi wufuma ku mwakù “kashidi ne kashidi,” ne *kashidi* mbwena kwamba ne “cipòòlò cyà cikondo.” Cìdi ànu cyùmvwija ne “cikondo bule kampàndà,” bu mùdi *kashidi*. Mpindyewu bu nwènù ànu mwà kubala... Ncyèna mumanyè ne udi mufunde nkonko eyi nganyi to, bwalu muntu kî mmufundepù dìnà dyèndè to; kabivwa bikèngela bwà kudifùnda to, ncyèna naabi bwalu to, nwamònu’s.

Kàdi *aba bôbò nebàbwelè mu dinyooka dyà kashidi*:... (Mpindyewu tàngilàayi, ki beena lwonji mbôbò abu.)

27 Mpindyewu, wèwè mukwètù munanga—munanga udi mwelè lukonko elu awu, balàku ànu bìdi biCilondà abi:

... *kàdi baakàne mu mwoyi wà cyendèlèèle.*

28 Beena lwonji nebàbwelè mu dinyooka *dyà kashidi* (cipòòlò kampàndà cyà cikondo’s), kàdi baakàne bôbò bàdi ne Mwoyi wà Cyendèlèèle. Kwàkupetakù dinyooka *dyà Cyendèlèèle* to, kî ndifwanyiine kwikalakù to. Nwamònu’s, bôbò bapètè dinyooka *dyà Cyendèlèèle*, nànkù’s bàdi ne Mwoyi wà Cyendèlèèle; bôbò ne Mwoyi wà Cyendèlèèle, s’mbasùngidiibwe. Nwamònu’s, kadyèna mwà kwikalakù to. Mpindyewu bu nwènù mwà kutàngila, lu—lukonko lwòlò lwinè lùdi lwediibwe... s’lùdi ludyàndamuna lwòlò lwinè. Nwamònu anyi?

Nènku aba bôbò...

Mpindyewu tàngilàayi, nèngàngatè kumpàla kaaba aka:

... *nènku bôbò...*

29 Mu mvensà wa 20... wa 44:

... *nènku bôbò pààbò bààkandamuna, e kuMwambila ne : Mukalenge, ndìbà kaayi ditwikalà ne nzala, mwikàle ne nyòòtà, ne mwenyi, ne butakà,...ne mu búlokò, kàdi katuyi bakukwàcishe?*

Dìbà adi—dìbà adi yèyè neàbàndàmùnè, wàmba ne: Bulelèlè ndi nwavàmbila ne: Mu mùshindù wunùdi nwènù bacyènzèle...umwe wa ku bàdi batàmbe bukesè bàà ku bôbò aba awu, nudi bacìngenzèle...mèmè.

Nènku aba bôbò nebàbwelè mu dinyooka dyà kashidi (dyà kashidi): (ki beena lwonji mbwôbò abu)... *kàdi baakàne mu Mwoyi wà Cyendèlèèle.*

30 Nudi bamòne dishiilangana adi anyi? Beena lwonji bàdi ne dinyooka *dyà kashidi*, kàdi *dyà kashidi* mbwena kwamba ne “cipòòlò kampàndà cyà cikondo.” Mpindyewu, bu ne bivwa cintu cìmwècìmwè aci, nùnkù ncifùndiibwe ne: “Nènku aba nebàbwelè mu dinyooka *dyà kashidi*, bakwàbò aba nebàbwelè mu mwoyi wà kashidi.” Nwamònu anyi? Anyi ne: “Nebàbwelè mu dinyooka *dyà Cyendèlèèle*, ne bakwàbò abu mu mwoyi

wà Cyendèlèlèlè.” Nwamònu’s, kwokù kwikàlè dinyooka dyà Cyendèlèlèlè, bwà kunyookiibwa kashidi ne kashidi, díbà adì’s kùdi dyà Cyendèlèlèlè. . . yèyè ùdi ne Mwoyi wà Cyendèlèlèlè; ne Mwoyi wà Cyendèlèlèlè wùmwepelè ngùdi wùfùma kùdi Nzambi. Cyònsò cidi kacyi ne ntwàdijilu kacyèna ne ndekeelu to, ne cyònsò cidi ne ntwàdijilu cidi ne ndekeelu. Nudi bamòne cindi njinga kwamba aci anyi?

³¹ Mpindyewu, Mufundu Wòwù mwinè wùdi mu—mukwètù munanga ewu mwandàmùne. . . Mpindyewu nwènù bacyàngàte mu nkòngamyâkù ne: “*Nènku aba bôbò nebàkabwelè mu ainion, buumusha, ne mu dyà kashid-. . . ne ku kapyà, dijiba dyà kapyà.*” Mpindyewu, mwakù *a-i-n-i-o-n* wùdi wùmvwija “cipòòlò kampàndà cyà dinyooka.” Mu nkòngamyâkù wà cyena-Ngelikà, apa mene, “cipòòlò cyà dinyooka,” anyi, “cikondo cyà dinyooka.” Nwamònu’s: “Nebàkabwelè mu cikondo kampàndà cyà dinyooka.” Mwakù wùdi mwangata, *a-i-n-i-o-n*. *Ainion*, udi umvwija ne “bikondo, cikondo kampànda, cikondo kampànda cikòsa.” Díbà adi wängàtùlùlaayi mu—mu nkùdimwinu ewu kaaba aka, mu Anglais, *dyà kashidi* mbwena kwamba ne “cikondo kampànda cikòsa.” Nwamònu’s, cidi cifùma ku cyena-Ngelikà, “cikondo kampànda cikòsa.” Mwakù *ainion*, anyi *a-i-n-i-o-n*, *ainion* mbwena kwamba ne “cikondo kampànda cikòsa cyà dinyooka.”

³² Kàdi díbà adi balààyi bikwàbò abi ne: “Kàdi abà nebàbwelè mu dyà Cyendèlèlèlè.” S’ncishìilàngàne. Nwamònu’s, Mwoyi wà Cyendèlèlèlè. *Dyà Cyendèlèlèlè* ùdi ufùma ku mwakù “Cyendèlèlèlè,” ne Cyendèlèlèlè kacìvwakù ne ntwàdijilu anyi ne ndekeelu to. Cidi nkashidi *ne* kashidi. Mpindyewu’s bìwwa bikèngela aci kwandamunaci lukonko alu, nwamònu’s, bwalu nwènù ànu babalè Mufundu awu ne ntèmà yònsò, s’nenùmonè.

³³ “*Nènku aba nebàye kabwela mu dinyooka dyà kashidi, kadi baakàne. . .*” Beena lwonji nebàbwelè mu dinyooka dya kashidi, bànyookiibwa bwà cipòòlò kampàndà cyà cikondo; pàmwàpa bidimu mùliyaalà mujimà, ncyèna mumanyè to, kàdi ncyà bushùwà ne neùnyookiibwè bwà mpèkaatù yèbè. Kàdi bu mùdìbi cyà bushùwà ne mpèkaatu ùwva ne ntwàdijilu, mpèkaatù ùdi ne ndekeelu. Dinyooka divwa ne ntwàdijilu, ne dinyooka didi ne ndekeelu. Ne ifernò wàkafùkiibwa bwà dyabùlu ne banjèlò bèndè. Nwamònu anyi? Èyo. Mpindyewu, ndi ne lukwàbò kwinshì eku lwà kwandamuna mu cyòci aci, katanci kakesè cwanàanà, lwikàlè lulenga lwà dikèma, lùswikakana naalù.

Mpindyewu, kàdi eyi nùnkù kaaba aka: “**Kàdi bàna bàà bukalenge nebèèdiibwè pambèlu mu mîdimà,**” aci ncyenzè bu cyà mwomwèwè ne kwimanshiibwa pambèlù pàà meeji a Nzambi anyi?

³⁴ To, kí ncifwànyine kwikala cìmwècìmwè aci to. Mpindyewu, apa wèwè udi uleedila ku Didya dyà Dibanji. Mpindyewu:

“Nènku bânà bàà bukalenge,” mùvwàbo beelè lukonko kaaba aka. Bânà bàà bukalenge abu mbeena Yudà, ne bôbò mbààkeediibwà mu mîdimà yà pambèlu. Ne bôbò—bôbò mbàdì beediibwe mu mîdimà yà pambèlu, ne mbapicile mu cikondo cyà myadi ne kutwà kwà mikèmù ne disumakaja dyà ménù. Bààkeediibwa mu mîdimà yà pambèlu bwalu ncivwà cifwànyine kutupèeshakù wêwè ne mêmè cikondo cyà kunyingalala, kàdi kabàvwakù beediibwè pambèlù pàà meeji a Nzambi nànsha. Yèyè kàadyakupwàku Izalèèlà mwoyi to. Ne Izalèèlà awu, ànu mùdi mubadi kanà yònsò wa Bible mumanyè, ngudi ubikidiibwa ne “bânà bàà bukalenge.” Nwamònu’s, mbukalenge, mlayi awu. Mu ngaakwilù mukwàbò, Nzambi ùkwàta mudimu ne ditunga adi, pàvwàYe ukwàta mudimu ne Izalèèlà apu, bàdì biikàle bânà bàà bukalenge.

³⁵ Mpindyewu, vùlukàayi ne, Yèyè mmwambè mwaba awu ne: “Ne Abraham ne Izàkà ne Yakòbò,” mu mwaba kampànda ne, “bàvwà mwà kulwa ne kusòmba mu bukalenge ku cikondo cyà ku nshìikidilu.” Nwamònu’s, ne Abraham, Izàkà ne Yakòbò bàvwà mwà kwikala mu bukalenge amu; bôbò mbàvwà, mbàvwà cisàmbà cyà dibènesha cyà bukalenge. Kàdi bânà bàà bukalenge nebèediibwè mu mîdimà yà pambèlu.

³⁶ Mpindyewu, mwaba wùdi dileedila adi difùmina apa awu wùdi—wùdi m’Mubàki. Pààkalwà Mubàki, pàcivwàbo. . . Bàtaanu bàà ku bààvirgò abu bààkayà bwà kutwilangana ne Mukalenge, kàdi—kàdi kabàyi bangàte maanyi mu myèndù yàbò to. Kàdi ba—bakwàbò bàtaanu bôbò bààkangata maanyi mu myèndù yàbò. Mpindyewu, bu nwènu mwà kumòna, ncimfwànyì cilenga be, ne bwà beena Yudà ne bwà bàà Bisàmbà byà bendè, bu babèngiibwe. Lamàayi bwalu abu mu meeji ne, kùtu bitùpà bisàtù byà bantu dîbà dyònsò: beena Yudà, bàà Bisàmbà byà bendè (bàà mmwènekeli wa kwîsukwîsù abu), . . . ; beena Yudà, bàà Bisàmbà byà bendè, ne Èkèleeziyà. Nwènu babàbwejàkàje, ncyà bushùwà ne nenùpetè lutàtù panùdi nukafika mu Bwàkabuulwibwà. Bwalu nwènu kanùyi. . .

³⁷ Mwàkangambilà Mukalenge Bohanon mungà musangu, ne: “Billy, muntu kanà yònsò wàteeta kubala Bwàkabuulwibwà awu mmufwànyine kupeta bilòòtálòòt. Mòna’s,” mwàkambàye, “ki Mukàji-musèla nyewù panshi pa buloba apa, ne—ne dragon ùpwidija màyi a mukana mwèndè bwà kuMulwisha mvità.” Ki Yèyè ne: “Pashìshe pa dîbà dimwèdimwè adi Mukàji-musèla mmwimàne bu binunu lukàmà ne makùmi ànaayi ne binaayi” (dìlongesha dyà Bantèmù bàà Yèhowàh’s) “pa Mukùna wà Sinaayi. Ne pa dîbà dimwèdimwè adi Mukàji-musèla ùdi mu Dyulu.” To, to, wêwè ngudi mutùpàkàne.

³⁸ Kùdi bitùpà bisàtù byà bantu. Nwamònu’s, mbwena kwamba ne, beena Yudà babèngiibwe abu, ne kùdi virgo udi mukùtākàne udi màyi. . . Kí n’Dimiinu dyà mukàji adi nànsha, mbàshàadilè bàà ku Dimiinu dyà mukàji bàvwà dragon mupwidijile màyi

a mukana mwendè awu... Bwàkabuulwibwà 11. Ne pashiishe, mu bushùwà bwà bwalu, kakùyi mpatà to binunu lukàmà ne makumi ànaayi ne binaayi bàà beena Yudà abu kabàvwa Mukàji-musèla to, mbàshààdilè bàà ku èkèleeziyà wa beena Yudà. Kàdi dilongesha dyà Bantèmu bàà Yèhowàh didi dibàtèeka bu ne m'Mukàji-musèla adi, mèmè ncyèna mmòna mùdiku mufwànyine kwenza nàнку to, bwalu, kî m'Mukàji-musèla to.

³⁹ Bu nwènù mwà kumòna mu Bwàkabuulwibwà amu, nCyambè ne: “Ne bôbò mbaavirgò.” Ne bôbò mbatungula. Kàdi mutungula ùvwa nganyi? Bàvwa... Batungula bàvwa mbalami bàà ku ntempèlù bàvwa bàlamà mukalenge-mukàji, bwalu bàvwa... bwal-... Bàvwa bantu balùmè bàvwbò bavwijè batungu. Bàvwa ne... Nuvwakù bamòne ne, mbambè ne: “Bôbò kabààkanyangukakù ne bakàji” anyi? Bàvwa mbatungula bàà ku ntempèlù. Ne cívwa mbúngi busòbola búvwa Nzambi mwangàte mu basungula bàà beena Yudà. Mpindyewu, bu nwènù mwà kumòna... Bu twètù ànu mwà kwangata cyòci aci katanci kakesè cyanàana, bwà cyàmònakù mwà kucisòmbesha mu meeji ènù amu, munùdiku bulelèlè mwà... .

⁴⁰ Twàngatàayi Bwàkabuulwibwà nshàpità wa 7, nèнку netùjandulè kaaba aka mpindyewu, mwaba wùdi... cidiCi cyambè. Ncintu cilenga be:

Nèнку paanyimà pàà bwalu ebu... ngàkamòna banjèlò bànaayi biimàne ku ntengu yinaayi yà buloba... (mpindyewu, eci cidi cyènda pàmwè ne Yèhezèkèlè 9, mwàkamònàye dibùtudiibwa dyà beena Yudà. Kàdi apa ùdi ùmòna dibùtudiibwa dyà bàà Bisàmbà byà bendè, Bwàkabuulwibwà, nshàpità wa 7) ... Nèнку ngàkamòna banjèlò bànaayi biimàne ku ntengu yinaayi yà buloba, bakwàte mpeepèle yinaayi (mpeepoèle mbwena kwamba ne “mvità ne dikòkangana”) ... bwà lupeepèle kalùtuutu pa buloba, anyi pa mbù, ... anyi muçi kanà wònsò to. (nèнку aci mmvità, “bakwàte”)

⁴¹ Kaa, bu ne tuvwakù ne díbà dyà kubwela mu disùnsula dyà lukonko elu's wè. Aci ncyenzeke... Mwaba awu ki wùvwà Russell mupetèle cibwejàkàji. Russell wàkamba cipròfetà, pa kumòna cyòci eci cilwa. Wàkamba cipròfetà ne “cívwa mwà kwikala Dilwa dyà Mukalenge Yesù.” kàyi mumanyè ne cívwa ndi—nditwìbwà dyà citampì dyà Èkèleeziyà to. Nwamònu anyi?

⁴² Ne bàdi bàdikonka mùvwà mvità yà buloba bujimà... Mvità yà Kumpàlà yà Buloba bujimà. Tàngilàayi, yàkiimana mu matùkù dikùmì ne òmwè dyà ngondo wa dikùmì ne umwe, pa díbà dikùmì ne umwe dyà ditùkù adi; ngondo wa dikùmì ne umwe, ditùkù dyà dikùmì ne òmwè, pa díbà dyà dikùmì ne umwe. Ne dyàkàmwè paanyimà pàà cyòci aci, dibàtiiza dyà

mu mâyi mu Dîna dyà Yesù dyàkabuuludiibwa ne Dibàtiiza dyà Nyumà Mwimpè kùdì Èkèleeziyà. Menemene, dyàkàmwè paanyimà pàà cyôci aci.

⁴³ Nwênù bacyângàcile mu Bwàkabuulwibwà amu, mùshindù wutùdì baCitwàngàje pàmwè, ne pankaci pàà Cikondo cyà Filàdèlèfiyà ne cyà Laòdikiyà. Nènku ba-Méthodistes mbàvwà beena Cikondo cyà Filàdèlèfiyà aci, dinanga dyà bwàna bwètù. Ne cikondo cyà ndekeelu, cikondo cyà èkèleeziyà, civwà n’Cikondo cyà Laòdikiyà, civwà cikondo cyà civùmvù aci. Ne Yèyè mmwambè mwômò amu ne: “Ndi mutèeke ciibi (ciibi cyunzulula) kumpàla kwèbè.” Ciibi cyunzulula! Nènku nwênù baleedile ku yôyi Mifundu ayi, necitwangajè Mukenji mujimà buludì mu kaaba kàmwè mwômò amu, bwà kunùleeja anu menemene.

⁴⁴ Tàngilàayi! Apa byònsò bivwa ànu Taatù, Mwànà, Nyumà Mwimpè, mu dibàtiiza, (netwikalè mwà kubwelamù buludì) civwà kakùyì mpatà to twitabàayi wa beena Kàtòlikè ne kaciyi dilongesha dyà beena Kilistò to. To, mukalenge. Ndi mfùma ku . . . Tudi naaci mwaba ewu mene, dilòlò edi, bwà kubwelamù; pàmwè ne nkòngamyakù kabìdì. Nwamònu anyi? Èyowà’s, mukalenge, kabìdì ne maalu-malonda. Kacya kakùvwakù kwanjì kwikala muntu nànsha umwe mubàtùjijibwe mùshindù awu mu Bible to, anyi nànsha bidimu nkàmà yisambòmbò paanyimà pàà Bible. Ne ndi mwà kunùjadikilaci mwab’ewu mene ku dilongesha dyà beena Kàtòlikè sungasunga ne, bòbò mbàkacitwàdijà, ne dimyaminangana ne dipòngolwelangana dyà mâyi.

⁴⁵ Kupàtukabì mwômò amu e kuya kabwela mu èkèleeziyà wa beena Wesley, ne mu èkèleeziyà wa ba-Méthodistes, ba-Méthodistes kuyabò naabi mu ba-Baptistes, ba-Baptistes kuyabò naabi, kàdì dicide ànu dilongesha dyà mashimi! Kàdì mêmè ndi mwà kwalukila mu Bible ne kunùjaadikila ne Bible mmwambè ne “wèwè udi ne dîna dyà ne udi ne mwoyi, kàdì udi mufwè.” Ncyà bushùwà menemene. Ne bòbò bàvwa . . .

⁴⁶ Ndi mwà kujaadika ne Bible mmulongeshe ne bàvwa mwà kukwàta mudimu ne Dîna Dyèndè mu dibàtiiza too ne mu cikondo cyà mîdimà, bilondèshile ci—cikondo ciinâyì . . . cyà—cyà cikondo cyà èkèleeziyà, Cikondo cyà Èkèleeziyà wa Peegàmò. Ne Yèyè mmwambè, mu, munda mwà bidimu cinunu ne nkàmà yitaanu byà bikondo byà mîdimà abi, cyònsò cyà kùdibi, mmwambè ne: “Nkukushààdile kaabukénkè kakesè, bwalu kwèna muvilè Dîna Dyànyì to.”

⁴⁷ Pàakafikabì bwà cikondo cikwàbò aci, cikondo cyà Kàtòlikè aci, Yèyè kwamba ne: “Wèwè udi ne dîna dyà ne udi ‘ne mwoyi,’ kàdì udi mufwè! Ne udi muvilè Dîna Dyànyì.” Ki bwalu mbwòbù abu’s. Nwamònu anyi? Cyònsò aci cidi ànu citwàngaja cimfwànyì cilenga cinène, Bible mujimà.

48 Mpindyewu mōnaayi eci:

... bakwàte mpeepèle yīnaayi. . .

Nēnku ngākamōna mwanjēlo mukwàbò ùbànda ùfūmina mu Dyulu, mwikàle ne citampì cyà Nzambi udi ne mwoyi: . . . (Citampì)

49 Mpindyewu, citampì cyà Nzambi udi ne mwoyi ncinyi? Mpindyewu, nwēnù bānà bèètu ba-Adventistes nenwāmbè ne: “Kuneemekela kwà ditùkù dyà nsabatu.” Ndi muswè nūndeejèku aci mu Mifundu. Kacyēnamù to. Kakwēnakù mwaba nānsha wūmwè wūkaadici . . . wùdici—wùdici ciikàle citampì.

50 Bu nwēnù mwà kubala Efèsò 4.30, ànu lukàsàlùkàsà, nenūsanganè cidì Citampì cyà Nzambi udi ne mwoyi. Efèsò 4.30 ùdi wāmba ne: “Kanùbungamiji Nyumà Mwīmpè wa Nzambi unùdi batwībwe nendè citampì too ne ku ditùkù dyà bupikudi bwēnù.” Kī ntoo ne ku ditābuluja dīdì dilondà to, kàdi nudi ne dikùbiibwa dyà Cyendèlèlè (uh-huh). “Kanùbungamiji Nyuma Mwīmpè wa Nzambi unùdi batwībwe nendè citampì too ne ku ditùkù dyà bupikudi bwēnù.” Mōnaayi Efèsò 4.30 ní kēna wāmba nānku, pashīshè wāngatè mèyi a kumpengà kwà dibèji awu bwà ùcilondèshè mu Mifundù mwōnsò amu, bwà ùjandùle. Mpindyewu: “Batwībwe citampì too ne ku ditùkù dyà bupikudi bwēnù. Biikàle ne citampì cyà Nzambi udi ne mwoyi.”

51 Mpindyewu, vùlukàayi ne, Nyumà Mwīmpè kāvvakù mulongèshīibwe bu Dibātiiza dyà Nyumà Mwīmpè to ànu paanyimà pàà Mvità yà Kumpàlà yà Buloba bujīmà. Tudi tufūma ku ditwà cyanga cyètù—cyètù cyà ngòlò, bidimu makumi ànaayi, anyi cidimu cyà makumi ànaayi cyà cyanga.

. . . ne yéyè wàkeela lubilà lukolè kùdi banjèlò bānaayi abu, bāvwa bapèeshīibwe bwà kunyanga buloba anyi mbù,

Wāmba ne: Kanūnyangi buloba, anyi mbù to, anyi mucì kanà wōnsò, too ne patwīkalà batwè citampì basadidi. . . (mpindyewu ukàadi upweka ku lukonko lwèbè alu lwà ne, “bānà,” wamōnu’s) . . . basadidi bàà Nzambi wetù pa mpàla, (kanūnyangi, kanùbùtulu buloba, bōmbè bwà mushindà kabūtaayikikù to, kanùbùtudi cintu mu kaabujīmà to too ne piikalà basadidi bàà Nzambi wetù batwībwe citampì)

52 Mpindyewu, bu twètù mwà kwaluja aci ne kwalukakù paanyimà pààpa, mùvwàbi ne—ne nānsha mene mu mukāndà wà *Dūmana dyà Mvità yà Buloba Bujīmà*, mu mupimbu mwibīdi, pàākālwanganà Kalààla kàà māsālaayi Allenby mvità too ne pàākadyatāye ku mikālù yà Yēlusālēmà, ki kwelayè nshinga paanyimà kùdi Mfūmù wa Angleterre, kwamba ne: “Ncyēna muswè kutuuta cingoma pa cimenga eci to, bwà ngiikādilù waci musantu.” Kwambayè ne: “Cīndi ne cyà kwenza ncinyi?”

53 Awu ne: “Sambilà.”

54 Ki kubùukayè cyàkàbìdì ne ndèkè kuulu kwàcì, ne pààkenzàbo nàнку, kwambabò ne: “Allenby nya’ wiya.” Kàdì kùvwa Baamùzùlùmanyì muntwamu, kwelàbò meeji ne yéyè wàkamba ne: “Allah nya’ wiya.” Ki kubàndishabò dibèndelà ditòòke ne kùdifilabò ne Allenby kubwelayè mu Yelusàlèrà wènda wènda ne kumukwàtayè kàyi mutuutè cingoma nànsha cimwè to, bilondèshile bipròfetà, ncyà bushùwà, ne kumwalujilayè beena Yudà.

55 Pashiishe kujuulabò Hitler bwà kukèngeshayè beena Yudà, ne pa buloba bujimà, ne kubàsakayè bwà kwalukilabò muntwamu.

56 Ne Bible mmwambè ne Yéyè ùvwa mwà “kubààlujila pa mapwàpwà a nyuunyi wa mukankù.” Nènku pààkabangàbo kwalukila...Cikàndàkàndà cyà *Life* ne bikwàbò mbipàtùle bwalu abu kùkaadi ndambù wa mbingu, mùdìbo babùmùshe babàlùje binunu ne binunu, bwà kulwabò naabò mu Yelusàlèrà, ne kubangabò kwambula bàà bakùlàkàjì abu paanyimà. Bààkabèlè nkonko. Mémè ndi naabi byònsò pa mukàbà wà bindìdìmbì ne mu maafòtò. Ki kwambayè...Ki dibèndelà dyà mìtootò yinaayi dyà Davidi adi, dibàndisha mwaba awu, dibèndelà dyà ditàmbe kwikala dyà kale pa buloba, musangu wà nzànzànzà wàkapeepàdi kacya kùkaavwa bidimu binunu bibìdì.

57 Yesù wàkamba ne: “Pèèlà mucì wà mfigì ntòngà, lukòngo elu kalwàkupita nànsha.”

58 Nènku’s ki bóbò bàvwà bàlwa ne bàkùlàkàjì abu abu, ne kwambabò ne: “Cinyi? Nudi nwalukila bwà kufwila mu buloba bwenù anyi?”

59 Bóbò ne : “To, tudi balwe bwà kumòna Maasiyà.”

60 Nènku, mwanèètù, ndi nkwambila ne, tukàadi ku ciibi! S’ki basadidi abu, bàdì bindile kuntu kwàka abu. Kì mmusùmbà wà beena Yudà bàdì bafwànyine kunwiba ne mènù ènù a byamù bu bóbò ne mùshindù aba to, abu kì mbeena Yudà bàdìYe wàmba aba to. Kàdì mbàdì kuntu kwàka bàdì balamè mi—mikenji ne bikwàbò abu, cibì kacya kabàyikù nànsha banji kumanya ne kùtukù Maasiyà kampànda to.

61 Nènku Mwanèètù...ku Stockholm, Mwanèètù Petrus, mmubàtùmine mùliyò mujimà wà tukàndà twà Dipungila Dipyadìpyà, ne pàyipecibo bàvwà munkacì mwà kuyìbalà. Kwambabò ne: “Èè, ewu yéyè mwikàle Maasiyà awu, tùmumònèbi wènza cimanyinu cyà mupròfetà, nènku netùmwitàbùùjè.”

62 Cyalu cilongola kaayìpu bwà mudimu wànyì wà bwambi’s we! Kùkaavwa kunshàadile ànu mèbà àbìdì bwà mfikè ku biibi byà Yelusàlèrà, bwa kubwelamù, ne mvwa mu Caire, mu

Èjiipitù. Nènku mvwa ngenda muntwamu, ki Nyumà Mwímpè kwambaYè ne: “Kùyì mpindyewu to.”

63 Mémè kudyàmbara ne: “Civwa ànu ndidifwànyikijila cyanààna. Ticket wanyì mmumana kusumba, pàanyi mu njila. Muntu awu’s ùkaadi kuntwaku bwà kutwilangana naanyi, musumbà mujimà, bilongelu ne bikwàbò byònsò.”

64 Mémè kuya kumpàla ndambù, ki Nyumà kwambaYè ne: “Kùyì to! Kùyìkù to!”

65 Mémè kwalukila kùdì musumbishi wa maatickets, kwamba ne: “Ngààlekèdì ewu ticket. Ndi muswè kuya ku Athène, mu Grèce, ku Mukùnà wà Mars.

66 Ki yèyè ne: “Èè, ticket webè’s mbwà kuya ku Yèlusàlèmà, mukalenge.”

67 Mémè ne: “Ndi muswè kuya ku Athène pamutù pàà kuya ku Yèlusàlèmà.” Nyumà Mwímpè mwindile, adi dībà kī ndyanjì kulwa to. Kabyèna ànu mùdibi bikèngela kwikalabì to.

68 Tàngilàayi:

...batwè citampì pa mpàlà pàà basadidi bàà Nzambi wetù,

Wamba ne: Kanwènzèdi buloba bibi, ...too ne patwikalà...batwè citampì pa mpàlà pàà basadidi bàà Nzambi wetù. (muntu kanà yònsò mmumanyè ne aci n’Citampì cyà Nyumà Mwímpè; tàngilàayi)

Ne ngákumvwa búngì bwà aba bààkatwibwà citampì: ... (mpindyewu, bôbò kabàyi beena Yudà to, tàngilàayi eci) ...ne bààkatwibwà citampì bàvwa binunu lukàmà ne makùmi ànaayi ne binaayi bàà bisàmbà byònsò byà bânà bàà Izàlèlèlè. (kamùyì wa bàà Bisàmbà byà bendè mu bôbò abu to. Aci nku ndekeelu kwà cikondo)

69 Tàngilàayi! Cisàmbà cyà Yudà, binunu dikùmi ne bibìdì; cisàmbà cyà Luubènà, binunu dikùmi ne bibìdì; too ne kwinshì, Gaadà, binunu dikùmi ne bibìdì; Nefàtàlimà, ne—ne—ne kwinshì too ne ku Azèlèlè, ne—ne Zaabùlònà, ne bisàmbà byònsò dikùmi ne bibìdì byà Izàlèlèlè ebi. Nènku dikùmi ne ibìdì kuvudija ku dikùmi ne ibìdì nyingà? Binunu lukàmà ne makùmi ànaayi ne binaayi. S’ki binunu lukàmà ne makùmi ànaayi ne binaayi abi, beena Yudà! Kī mbàà Bisàmbà byà bendè to, beena Yudà! Aci kacayèna ne cyà dyenza ne Mukàjì-musèla nànsha. Nànku Bantèmù bàà Yèhowàh mbatùpàkàne mu dilongesha dyàbò adi. Bible ùdì wamba ànu patòòke tòò ne “mbeena Yudà,” ne kī mbàà Bisàmbà byà bendè nànsha. Bôbò mbasadidi bàà Nzambi, ne bàà Bisàmbà byà bendè kacya kabàtukù bangàciibwe bu basadidi to. Twètù tudi bânà bàà balùme ne bàà bakàjì, katwèna basadidi to.

70 Mpindyewu balàayi ntùngunukilu waCì awu. Byenzè bu muntu uvwa udyà cibimbi awu, kwambayè ne: “Ncimpè,

kàdi tùdyekù cikwàbò.” Èyo, Nzambì ùdi naaBi búngì cyakaa mwab’ewu. Mpindyewu, mònaayi ànu cyanàànà. Mpindyewu, mpindyewu tudi ku mvensà wa 8:

Ne bàà cisàmbà cyà Zaabùlònà...kutwà citampì binunu dikùmi ne bibìdì. Bònsò bàà mu cisàmbà cijimà cyà Yòzefù bààkatwìbwà citampì bàvwa binunu dikùmi ne bibìdì. Bàà mu cisàmbà cyà Beenjàminà bààkatwìbwà citampì bàvwa binunu dikùmi ne bibìdì.

⁷¹ Nwamònu’s, Yone, bu mùvwàye mwena Yudà, wàkajingulula cyònsò cyà ku byòbi, wàkamòna bisàmbà abi dikùmi ne bibìdì byà Izalèèlà; binunu dikùmi ne bibìdì mu cisàmbà cyònsò, dikùmi ne ìbìdì kuvudija ku dikùmi ne ìbìdì biikàle byenza binunu lukàmà ne makùmi ànaayi ne binaayi. Ki bòbò abu, kàyi Èkèleeziyà to, beena Yudà. Bible mmwambè kaaba aka ne, bàvwa bònsò “bànà bàà Izalèèlà,” cisàmbà ne cisàmbà cyònsò citèèla mu òdìna.

⁷² Mpindyewu tàngilàayi, mvensà wa 9:

Paanyimà pàà maalu aa (mpindyewu ki Mukàji-musèla ulwàlwa ewu)...

Paanyimà pàà maalu aa ngàkatàngila,...mònaayi, musùmbà munène, wùvwà muntu kàyi mwà kubala,...

⁷³ Ki batungula bèènù bàà ku ntempèlù mbòbò abu, bàdi ànu binunu lukàmà ne makùmi ànaayi ne binaayi cyanàànà, ànu kamòtò kakesè cyanàànà, ànu balami bakesè bàà ku tempèlù bìikalà ne Mukàji-musèla abu; ànu bashìndikiji Bèndè cyanàànà—Bèndè cyanàànà. Ki binunu lukàmà ne makùmi ànaayi ne binaayi mbyòbi abi, mbashìndikiji bàà Mukàji-musèla; batungula bàà ku ntempèlù.

⁷⁴ Tàngilàayi! Mu bushùwà bwà bwalu, ndi mumanyè ne nwènù nudi nwalukila ku mvensà wa 14 eku, nwamba ne: “Mòna’s, s’nyawù bàdi ne Mukàji-musèla kwònsò kùdìbo...” Kakùyi mpatà to! Batungula’s bàvwa bènda ne mukalenge-mukàji kwònsò kùvwàye ùya. Bulelèlà’s! Kàdi bàvwa banganyi? Bòbò bàvwa ànu bashìndikiji cyanàànà, ne ki cidì ànu menemene Mufùndù wàmba ne ncyòci kaaba aka.

⁷⁵ Mònaayi:

Nènku paanyimà pàà maalu aa...ne, mònaayi, musùmbà munène, wùvwà muntu kàyi mwà kubala, bàà matùngà ónsò,...bifuku,...bisàmbà, ne mwakulu,... (s’ki Mukàji-musèla wenù wa bàà Bisàmbà byà bèndè udi umwènèka awu, èyo) ...bòbò aba bìmàne... kumpàlà kwà Mwànà wa mùkòòkò, (s’ki Musùngidi wabò awu, Mwànà wa mùkòòkò, kaciyi mikenji to; Mwànà wa mùkòòkò, Ngàsà) ...bavwàdika mìzàbì mitòòke,...(tàngilàayi, mu katancì kakesè emu,

nùmonèbi mizàbì mitòòke ayi ní kí mbwakànè bwà bansantu) . . . *ne malala mu cianza;*

Ne bòbò bààkeela dīyī dyà lubilà lukolè, . . . (eci cyòci kaciyi ditàbuluja dyà beena Mpenta to, kacya nçitukù mèmè mwanjì kuumvwa ditàbuluja to) . . . bamba ne: Lupàndù kùdì Nzambì wetù udi musòmbe pa nkwasà wa butùmbi, ne kùdì Mwànà wa mùkòòkò,

Ne banjèlò bònsò bàvwa biimàne banyùngùlùkile nkwasà wa butùmbi, ne bakùlù ne nyama yinaayi, . . . bàkapòna pa . . . kumpàlà kwà nkwasà wa butùmbi aku batwè mpàlà panshi, ne bàakakuukwila Nzambì,

Bamba ne: Amen! Dibènesha, . . . butùmbi, . . . lungènyi, . . . disàkidila, . . . luumù, . . . ngulu, bukolè, bìikalè kùdì Nzambì wetù kashidi ne kashidi! Amen!

⁷⁶ Aci's ncyumvwiike ànu bu cikondo cyà disangisha dyà citùùdilu's, kí mmwòmò anyi? S'necyènzekè's! Bàvwa mbanganyi biinè abu? Mbinunu lukàmà ne makùmi ànaayi ne binaayi abi anyi? Nànsha kakesè! Ewu musùmbà munènè wùvwà muntu kàyì . . . bàà cifuku cyònsò, myakulu yònsò, ne matùnga ónsò aba. Kwènàku mwà kumòna anyi, mulundà wanyi munanga?

⁷⁷ Mpindyewu tàngilààyi, Cìbalààyi ànu cyaààà. Mpindyewu:

Ne umwe wa ku bakùlù wàkandamuna, ùngambila ne: Aba mbanganyi ne . . . bàdì bavwàdika mizàbì mitòòke aba? ne bàdì bàfùmina penyi?

⁷⁸ Mukùlù awu wàkambila Yone, yèyè uvwa mwena Yudà wàkajingulula binunu lukàmà ne makùmi ànaayi ne binaayi abi awu, ne: "Mpindyewu, udi mubàmanyè, bònsò abu mbeena Yudà. Kàdi aba mbanganyi? Ne mbafùmine penyi?" Nudi bamòne cìdì mukùlù awu mwambè aci anyi? "Umwe wa ku bakùlù wàkandamuna," (abu mbakùlù bàvwà kumpàlà kwà Nkwasà wa butùmbi) "wàkangadamuna, wàmba ne: 'Aba mbanganyi bàdì bavwàdika mizàbì mitòòke aba? Ne bàdì bàfùmina penyi? Mpindyewu, twètù bònsò tudi bamanyè beena Yudà ne cipungidi cyàbò ne bikwàbò byònsò, kàdi aba nunku bàakalwà díbà kaayi?'" Mpindyewu tàngilààyaaku:

Ki mèmè kumwambila ne: Mukalenge, wèwè's udi mumanyè. ("Ncyè—ncyè—ncyèna mumanyè to," mwàkambà Yone, "aci cìdì ànu cimpicìle's. Ncyèna mumanyè to.") Ki yèyè kungambila ne: Aba mbàdì bàfùmine mu makènga makolè, "Mu mateeta ne njiwù yàbùngì eyi, midimu mikolè ne matèyi, mmùndì mupicìle." (Nwamònu anyi?) . . . aba mbapàtùkile mu makènga makolè, ne mbasukùle mizàbì yàbò, . . . (mu èkèleeziyà anyi? Aci cìdì cyùmvwika cijaalàme

anyi?) . . . *mbasukùle mizàbì yàbò, ne bayitòòkèshe mu mashi a Mwànà wa mùkòòkò.*

. . . *bàdi kumpalà kwà nkwasà wa butùmbi wa Nzambì, ne bàdi bàMukwàcila mudimu muunyà ne bufuku, . . . (udi unkwàcila mèmè mudimu mu nzùbù mwànyì nganyi? Mukàjàànyì. Mmwômò anyi?) . . . ne mu ntempèlù Wendè: . . . (yèyè ngudi ushààla naanyi mu nzùbù mwànyì ne mu cibùcilu cyànyì, mmukàjàànyì. Yèyè ngudi usòmba pàmwè naanyi, ne ùnsukwìla bilàmbà, ne ùdongolwela bintu) . . . ne yèyè udi musòmbè pa nkwasà wa butùmbi awu neàsombelè munkaci mwàbò. (Ekelekele, tèelejàayi!)*

Ne kabààkwikalakù kàbìdì ne nzala to, . . . (mmùmwè ne bàvwa bapangilekù byàkudyà yimwè misangu mu lwendu amu's) . . . anyi kabààkwikala kàbìdì ne nyòòtà to; anyi muunyà kawàkubòòshakù kabìdì to, nànsha luuyà lukolè.

Bwalu Mwànà wa mùkòòkò udi munkaci mwà nkwasà wa butùmbi awu neàbàdìshè, ne neàbàlombòlè ku mpokolo yà màyi àdì ne mwoyi, ne Nzambì neàkupulè . . . binsònjì byònsò ku mèsù kwàbò. (s'ki Yèyè awu, s'ki Mukàjì-musèla wenù awu)

⁷⁹ Ki binunu byènù lukàmà ne makùmi ànaayi ne binaayi mbyòbì abi, ki basadidi bèènù abu mbòbò abu. Pa nànkù “bànà bàà Bukalenge” abu mwaba ewu, wèwè mukwètù munanga udi mwelè lukonko elu awu, bìdì . . . udi mwelè lukonko lwà musinga mukolè elu awu. Ndi ngeela meeji ne ndi mufwànyine kwikala mulùshiyè paanyimà apa mu . . . mwaba kampànda, kàdì “pèèdiibwàbo pambèlu,” kî mbwena kwamba ne nebèèdiibwè pambèlù pàà meeji a Nzambì nànsha. Mbeediibwe pambèlù pàà bintu byà dyàkalenga byà nyumà bwà ntàntà wa cikondo. Nwamònu's, ànu bwà ntàntà mukèsè cyanààna wa cikondo.

⁸⁰ Bwalu, mupròfetà pààkamònàye Izalèlèlà mu ditùku edi divwàye ùlwa adi, wàkamba ne: “Èè, Izalèlèlà neikalèku pùumushiihwà Nsabatù, ne—ne pùikalàbo bàkaadi bàsùmbisha dyà Nsabatù mùdì ditùkù dikwàbò kanà dyònsò edi, ne bintu byònsò ebi anyi?” Kwambayè ne: “Èè, neWikalè—neWikalèku . . . Izalèlèlà neàpwibwè mwoyi kashidi kashidi anyi?”

⁸¹ Yèyè ne: “Mu dyulu mùdì bule kaayi ne apa? Buloba bùdì ndòndò kaayi? Bìpimèbì tǔng ne mulangala wùdì kumpalà kwèbè awu.”

Yèyè ne: “Ncyèna mwà kupima to!”

⁸² Yèyè ne: “Nànsha Mèmè pàànyì ncyèna mwà kupwà Izalèlèlà mwoyi to.” Nànsha kakesè! Izalèlèlà kàadyàkupwibwakù mwoyi to.

⁸³ Pa nàнку, nudi numòna's, *dyà kashidi* ne *dyà Cyendèlèèlè* mbintu bibidi bishiilàngàne. Izalèèlà úvwa mwediibwe pambèlu, kàdi kí mpambèlù pàà meeji a Nzambì to. Ne Pòlò ùdi úcyàmba kaaba aka, bu ne mvwakù ne . . . bu ne mvwakù ne díbà dyà kulonga, mu mùshindù wà mùfwànyinekù kufika lùkàsà ku Mufùndù wùdi . . . nùнку mvwa mwà kukùleedila bwènu nwènu, nwamònu's, bìdi bimvwilà mu meeji abi.

⁸⁴ Pòlò wàkulapù, wàkamba cyôci aci bwà twètù bàà Bisàmbà byà bendè tùdimukè, mùshindù wutùdi twenda ne bitùdi twenza. Nwamònu anyi? Piikalà Nzambì kàyi mulamìnyìne ditàmbà dyà kumpàla, nwamònu's, ne twètù biikàle ànu basomeka cyanààna, nwamònu's, . . . Ne Izalèèlà uvwa mufomija bwà cikondo kampànda awu, mùdiye mwambè. Ànu bwà cikondo kampànda, mbùvwà Izalèèlà mufòmìjiiibwe. Ncyà bushùwà, kàdi cibwikilu aci necyùmushiibwè pa mèsù pààbò. Ne apu mpààlediibwà muntu wa ndekeelu wa Bisàmbà byà bendè mu Bukalenge bwà Nzambì, pashùshe cibwikilu necyùmushiibwè pa mèsù pàà Izalèèlà. Nénku nebàmbè ne: “Ewu ki Maasiyà utùvwà tukèba bwà kumòna awu.” Ncyà bushùwà, kàdi ciibi cyà bàà Bisàmbà byà bendè ncikànga (bwàtù mbu—mbukànga), kakùcyèna kushààle kàbìdì—kàbìdì ngàsà bwà bàà Bisàmbà byà bendè cikondo aci to.

⁸⁵ Mpindyewu, ndi ngangata díbà dyàbùngì be pa lukonko lùmwèpelè. Ne muntu kampànda neàmbè ne: “Mpindyewu kwàkufika ku lwànyì mèmè to.” Èè, netùlwijakajè kàdi tùmone ní katwàkukùfika.

⁸⁶ Èyo, lwà—lwà luleepa ndwòlò elu. Ne katùpà kààlù kònsò kàdi mukàji awu mukonkè anyi mulùme awu mukonkè, anyi ní nganyì awu, nkìmpè.

53. Kí mbulelèlà ne Mukalenge Yesù kàakafwìla bàà pa buloba bujimà, mbwena kwamba ne muntu yònsò pa buloba, kàdi ànu . . . (mpindyewu, ndi mufwànyìne kuumvwija aci, kàdi yèyè . . . mukàji anyi mulùme, ní nganyì awu . . . Mbimwèke ànu bu cyanza cyà muntu mukàji) . . . kàdi ànu bwà aba—kadi bwà aba bàà mu citùpà cyònsò cyà buloba, bàvwà Taatù muMupèèshe abu anyi? Aba bàvwà kumpàlà kwà difùkà dyà dyulu ne buloba, bàvwà Nzambì mulongòlwèle Mwoyi wà Cyendèlèèlè, mwikàle mubàsungùle bilondèshile disànkà Dyèndè dìmpè Sungasunga anyi?

⁸⁷ Kakùyi mpatà to, mmwòmò! Aci ncyà bushùwà menemene. Yesù wàkafwìla . . . kabìyi ànu bwà . . . Mmudipàngàdikileci.

⁸⁸ Tùmonebi, ngeela meeji ne . . . Ngee—ngeela meeji ne mbabalè . . . lukonko kampànda lùdi lùvwilàmu pa cyôci aci:

54. Kakùyi mpatà to Mifùndù yìdi yìtwàmbila ne aba mbiiikalà kabàyi mwà kusùngidiibwa—mbiiikalà kabàyi mwà kusùngidiibwa. Ki bwà cinyi . . .

89 Ncyà bushùwà menemene. Mifùndù yìdi yitwàmbila ne kùdi bantu bàvwà badyànjila kulongolola kùdi Nzambi bwà kupiìshiiwbabò.

90 Nudikù baswè bwà kubala aci, bwà cyàmònakù mwà kunuumuka kashidi mu mitù anyi? Èyo, tùbuululààyaaku mpindyewu mu Mukàndà wà—wà Yudà, Yudà ngudi wakula kaaba aka ewu.

Yudà, musadidi wa Yesù Kilistò, udi mwanàabò wa balùme wa Yakòbò, kùdi aba bàdi bajidiibwe kùdi Nzambi Taatù, ne balamùibwe mu Yesù Kilistò, ne babùkidiibwe:

91 Nudi numòna bàdiye ùCyàmbila anyi? Kí nngènzàmpèkààtù to, kí ng'ànu beena mudimu wà butangadiki to, kàdi bajidiibwe ne babùkidiibwe. Nwamònu's, aba bàkaadi mu Bukalenge.

Luse kunùdi, ne ditalala, ne dinanga, bivudijiibwè.

Bananga, . . . ndi mudifile ne disùminyina dyònsò bwà kunùfùndila bwà lupàndù lwètù lutùdi naalù poopàmwè ne, bìvwa bìkèngediibwa bwà mèmè kunùfùndila, ne bwà kunùkànkamika. . . bìvwa bìkèngela bwà nwènù kulwangana mvità ne mwènù mwònsò bwà diitabuujà dyàkafidiibwà kùdi bansantu musangu wùmwè cyendèlèlè.

Bwalu kùdi bàmwè bantu bàdi badifindè mu musokoko, bàkaavwà kumpàlà kwà kale wàwa bamana kufùndila dipùla edi, . . . (bìshi?) . . . bàkùdimuna ngàsà wa Nzambi wètù mu masandi makolè. . .

92 Bafùndila kale wàwa! Kí nnè Nzambi wàkasòmba pa nkwasà wa butùmbi, e kwamba ne: “Nènsungilè muntu kampànda, Nènjimijè muntu kansanga” to. Kabìvwa nàнку to! Nzambi wàkafwà, ne pàakafwà Yesù apu, difuta dyà cibawu dyàkabwikila buloba bujimà bwà muntu ne muntu. Kàdi Nzambi, ku didyànjila-kumanya. . . Kí nnè Yèyè mmuswè. . . Kí mmuswè bwà muntu nànsha umwe àfwe to. Ùvwa muswè bwà muntu ne muntu kusùngidiibwayè. Ki civwà kiipàcilà Kèndè—ki civwà kiipàcilà Kèndè kàà Cyendèlèlè ncyòci aci. Kàdi piikalàbi ne Yèyè ùvwa Nzambi, Ùvwa mumanýè ne nganyì uvwa usùngidiibwa ne nganyì uvwa kàyì ùsùngidiibwa. Yèyè kàyì mumanyè to, nàнку Kávwa Nzambi udi kàyì ne mikàlu awu to. Pa nàнку aci ncidi Bible ùlongesha. Bwà ne twètù tuvwa mwà. . .

93 Bu ne tuvwakù ne díbà dya kubuulula mu Loomò emu, mu nshapità wa 8, nwènù biine's nudi bafwànyine kucibala. Loomò, nshapità wa 9, ne myaba mikwàbò yàbùngì mu Bible. Efèsò, nshapità wa kumpàla. Nèнку nudi mwà kumòna ne disungula dyà Nzambi, bwà kushààladi dyà cyà bushùwà, Nzambi wàkafila cipungidi cyà kakùyì musingà mwenza to. Wàkatùma Yesù bwà

kufwilaYè aba bàkaavwàYe mudyànjile kumanya. Nwamònu anyi?

⁹⁴ Kabiya ànu kwamba cyanààna ne: “Èè, mùdì wamba ne Nzambì kàvwa mumanyè ne mukàji awu ùvwa anyi kàvwa mwà kusùngidiibwa anyi?” Nzambì ùvwa mumanyè ne wèwè awu uvwa mwà kusùngidiibwa, anyi wèwè ní uvwa mwà kusùngidiibwa anyi to, kumpàlà mene kwà dyulu ne buloba kubangabi, bwà cyanààna Kàvwa Nzambì to.

⁹⁵ Nudi bamanyè cidi mwakù *kàyi ne mikàlù* wùmvwija anyi? Tàngilàayi. . .tàngilàayi mu nkòngamyakù nùsanganè cidi mwakù *kàyi ne mikàlù* wùmvwija. Mòna’s, Yéyè’s ùvwa mumanyè nkùpà yònsò uvwakù mwà kwikala pa buloba apa, lujijji lwònsò, kajijijijji kònsò, kishi kònsò. Ùvwa mukàmanyè kumpàlà mene kwà kòkò kufika ku diikalakù, bwà cyanààna Kàvwa Nzambì to. Ncyà bushùwà ne, Ùvwa mukàmanyè. Èyo.

⁹⁶ Dìbà adi, mwómò amu, Nzambì kàvwakù—kàvwakù mufwànyine kwamba ne: “Nènkwangàtè *wèwè*, nkutùmè mu ifernò; ne Nènkwangàtè *wèwè*, nkutùmè mu Dyulu” to. Nzambì ùvwa muswè bwà nwènù bònsò bàbìdì nùye mu Dyulu. Kàdi ku didyànjila-kumanya Yéyè ùvwa mumanyè ne umwe neikalè mwenji wa maalu makònyàngàle, ne mukwàbò neikalè muntu mukàlàngà ne mwena Kìlistò. Nwamònu anyi? Ki bwà cinyi byàkakèngela Àtumè Yesù bwà àfwe, bwà àsungile muntu uvwaYè mudyànjile kumanya ne ùvwa muswè kusùngidiibwa awu. Nwacyùmvù anyi?

Mpindyewu tàngilàayi apa:

Kakùyì mpatà to Mifùndù yidi yìtwàmbila ne aba mbìikalà kabàyi mwà kusùngidiibwa.

55. Pa nànkù pùikalàbi ne difùta dyà cibawu òvwa dibwikile bònsò bàà . . . bònsò bàà ndelàngànyì yà Adàmà, ne bamwè bààkajìmina bwalu kabàvwa bóbò biinè bakwàte mudimu ne mulayi, anyi civwà cidyànjila kulongolola aci, kabivwakù bifwànyine . . .bukol- . . .budìshikaminyi . . .nebwikalè mwà . . .neciikalè bukolè butàmbe mpàngù yà Cyendèlèlè ne twipàcìlà twà Nzambì wa Bukolè bwònsò ku bukolè anyi? Ncifwànyine kwikala . . . (Muntu ewu mpindyewu, mu lukonko lwibìdì elu, ngudi ukonka ewu.) **Didìsungwila dyà muntu kadyàkwikala dikolè kutàmbe mpàngù yà Cyendèlèlè ne kiipàcìlà kàà Nzambì wa Bukolè bwònsò ku bukolè anyi?**

⁹⁷ To, mwanèètù wa balùme anyi wa bakàji. Nànsha kakesè! Kakwènakù cintu nànsha cìmwè citàmbe bukolè. . .Diswa dyà muntu kì ndifwànyinèkù kufwànyikijiiibwa ne—ne kiipàcìlà kàà Cyendèlèlè kàà dipàngadika dyà Nzambì to. Nànsha bìshi, nwamònu’s.

⁹⁸ Mpindyewu, lukonko lwèbè lwà kumpàla lùvwa mu lwòlò. Lukonko lwèbè lwibìdì kì ndufwànyine kwikala mu lwòlò

to, mulundà wanyì. Bwalu tàngilà, tàngilà mùshindù wùdilu lufundìibwe mwab'ewu, wamònu's: "Didisungwila dyà muntu kadyàkwikala dikolè kutàmba mpàngù yà Cyendèlèlè ne kiipàcìlà kàà Nzambi wa Bukolè bwònsò ku bukolè anyi?" Mòna's, nànsha kakesè. Mmunyi mùdiku diswa dyà muntu difwànyine kwikala dikolè kutàmba mpàngù yà Cyendèlèlè ne kiipàcìlà kàà Nzambi wa Bukolè bwònsò ku bukolè? Ne muntu mu ngiikàdilù wendè wa musunya awu bwà kuswa cidìye muswè, ciikàle ne bukolè kutàmba cidì Nzambi wa Cyendèlèlè, mupwàngàne awu cifwànyine kwikala anyi? Nànsha kakesè! Kacyèna mwà kwenzekakù to, wamònu's. Nzambi wa Cyendèlèlè, Mwena kiipàcìlà kàdi kapwàngàne awu, mmunyi mùdiku mwà kwamba ne muntu wetù wa—wa musunya ewu pànwapa apa, nànsha mwikàle mwakàne (ne yèyè mmufwànyine kwikala mwakàne bishi), twèndè twipàcìlà kì ntufwànyinekù kufwànyikijiibwa ne eci: kii—kiipàcìlà kàà Nzambi wa Cyendèlèlè ne wa Bukolè bwònsò to.

⁹⁹ [Mwanèètu wa bakàjì kampàndà ùdi wàkwila mu disangisha amu—Muf.] Èyowà. ["Mfwilèku luse. Mvwa muswè ànu kwelakù lukonko cyanààna, kàdi—kàdi wèwè ngudi umvwa bibi cìndi njinga kwamba mwaba awu."] Èyowà, èyo, mwanèètu wa bakàjì. ["Mémè ncyèna ngiitabuujakù aci to nànsha kakesè, mvwa njinga kwamba ne 'kiipàcìlà kàà Cyendèlèlè kàà Nzambi kàdi kadyatakaja didisungwila dyà muntu.'"]

¹⁰⁰ Aci ncyà bushùwà. Kaa, èè, nàнку mémè—mémè ngudi mucibalè bibi, wamònu's. Èyo. Èyowà, nàнку wèwè udi mubingè ànu menemene, mwanèètu wa bakàjì. Nciwva mumanyè ne lukonko lùvwà lwèbè—lwèbè wèwè to. Èyo. Kàdi, wamònu's, mwaba wùngàlwàngàcìdi kaaba aka, wamònu's, . . . Mpindyewu lekèlèbi ngànjì mmonè: "Kubwikila ndelànganyi yònsò yà Adàmà, ne bàmwè bààkajìmina bwalu bòbò biinè—bòbò biinè kabààkakwàta mudimu ne cìvwà cidyanjila kulongolola to, didisungwila dyà muntu kì ndifwànyine kwikala dikolè kutàmba mpàngù yà Cyendèlèlè ne kiipàcìlà kàà Nzambi wa Bukolè bwònsò ku bukolè anyi?" Wamònu's, mémè—mémè nguvwa muumvwije meeji èbè bibi mwab'awu. Èyowà, kiipàcìlà kàà Cyendèlèlè kàà Nzambi wa Bukolè bwònsò. Èè, aci's ncikòse bwalu.

¹⁰¹ Ngeela meeji ne bantu bònsò mbumvwè aci. Panwikalà buumvwè, elàayi byanza muulu. Cìdi—cìdi nkiipàcìlà kàà Cyendèlèlè kàà Nzambi wa Bukolè bwònsò, kàdi cyà bushùwà kafwànyine kutàmba kule ne kule—kule ne kule cidì muntu mufwànyine kwenza.

Mpindyewu:

56. Ncyèna ngumvwa bukènkè pa dibàtiiza dyà mu màyi to, mu nshapità wa 28 wa . . . mvensà wa 19, wa Maatàayi. Nciswè kwamba cinyi?

¹⁰² Èè, mpindyewu, pàmwăpa necingangàtè ànu kasunsa kàmwè cyanààna. Nènku muntu àbuululèku pàmwè naanyi bu nwènu mwà kuswà, mu Maataàyi, nshapitá wa 28, ku mvensà wa 19. Nènku netùjandùlè, ànu cìdì muntu ewu. . . makùmi àbidì ne itaanu. . . Mpindyewu, Eci necinùpèèshè dikàndà bu nwènu mwà kushàala naaCì. Cìdì—Cìdì cìmpè, nudi numòna's. Kì nCyà butangadiki to, kàdì Cìdì. . .

¹⁰³ Mpindyewu tudi. . . Mpindyewu apu ki pàdì bantu bàteeta kwamba ne: “Kùdì dibèngangana dyà mèyi mu Bible.” Mpindyewu, ndi muswèku bwà muntu àbuululè mu. . . ne Maataàyi 28.19. Anyì, to, ndi muswè bwà muntu. . . Maataàyi 28.19. Ndi muswèku bwà muntu àbuululè mu Byenzedi 2.38. Udi ne Bible webè mwaba awu anyi, Mwanèètù Neville?

¹⁰⁴ Nènku ndi muswè bwà nùdibadilè nwènu biine mpindyewu. “Kàdì mèmè nènkuleepè dibèngangana dyà mèyi dyà pyòpyopyò mu Bible. Ne cìdì—cìdì Bible. . . Bantu bàtu bàmba ne 'Bible kèna ne Mèyi àbèngangana to.' Ndi muswè bwà wàngatè eci ne mushinga.”

¹⁰⁵ Nènku eci ncìdì citòlweshà balongeshi mvya. Kàdì nCi—nCipeepele's. Mpindyewu nèmbalè Maataàyi 28.19, nwènu ndondàayi. Ne bàmwè bàà kunùdì ne Byenzedi 2.38, bìikalè nendè pabwìpi. Nèmbangilè ku mvensà wa 18, ewu nshapitá wa ndekeelu wa Maataàyi:

Nènku Yesù wàkalwa ne wàkaakula ne bayiidi bènd-. . . wàkaakula naabò, wàmba ne: Bukòòkeshi bwònsò mbumpèèsha mu dyulu ne pa buloba. (bukòòkeshi bwà Taatù bùdì penyi?)

¹⁰⁶ Pìikalàbì ne bukòòkeshi bwònsò mu Dyulu ne pa buloba mbupèèsha Yesù, díbà adi Nzambi's mmushàale kàyi ne bukòòkeshi, kì mmwòmò anyi? Anyì cìdì ànu mashimi Yèyè mwambè? Cìvwa mbilèlè Wèla anyi? Úvwa ùCyàmbilamù anyi? Kanwènaayikù nwitabuujá ne Úvwa ùCyàmbilamù anyi? Èè, pìikalàbì ne bukòòkeshi bwònsò mbuMupèèsha Yèyè, bukòòkeshi bwà Nzambi bùdì penyi díbà adi? Yèyè's nguvwa Nzambi! Mmwòmò. Ki cintu cìmwèpelè cidìku pa bwalu abu ncyòcì aci. Ki cyònsò cìvwàku ncyòcì aci. Nwamònu's, Yèyè nguvwa Nzambi; anyì kùvwa muntu kampànda musòmbe mwaba awu, uvwa ne bukòòkeshi cyà bushùwà, kàdì kàciyi kàbidì naabù to. Nwamònu anyi? Pa nànkù kwèna mwà—kwèna mwà kuCìbwejakaja nànsha. Netùbwejè aci buludì pa cintu cìmwècìmwè eci. Èyo:

. . . Bukòòkeshi bwònsò mu dyulu ne pa buloba bùdì. . . mu dyulu ne pa buloba.

Ndàayaaku, . . . nùkalongèshè bàà matùnga ònsò, nubàbàtiza mu dìnà dyà Taatù, ne dyà Mwanà, ne dyà Nyumà Mwimpè,

nubàlongesha bwà kuneemekela bintu byònsò bìndì munùtùmìne díyì abi; . . . mònaayi, Ndi neenu misangu yònsò, nànsha too ne ku ndekeelu kwà buloba mene.

107 Byenzedi 2.38, mpindyewu muntu àbalè. Anjì indilàayi kakesè. Byenzedi, nshapità mwi2, mvensà wa 38. Mpindyewu, tèèlejàayi ne ntèmà yònsò mpindyewu, ne ikàlaayi ànu ne lutùlù, nènku netùmonè mpindyewu. Mpindyewu, apa mmatùkù dikùmì paanyimà pàà Yesù mumanè kubàmbila mpindyewu, Maataayi 28.19 ne: “Ndàayaaku, nùkalongeshè bàà mu matùnga ònsò, nubàbàtiiza mu dìnà dyà Taatù, dyà Mwànà, ne dyà Nyumà Mwímpè.”

108 Mpindyewu, Peetèlò, matùkù dikùmì paanyimà. . . Bòbò kabàakayiishakù dikwàbò diyiisha to. Bàakabànda mu cibambalu cyà kuulu cyà mu Yelusàlèmà, ne bàakindilamù (munda mwà matùkù dikùmì) bwà Nyumà Mwímpè kulwaYè. Mbanganyì bàdì bamanyè nànkù? Mu kaaba aka. Ki Peetèlò nyèyè ewu, Peetèlò ngudi ne nsapì yà Bukalenge. Èyo, netùmonè cidiye wènza. Maataayi, anyì ndi njinga kwamba Byenzedi 2, twàngatàayi mvensà wa 36.

Ki bwà cinyi nzubu mujimà wa Izalèlèlè àmanyè ne ditwishiiibwa dyònsò ne, Nzambì wàmanyì kuvwiya Yesù umwèumwè ewu, unùdi nwènù. . . bapoopèle ku nkùrusè awu, byònsò bìbidì Mukalenge ne Kilistò.

“Byònsò bìbidì Mukalenge ne Kilistò.” Kabyèna bìkèmesha to, mùvwà bukòokeshi bwònsò mu maulu ne pa buloba buMupèsha Yèyè.

Mpindyewu pàakumvwàbo cyòci eci, bàakalengiibwa bikolè mu myoyi yàbò, ne bàakambila Peetèlò ne. . . bapostolò bakwàbò abu ne: Balumyànà ne bânà bèètù, netwènzè cinyi?

Peetèlò wàkandamuna. . . Peetèlò wàkabàmbila ne: Nyingàlalaayi, yònsò wa kunùdi, ne bàtijiibwàyi mu dìnà dyà Yesù Kilistò bwà dilekelediibwa dyà mpèkaatù yènù, nènku nenùpetè kupà kwà Nyumà Mwímpè.

109 Mpindewu, kùdi dibèngangana dyà mèyi, Maataayi mwambè ne: “Nùbatiizè mu Dìnà: Taatù, Mwànà, Nyumà Mwímpè,” kàdi Peetèlò mwambè mu Byenzedi 2.38, matùkù dikùmì paanyimà ne: “Nyingàlalaayi, nùbatiijiibwè mu Dìnà dyà Yesù Kilistò.”

110 Pashiishe musangu wàkalondà wùvwà kanyinganyinga katèèdiibwe—katèèdiibwe, anyì, dibàtiiza, mu Bible, mmu Byenzedi nshapità wa—wa 8, pàakayà Filipò kayiisha kùdì. . . kùdì—kùdì beena Sàmaalèyà. Ne bòbò bàakapeta Nyumà Mwímpè, ne bàakabàtijiibwa mu Dìnà dyà Yesù Kilistò.

111 Musangu wàkalondà wàkatèèdiibwàci, mpààkaMupetà bàà Bisàmbà byà bendè, mu Byenzedi 10.49:

Ne pàcìvwà ànu Peetèlò . . . wàmba mēyì aa, mōnaayi, Nyumà Mwîmpè wàkatuùluka pambidi . . . pààbò . . . ne bààkabùmvwa.

Bwalu bààkabùmvwa bààkula mu myakulu, ne bàtùmbisha Nzambì. Pashùshe Peetèlò kwambayè ne:

Muntu ùdikù mwà kukàndika mâyì, pa kumòna ne aba . . . bààpèci Nyumà Mwîmpè mutwàkapetà twètù ku cibangidilu amu anyi?

Nènku wàkabàtùmina dīyì bwà kubàtīijībwbò mu dīnà dyà Mukalenge Yesù Kilistò.

¹¹² Mpindyewu ngāñjì kwangatakù cintu kampànda kaaba aka, nnùleejè ànu kantu kakesè cyanààna bwà kanùlu kicìpwa mwoyi to; nēngīikalè mwà kwenza kaacifwānyikijilu kakesè. Nēngīikalè mwà kutèeka . . . Mbūngi kaayì bwà nkòng- . . . bisàmbà byà bantu bìdì pa buloba? Bìdikù bisàtù: Beena Ham, beena Sem, ne beena Yafètè. Mbanganyì bàdì bamanyè nānku awu? Tudi bafūmine ku bānà bàsàtù bàà Noà abu. Beena Ham, beena Sem . . . Beena Yafètè mba-Anglo-Saxons, beena Sem mba- . . . Nkòngò yīsàtù ayi, yìdì: Beena Yūdà, bàà Bisàmbà byà bendè, ne bàdì ndambù beena Yūdà ne ndambù bàà Bisàmbà byà bendè. Mpindyewu, mōnaayi, pāv̀wàku . . . ne ewu n’Ham . . . Sem, Ham, ne Yafètè.

¹¹³ Mpindyewu, musangu wà kumpàlà wùvwàku dibàtīiza ditèèdiibwe, dyàkatèèdiibwa kùdì Yone Mubàtīiji. Mbanganyì bàdì bamanyè ne aci ncilelèlè? Èyo, nēngīikalè mwà kucitèeka apa nūnku, lwà apa nūnku, Yone Mubàtīiji. Nènku Yone wàkabàtīiza bantu mu musùlù wà Yadènè, ùbàtùmina dīyì bwà ne bivwa bikèngela bānyingalalè ne bàdìlongòlòlè kumpàlà kwà Nzambì, ne bàsumbishè bintu byàbò, ne bàdiishè bapèlè, ne bwà bàsàlaayi bìikalè ne disānkà bwà difutu dyàbò, ne bàdìlongòlòlè kumpàlà kwà Nzambì. Mbanganyì bàdì bamanyè nānku awu? Ne wàkabàbàtīiza mu musùlù wà Yadènè, kàyì ùbām̄yamina, kàyì ùbàpòngolwela mâyì mu mutù to, kàdì ùbīnyijamù! Wèwè kùyì uCīitabuuja to, nkòngamyakù nyéyè ewu, ùjandulèbì ní kacỳèna baptizo, cìdì cyùmvwijà ne, “kubàtīiza, mwinyijībwe, mwela mwīnshì, mujiika.” Mpindyewu, musangu wà kumpàlà wàkatèèdiibwà dibàtīiza, pāv̀wa mpòpò apu.

¹¹⁴ Musangu mwibìdì wàkatèèdiibwàku dibàtīiza, Yesù wàkatùmangana ne mudimu wà kudyènza, mu Maatàayi 28.19.

¹¹⁵ Musangu wàkalondà wàkatèèdiibwà dibàtīiza, mùvwà mmu Byenzedi 2.38.

¹¹⁶ Musangu wàkalondà wàkatèèdiibwà dibàtīiza, mùvwà mmu nshapità wa 8 wa Byenzedi.

¹¹⁷ Musangu wàkalondà wàkatèèdiibwà dibàtīiza, mùvwà mmu nshapità wa—wa 10 wa Byenzedi.

118 Nènku dîbà adi tudi buumùkile ku cikondo cyàkambà Yesù, kaaba aka ne: “Ndààyaaku, nukayiishè bàà mu matungà ònsò, nubàbàtiiza mu Dîna dyà Taatù, ne Mwànà, Nyumà Mwímpè.”

119 Mpindyewu, dyàmbedi twánjàayi kwolola Mufùndu ewu. Mémè ngánwãmbidì ne “kakwèna Mufùndù nànsha wùmwè mu Bible wikalà mwà kubèngangana ne mukwàbò to.” Ndi muswè nùwùntwàdilé. Nkàadi mulòmbèlòmbè cyòci aci kùkaadi bidimu makùmi àbidi ne bisambòmbò, kàdi ncyèna mwanji kuwùpeta to. Kakwènakù Mufùndù wùdi wùbèngangan-... Wòwò wùbèngangana naaWù, dîbà adi ncintu cyà muntu mudifùndile. To, mukalengè, kakwèna dibèngangana dyà mèyi mu Bible to!

120 Nènku wèwè wamba eci ne: “Bishi bwà aci?”

121 Ki Yesù nyewù mwimàne wamba ne: “Ndààyaaku, nukayiishè bàà mu matungà ònsò, nubàbàtiiza mu Dîna dyà Taatù, Mwànà, Nyumà Mwímpè.”

122 Dyà Petèèlò ùkùdimuka, kàdi kwambayè ne: “Nyingàlalaayi, yònsò wa kunùdi, nùbatiijibwè mu Dîna dyà Yesù Kilistò.”

123 “Dibèngangana dyènù dyà mèyi’s ki dyòdi adi.” Ndyenzè ànu bu dyòdi’s. Mpindyewu pawikala ubala ne meeji a musunya, kùyi ubala ne mwoyi muunzulula to, neciikalè dibèngangana dyà mèyi.

124 Kàdi wèwè uCibala ne meeji muunzulula: “Nyumà Mwímpè mmusokòke eci ku mèsù a beena meeji ne batàlame,” ki mwàkambà Yesù, ne kusàkidila Nzambi bwà bwalu abu, “ne muCibuulwile bânà bàà mu mabòkò bu mùdi bàdi baswè kuyiila.” Wèwè ne meeji kampànda, kaayi meeji a budìsu to, kàdi mwoyi wà muswè kuyiila, Nyumà Mwímpè neàkulongeshè bintu ebi.

125 Mpindyewu cyòci kaciyi cìpetangana...Wèwè wambi ne: “Wàmanyi wèwè mùdi mu bulelèlè munyi?” Èè, s’cidi cìpetangana ne Mifundu mikwàbò yònsò. Kabiya nàнку to, udi ne dibèngangana dyà mèyi dyà buludì mwab’ewu.

126 Mpindyewu ndi muswè nkwelèku lukonko. Ewu nnshapità wa ndekeelu wa Maataayi. Nèncyàngatè mu mùshindù wà mukesè, bwà yònsò wa kunùdi...bânà bààmòna mwà kuCyùmvwà.

127 Cileejilu, wèwè ubala bwalu-bulonda bwà mananga, ne nkomenu wabù wamba ne: “Nènku Màriyà ne Yone bààkashààla mu disànka kashidi pashiishe.” Èè, udi udìkonka ne Màriyà ne Yone bààkashààla mu disànka kashidi pashiishe abu bàvwa mbanganyi. Mpindyewu, wèwè muswè kumanya ne Yone ne Màriyà abu mbanganyi, s’bìvwa bitàmbe bwímpè bu wèwè mwà kwalukila ku ntwàdijilu kwà mukànda awu bwà kujandula ne Yone ne Màriyà abu bàvwa mbanganyi. Dîbà adi kwalukila apa ne kujandula ne Màriyà awu ùvwa nganyi, ne ùvwa

mufùmìne mu fàmiyè kaayi; ne Yone awu ùvwa nganyì, ne ùvwa mufùmìne mu fàmiyè kaayi, ne cìvwa dìnà dyèndè adi, ne mwàkasèlanganàbo, ne byònsò abi. Mmwômò anyi?

¹²⁸ Èè, ncintu ànu cìmwècìmwè aci mu kubala kwà Bible ewu. Pàvwà. . . Tàngilàayi, kacya Yesù kàvwaakù mwambè ne: “Ndàayi nùkabàtiizè bantu mu dìnà dyà Taatù, mu dìnà dyà Mwànà, mu dìnà dyà Nyumà Mwìmpè,” mùshindù wùdi batriitaires bàbàtiiza awu to. Kakwènakù Mufùndù nànsha wùmwe bwa aci mu Bible to. Yèyè kàakambakù ne: “Mu mènà (m-è-n-à), mènà” dyà Taatù, Mwànà, ne Nyumà Mwìmpè to.

¹²⁹ Yèyè wàkamba ne: “Mu (d-ì-n-à) dìnà,” ku bùmwe. Tàngilàbi mu Bible webè amu ní kwàkusangana ne ncyà bushùwà, Maatàayi 28 ne: “Mu *Dìnà*.”

¹³⁰ Kí m’ “mu dìnà dyà Taatù, mu dìnà dyà Mwànà, . . .” to, awu mmùshindù wùdi muiishi wa nzambi yisàtù ùbàtiiza. “Mu dìnà dyà Taatù, mu dìnà dyà Mwànà, ne mu dìnà dyà Nyumà Mwìmpè.” Aci kaciyèna nànsha mene mu Bible to.

¹³¹ “Dìbà adi mu dìnà. . .” Udi wèwè wamba ne: “Èè, dìbà adi mu dìnà dyà ‘Taatu, Mwànà, ne Nyumà Mwìmpè.’” Dìbà adi’s kùdi Dìnà kampànda muntwamu.

¹³² Èè, *taatù* ndìnà anyi? Mbanganyi bàdi bamanyè ne *taatù* kí ndìnà? *Taatù* mmwànzu. *Mwànà* kí ndìnà to. Mbanganyi bàdi bamanyè ne *mwànà* kí ndìnà? Mbanganyi bàdi baataatù kaaba aka? Elà cianza muulu. Mbanganyi bàdi bânà kaaba aka? Elàayi byanza muulu. Èè, nganyì wa kunùdi udikù mwinyikiibwe dìnà ne “Mwànà”? Nganyì wa kunùdi udikù mwinyikiibwe dìnà ne “Taatu”? Èyo, *Nyumà Mwìmpè* kí ndìnà to, *Nyumà Mwìmpè* ncidiYe. Mbanganyi bàdi bantu kaaba aka? Elàayi cianza muulu. Nwamònu anyi? Ki bwalu mbwòbù abu’s, *Nyumà Mwìmpè* ncidiYe. *Taatù*, *Mwànà*, ne *Nyumà Mwìmpè*, nànsha cìmwè cyà ku byòbi abi kaciyèna dìnà to, kamwèna dìnà to.

¹³³ Èè, dìbà adi, pìikalàbi ne Yèyè mmwambè ne: “Nùbatiizè mu dìnà dyà Taatù, Mwànà ne Nyumà Mwìmpè,” s’bìvwa bìmpè twètù kwalukila bwà kujandula ne Taatù, Mwànà, ne Nyumà Mwìmpè Nganyi. Dìbà adi tùbuululàayaaku mu nshapità wa kumpàla wa Maatàayi, bwà tùmone ne Muntu mwinè mwena Dìnà ditùdi ne cyà kubàtiizanganamù ewu Nganyi. Nènku tudi tubanga ne Maatàayi mpindyewu, nshapità wa kumpàla, ku mvensà wa 18. Balàayi ne ntèmà, nwènù bònsò.

¹³⁴ Mpindyewu, wèwè udi mwelè lukonko elu awu, ndi muswè kufila kaacifwànyikijilu kakesè kaaba aka. Mpindyewu nêntèekè bintu bisàtù kaaba aka bwà wamòna mwà kuumvwa bitòoke tòò, (kufila kaacifwànyikijilu) Bibles eyi ne mikàndà, bwà kufila kaacifwànyikijilu.

¹³⁵ Èyo, ndi muswè nùntàngilè ne ntèmà, ne muntu yònsò àndondè mpindyewu. Mpindyewu, *eci* nùnkù n’Nzambi Taatù. *Eci* nùnkù n’Nzambi Mwànà. *Eci* nùnkù n’Nzambi Nyumà

Mwîmpè. Mpindyewu, mbanganyi bàdi bûmvwè? Cyâmbàayi paanyimà pàanyi. Nganyi udi kwinshi *eku ewu*? [Disangisha didi dyâmba ne: “Nyumà Mwîmpè.”—Muf.] Nyumà Mwîmpè. Nganyi udi lwà kuulu *eku ewu*? [“Taatù.”] Nganyi udi *apa ewu*? [“Mwânà.”] Mpindyewu, mûshindù awu ki wùdi ba-trinitaires bàcìitabuujà. Nwamònu’s, aci cìdi cìtùvwija bampàngaanù, ànu bajimà ne bujimà bwònsò.

¹³⁶ Mwena Yudà; ki bwà cinyi kwèna mwà kwenza cintu nànsha cîmwè ne mwena Yudà to. Wàkamba ne: “Kanwèna mwà kukòsolola Nzambì mu bitùpà bisàtù kàdi kuMupèèsha mwena Yudà to.” Kàdi, nànsha kakesè, nànsha mèmè pàanyi kwèna mwà kucingenzela to. Nwamònu anyi? To, mukalenge. Yèyè ùdi Nzambì umwèpelè. Aci ki menemene. Kí n’Nzambì yìsàtù to. Mpindyewu mònaayi mùdi—mùdi—mùdiCi cipeepèle.

¹³⁷ Mpindyewu netùjandulè. Mpindyewu, nganyi udi... *Ewu* Nganyi? Muntu ànbèku ne díyì dikolè mpindyewu. Nzambì Mwânà. Mmwómò anyi? *Ewu* m’Mwânà. Èè, pashìshe Tatw’Èndè n’Nzambì. Mmwómò anyi? Mbanganyi bàdi bìitabuujà ne Tatw’Èndè n’Nzambì? Elàayi cyanza muulu. Mbanganyi bàdi bìitabuujà ne Nzambì n’Tatw’Èndè wa Yesù Kilistò? Èyo.

Mpindyewu dilediibwa dyà Yesù Kilistò dyàkenzeka mûshindù ewu: . . .

¹³⁸ Mpindyewu tudi twalukila bwà kujandula ne Taatù, Mwânà, ne Nyumà Mwîmpè Nganyi, udi Maatàayi mwambè ne “nùbatiizè mu Dîna dyà” awu. Nwamònu’s, Dîna; mpindyewu kí mmènà to, bwalu kaèna mwà kwikala mènà to, bwalu kapèèna dîna nànsha òmwè mwaba awu to.

Mpindyewu dilediibwa dyà Yesù Kilistò dyàkenzeka mûshindù ewu: Pàvwà...mamwèndè Màriyà mubangila kùdi Yòzefù, kumpàlà kwà kabàyi banjì kulwa kaaba kàmwè, yèyè wàkasanganyiibwa ne difù dyà kùdi Nzambì Taatù. (Aci ki cìdi Bible wàmba anyi? Cìdi Bible wàmba ncinyi?)...wàkasanganyiibwa ne difù dyà kùdi Nyumà Mwîmpè.

¹³⁹ Dìbà adi ngwepì wa ku bóbò *aba* udi Tatw’Èndè? Mpindyewu, Bible nyawù mwambè ne *ewu* n’Tatw’Èndè, kàdi Yesù mwambè ne *ewu* nguvwa Tatw’Èndè. Mpindyewu, udi Tatw’Èndè mwab’awu kí Wepì? Mpindyewu, pìikalàbi ne Yèyè ùvwa ne baataatù bàbidì, mpindyewu bwalu bùdi cinyi? Pìikalàbi ne Yèyè ùvwa ne baataatù bàbidì, Yèyè’s mmwânà mulela mu masandi.

¹⁴⁰ Mpindyewu twánjàayi kutùngunuka ne kubala kumpàlà aku ndambù:

Pashìshe bàyendè Yòzefù, bu mùvwàye muntu mululàme, kàvwà muswè kumufwisha bundù kumpàlà

kwà bantu to, kàdi wàkela meeji bwà kumubènga mu musokoko.

Kàdi pàcìwàye wèlangana meeji pa maalu aa, mònanyi, mwanjèlò wa Mukalenge wàkamumwènekela mu cilòdà, wàmba ne: Yòzefu, wèwè mwànà wa Davidi, kùcìnnyi bwà kwangata Màriyà mukàjèèbè pàmwè neebè to, bwalu cidiye mwimite munda mwèndè aci ncyà kùdì. . . [Disangisha didi dyàmba ne: “Nyumà Mwímpè.”—Muf.]

141 *Cinyi aci? Nyumà Mwímpè? Èè, mmunyi mùdi Taatù mwà kwikala tatw'Èndè, ne Nyumà Mwímpè mwà kwikala Taatw'Èndè musangu wùmwèwùmwè awu? Mpindyewu, Yèyè's ùvwa ne baataatù bàbidi dîbà adi, pùkalàbi ne aci ncyà bushùwà. To, mukalenge! Nyumà Mwímpè ÛDI Nzambi. Nyumà Mwímpè ÛDI NZAMBÌ. Pa nànkù Nzambi ne Nyumà Mwímpè bàdi Mupèsonà umwèumwè awu, bwà cyanààna Yèyè ùvwa ne baataatù bàbidi.*

142 *Nwamònu's, twàjandùlù ne Yone ne Màriyà mbanganyi, paanyimà pàa katanci. Èyo, twàjandùlù Peetèlò ne Maatàayi ní bàvwa bàteeta kwamba mèyi àbèngangana anyi to, kumòna Mifùndù ní Yidi yàmba mèyi àbèngangana. Ndi-panga dyà luumvu lwà nyumà. Ncyà bushùwà.*

Kàdi pàcìwàye wèlangana meeji pa maalu aa. . .

143 *Nkàadi mubalè awu, mvensà wa 20 awu. Mpindyewu wa 21:*

Ne yèyè neàlèlè mwànà wa balùme, . . . (Mupèsonà ewu, ùvwa ngwèpi ku bóbò aba? Mupèsonà umwèpelè, Nzambi.) . . . ne wèwè newikalè mwà kubùkila dìnà dyèndè ne. . . (Nganyi?) [Disangisha didi dyàndamuna ne: “YESÙ”—Muf.] . . . bwalu yèyè ki wasùngila bantu bèndè ku mpèkaatù yàbò.

. . . byònsò ebi byàkenzeka, bwà. . . cyàkambilà Mukalenge ku mupròfètà cyàmòna mwà kuula, wàmba ne:

Mònanyi, nsongàakàji virgò neimite difu, ne neàlèlè mwànà wa balùme, ne nebàbùkilelè dìnà Dyèndè ne Èmanùwèlè, . . . ku dyumvwija ne, Nzambi neetu.

144 *Pa nànkù Yone ne Màriyà bàvwa mbanganyi bàakasòmba kashidi ne disànka pashùshe? Nganyi Uvwa mwambè ne: “Ndàayaaku, nùkalongèshè bàà mu matùngà ònsò, nùbàbàtiiza mu dìnà dyà Taatù, Mwànà, Nyumà Mwímpè” awu? Taatù ùvwa nganyi? Dìnà dyà Taatù, Mwànà, Nyumà Mwímpè ùvwa ndìnà kaayi? [Muntu ùdi wàmba ne: “Yesù.”—Muf.] Cyà bushùwà, ùvwa nDyòdì. Bushùwà, kakwèna dibèngangana dyà mèyi apu to. Nànsha dikesè. Cidi ànu cyòlola Mufùndu awu's. Yèyè ngùvwa Taatù, Mwànà, ne Nyumà Mwímpè. Nzambi ùvwa (Èmanùwèlè)*

musòmbèle munkaci mwètù, mwelè nntentà mu mubidi wà wùbiikidiibwa ne “Yesù.”

145 Mpindyewu, dilongesha dyà bùmwè dyà èkèleeziyà wa beena Bùmwè, ncyà bushùwà ne mémè ndi mbèngangana ne naadi, bèèla meeji ne Yesù ùdi umwe ànu mùdi munu wèbè wùmwè amu. Ùvwa ne cyà kwikala ne taatù. Yéyè kàyi nendè to, mmunyi mùvwàYè mwà kwikala taatù Wendè Yéyè mwinè? Ne piikalàbi ne Tatw’Èndè ùvwa muntu mùdi ba-Trinitaires bàmba amu, dibà adi Yéyè’s wàkalediibwa ku dilediibwa dyà mu masandi mwikàle ne baataatù bàbìdi. Pa nàнку, nudi numòna’s, bubìdi bwènù nudi bapàile pa kukòkangana. Nwamònu anyi?

146 Kàdi Bulelèlà bwà bwalu bùdi ne, bònsò abu Taatù, Mwàna, ne Nyàmà Mwimpè, bàdi Mupersonà umwèpelè. [Katùpà kàà mukàbà wà mèyi munda mutupù—Muf.] . . . wa musòmbèle mu nntentà wa mubidi, bwà kuumusha mpèkaatù wa bàà pa buloba. Aci ncyà bushùwà menemene ne: “Nzambì neetù.” Mpindyewu, ki bwà cinyi, pàvwà Maataàyì 28.19. . .

147 Mpindyewu, kenkètaayi Mifundu, ne panwikalà mwà kupeta mwaba wùdi muntu nànsha umwèpelè mu Bible. . . (Mpindyewu elàngànaayi meeji ku bwalu abu, mpindyewu kanùlekedì eci cinùpicila pamutù to.) . . .mwaba wùdiku muntu nànsha umwèpelè mu Bible kacya mubàtijiibwe mu dìnà dyà “Taatù,” ne “Mwàna,” ne “Nyàmà Mwimpè,” alùkilà kùndi ùngambila mùndi mwena lubombo, nènku nénditèèkè cimanyinu paanyimà apa ngèndè ntwà eku ne eku mu cimenga emu. Kacyèna mu Mifundu to, kuumukila ànu ku Genèsè too ne ku Bwàkabuulwibwà. Kàdi muntu yònsò mu Bible wàkabàtijiibwa mu Dìnà dyà Yesù Kilistò!

148 Wèwè udi wamba ne: “Indilà kakesè, muyiishi. Kàdi bìshi bwà Yone? Kààkabàtiziakù mu dìnà nànsha dimwè to!”

149 Èyo, s’tudi tujandula cyàkenzekà; tùbuululàayi mu—mu—mu Byenzedi, nshapità wa 19. Amu mmutùdi tusangana bayiidi bàà Yone. Muntu ne muntu wàkabàtijiibwa mu Dìnà dyà Yesù Kilistò, too ne mutùdi mpindyewu tulwa kupeta musùmbà ewu kaaba aka. Byenzedi, nshapità wa 19. Nènku tùbangàayaaku kubala mpindyewu, nènku nyewù tupeta bayiidi bàà Yone:

Nènku byàkenzeka ne, . . . pàvwà Apòlò (yéyè ùvwa mwakwidyanganyi, mukùdimùne mucima awu) ùsanganyiiibwa ku Kolintò, Pòlò mumanè kupicila mu nseke mitùmbùke yà . . . Efèsò: ùdi ùsangana bayiidi kampànda, (bàvwa bayiidi bàà Yesù)

150 Bu nwènù ànu mwà kwikala bamòne nshapità udi mudyànjidile awu, bàvwa munkaci mwà kupicila mu cikondo cyà dicyònkòmoka mu mùshindù wà bèèla mbilà bàcyònkòmoka. Mbanganyi bàdi bamanyè ne aci ncilèlèlà? Nènku Akùlà ne Piisikilà bàvwa balwè mu disangisha adi. Kàdi Pòlò ne Siilà bàvwa batuuciibwe ne beediibwe mfimbù, ne beediibwe

mu bulokò. Mmwômò anyì? Nènku bàakalwa kaaba aka, ne bàakasangana Akùlà ne Piisikilà. Nènku bàvwa bènza ditàbuluja kuntwaku kùdì muyiishi kampànda wa ba-Baptistes, dìnà dyèndè Apòlò, uvwa ujaadikilangana ku Mifundu ne “Yesù ùvwa Kilistò.” Mpindyewu Pòlò ùdì ùmusangana:

... *Pòlò mumanè kupicila mu nseke mitùmbùke yà . . .
Efèsò, . . . ùdì ùsangana bayiidi kampànda,
Yèyè wàkabàmbila ne: Nukàadi bapetè Nyumà
Mwîmpè kacya nwítabuujà anyì? . . .*

¹⁵¹ Mpindyewu, wèwè mulunda wanyì munanga Baptiste, aci cyòci kaciyikù cyùpula bi—bipànda byà teòlòjì *wenù* awu to, panwàkambà ne “nwàkapeta Nyumà Mwîmpè panwàkiiitabuujà” apu.

¹⁵² Kàdi Pòlò yèyè ùvwa muswè kukonka ba-Baptistes aba ne: “Nukàadikù bapetè Nyumà Mwîmpè *kacya* nwítabuujà anyì?” Mpindyewu tàngilàayi cyàkambàbo:

... *Kàdi bóbò bàakamwambila ne: Katwèna
bamanyè . . . ní Nyumà Mwîmpè ùtukù to.*

Ne yèyè wàkabàmbila ne: Mmu cinyi . . . (mpindyewu, nwènù baswè kwangata nkòngamyakù wa cyena-Ngelikà kaaba aka, yèyè ngwanùleeja’s, “Mmu *mushindù kaayi* munwàkabàtìijìibwà?”) . . . *Mmu cinyi . . . munwàkabàtìijìibwà* nwènù? *Ne bóbò bàakamwambila yèyè ne: Kùdì Yone uvwa apa ewu. Yone ngwàkatùbàtiiza.*

¹⁵³ Mpindyewu ndi muswèku kukonka: Bu ne wèwè uvwa mupetè dibàtiiza adi, uvwakù mwà kwikala musànkishìibwe naadi anyì? Muntu umwèumwè wàkabweja Yesù mu musùlù, ne kubàtiizayè Yesù Kilistò awu, muntu umwèumwè awu ngwàkabàtiiza bóbò bantu abu. Adi’s ndibàtiiza dîmpèku’s: kaciyi dimyaminangana, kaciyi dipongolwelangana dyà mâyi to, kàdi diinyijangana dyà mu Yàdènà wa kale wa bitocì awu mu mwaba wùm wèwèumwè wàkabàtìijìibwà Yesù awu. Anjì elàayi meeji ku bwalu abu.

¹⁵⁴ Pòlò wàkamba ne: “Nukàadikù bapetè Nyumà Mwîmpè kacya nwítabuujà anyì?” Bóbò . . . yèyè . . .

Bàakamba ne: “Katwèna bamanyè . . . ní kùtukù Nyumà Mwîmpè kampànda to.”

Yèyè kwamba ne: “Nwènù nwàkabàtìijìibwà bishi?”

Bóbò ne: “S’tudi babàtìijìibwe.”

“Nwàkabàtìijìibwà bishi?”

“Kùdì Yone!”

¹⁵⁵ Mpindyewu tàngilàayi cyàkambà Pòlò. Tàngilàayi apa:

*Ne yèyè wàkabàmbila ne: . . . nwàkabàtìijìibw- . . .
Kùdì Yone . . . Ne bóbò . . .*

Ne *dìbà adi Pòlò wàkamba ne: Cyà bushùwà Yone wàkabàtiiza...mu dibàtiiz-...dya kanyinganyinga, mwikàlè wàmbila...bantu, ...bìwwa bikèngela bwà kwitabuujabò ewu uvwa ulwa paanyimà pèndè, mbwena kwamba ne, Yesù Kilstò.*

156 Nwamònu's, Yone wàkabàtiiza ànu *bwà kanyinganyinga cyanàànà, kàdi dibàtiiza dya mu màyi mu Dìnà dya Yesù didi bwà dilekelediibwa dya mpèkaatù. Difuta dya cibawù kadivwa dyenjìibwe musangu awu to, mpèkaatù kayìvwa mwà kulekelediibwa to. Mpindyewu...Cìvwa ànu dyandamuna dya ku kondò kàà mwoyi, bu mùdi mu mikenji. Luukà 16.16, mmwambè ne: "Mikenji ne bapròfetà byàkadikù too ne ku Yone, kubangila apu Bukalenge mbùkaadi bùyiishiibwà." Mpindyewu tàngilàayi. Nènku...Tàngilàayi.*

Nènku Pòlò *wàkabambil-... (mpindyewu tàngilàayi)... Nukàadi nwènù bapetè... .*

157 Mvensà mwi5—mwi5:

Nènku *pàakumvwàbo cyòci eci, bàakabàtiijiibwa (cyàkàbidì) mu dìnà dya... Yesù Kilstò.*

158 Mmwòmò anyi? Nènku bantu aba, bantu bàà mu Byenzedi 2 aba, s' bàakabàtiijiibwa mu Dìnà dya Yesù. Beena Yudà bàakabàtiijiibwa mu Dìnà dya Yesù. Bàà Bisàmbà byà bendè bàakabàtiijiibwa mu Dìnà dya Yesù. Ne muntu yònsò mu Bible mujimà wàkabàtiijiibwa mu Dìnà dya Yesù.

159 Mpindyewu petàayaaku mwaba wùmwèpelè wùkaadiku mukwàbò muntu mubàtiijiibwe múngà mùshindù, kàdi mèmè nèngàalukilè buludì kaaba aka nnùleejè mwaba wùdi èkèleeziyà wa Kàtòlikè ùciitaba, ne wamba ne nwènù nudi nùcùtùmikila. Kàbidì mmwambè ne: "Nkufwànyine kwikala bàmwè beena Mishònyì basùngìdìibwe bwalu bàdi ne ndambù wa malongesha a Kàtòlikè, bu mùdi bàtismò mu dìnà dya 'Taàtù, Mwànà, ne Spiritù Munsantu'; ne èkèleeziyà munsantu wa Kàtòlikè ùdi ne bukenji bwà kushintulula dísù dikolè adi kucyùmusha ku Dìnà dya Yesù, kucitùma ku dìnà dya 'Taàtù, Mwànà, ne Spiritù Munsantu,' ne èkèleeziyà wa Mishònyì ùciitaba." Ewu yéyè kèna ùciitaba to, mèmè ndi nshàala ne Bible. Mèmè ndi ngiitabuujà Bible.

160 Wèwè udi wamba ne: "Mwanètù Branham, wèwè utu utùmina bantu dīyi bwà kubàtiijiibwàbò cyàkàbidì anyi?" Kakùyi mpatà to! Pòlò's mmucyènzè, kaaba aka.

161 Mpindyewu tàngilàayi, twàngatàayi Ngalàtiyà 1.8, bwà tujandulè cyàkambà Pòlò:

...nànsha twètù, anyi mwanjèlo mufume mu dyulu, munùyiishè mukwàbò èvànjeeliyò... èdiibwè mulawu.

162 Ki bwalu mbwòbù abu's: "Twètù anyi mwanjèlo." Nènku Pòlò, muntu umwèumwè awu, wàkatùmina bantu dīyi bwà

kubàtiiiibwabò cyàkàbìdì biinè bàvwà bapetè dibàtiiza dîmpè ditàmbe kule ne kule dyûdì wêwè mupetè adi's, mwanèetù wanyì; bwalu Yone Mubàtiiiiji ùvwa mwanààbò ne Yesù Sungasunga, wa mamwëndè mukwàbò; ùbàtiiza mwànà wa mamwëndè mukwàbò sungasunga mu musùlù wà Yadenè, pashiishe kukùdimukayè e kubàtiiza bayiidi bàà Yone abu. Kàdì Yesù kwambaYè ne: "Aci kacayàkukùmbana to!" anyì Pòlò's ngwàkaCyàmba, ne kubàtùminayè dîyì bwà kubàtiiiibwabò cyàkàbìdì mu Dìnà dyà Yesù Kilistò kumpàlà kwà kushiishabò kupeta Nyumà Mwîmpè; paanyimà pàà bamanè kwela mbilà ne batùmbishe Nzambì ne bapicìle mu cikondo cyà dicyònkomoka, bapetè ditàbuluja dinène—dinène, ne bajaadikilàngàne ku Bible (ku tèlòlji wabò) ne Yesù ùvwa Kilistò. Mbanganyì bàdì bamanyè ne aci m'Mufundu? Nshapità wa 18. Mmùdìbì cyà bushùwà. Ki bwalu mbwòbù abu's. Pa nànkù kakwèna mpatà Apu to.

¹⁶³ Mpindyewu ngànji nnùpèeshèku kaacyena-bwalu kakesè. Mpindyewu, yèyè kàvwakù mupàtùke mu dîyì ditùma adi to, kàdì mu Luukà...Maataàyi, nshapità wa 16. Yesù, pàakatùulukàbo ku mukunà, Wákamba ne: "Bantu bàdì bàmba ne Ndi Nganyì Mémè Mwànà wa muntu?"

¹⁶⁴ "Bàmwè bàdì bàmba ne Udi 'Eliyà,' ne bakwàbò bàdì bàmba ne Udi 'bapropetà,' ne bakwàbò bàdì bàmba ne Udi '*cikampànda, cikansanga*.'"

¹⁶⁵ Yèyè ne: "Kàdì nwènù nudi nwamba ne Nganyì?"

¹⁶⁶ Peetèlò kwambayè ne: "Wèwè udi Kilistò awu, Mwànà wa Nzambì udi ne mwoyi."

¹⁶⁷ Tàngilàayi! "Udi mubènèshiiibe, Simonà Bàayoona (mwànà wa Yona), kî mmunyiinyi ne mashi bìdì bikubuulwile Eci to." Amen!

¹⁶⁸ Nwamònu's, bìdì bìkèngela Cìlwe ku dibuulula dya nyumà. Kacìvwakù munyiinyi ne mashi byàkambilà Abèlè ne ùvwa mupiiile (Kaayinà, bwà ne ùvwa mupiiile) to, kî mbyòbì byàkambilà Abèlè ne "Kaayinà ùvwa mupiiile" to. Kàdì cìvwa ndibuulula dìvwà Abèlè mupetè ne: "Cìvwa mmashi!" Netùbwelè mu lukonko alu mu tusunsa tokesè emu. Cìvwa mmashi, kacìvwa mbimuma to, bìdì bitùmùshishe mu budimi bwà Edènà. "Cìvwa mmashi," ne Abèlè, ku dibuulula dyà nyumà, bààkamubuulwila kùdì Nzambì ne cìvwa mmashi, nènku yèyè: "Ku diitabuuja," mùdì Ebèlù 11.1 wàmba, "wàkalàmbula Nzambì mulàmbù mwîmpè kutàmba wà Kaayinà. Nènku, Nzambì wàkiitaba mulàmbù wèndè awu." Ki bwalu mbwòbù abu's. Nwamònu's, wàkawùlambula ku diitabuuja, ku dibuulula.

¹⁶⁹ Mpindyewu tàngilàayi: "Kî mmunyiinyi ne mashi bìdì bikubuulwile eci to," (buludi too ne ku Mukalenge Yesù) "kàdì n'Taatù Wanyì udi mu Dyulu udi mukubuulwile Eci. Nènku pa lubwebwe elu (dibuuludiibwà dyà Yesù Kilistò)... Pa lubwebwe elu Mémè nèngiibakilèpu Èkèleeziyà Wanyì, ne biibi byà

ifernò kabyènakù mwà kuMutàmba bukolè to.” Ki cyàkambàYè ncyôci aci. Dibүүлul- . . . dyà nyumà. “Nènku Ndi ngamba ne wèwè udi Peetèlò, ne Mémè nènkupèèshè nsapì yà Bukalenge. Ne cyònsò. . . Bwalu wèwè udi mupetè kajila kàà nyumà kunzulula pankaci pàà pànwapa ne Dyulu. Munyìinyi ne mashi: kacya kùtukù muyè mu sèminèrè kampànda to, kacya kùtukù mukalongè kàlaasà to, kacya kùtukù mulongè dilongesha kampànda dyà—dyà—dyà tèolòjì to. Kàdi utu mweyèmène Nzambi, ne Nzambi ngudi mukubuulwileCi, ne kakùyì mpatà to yìdi ànu m’Mifùndu mitòoke tòò yìdi yìCitwàngaja cyònsò. Ndi ngamba ne wèwè udi Peetèlò, ncyà bushùwà, ne Mémè nènkupèèshè nsapì ayi; ne cyùdi wèwè uswika pa buloba, Mémè nènciswikè mu Dyulu; cyùdi wèwè usùulula pa buloba, Mémè nèncisùululè mu Dyulu.”

¹⁷⁰ Ne Peetèlò ngwákadi mwakudi mu Ditùkù dyà Mpenta, pàvwàbo bònsò ne bwòwà bwà kwakula apu, yèyè wàkaakula ne dýi dikolè ne wákamba ne: “Nwènu beena Yudààya ne nwènu bàdi basòbèle mu Yelusàlèma, eci cimanyiiwbè kunùdi ne tèelejàayi Mèyi àanyi. Bantu aba kí mbakwàcike maalà munùdi nudicinkila amu to, pa kumòna ne tucidi ànu pa díbà citèemà wa ditùkù, kàdi eci ncyàkambàbo kùdi mupròfetà Yowèlà aci. ‘Nebyèzekè mu matùkù a ndekeelu,’ mùdi Nzambi wàmba, ‘Nèngiìcikijè Nyumà Wanyì pa mubidi wònsò. Bàna bèènu balela bàà balùme nè bàà bakàjì nèbàmbè bipròfetà. Ne pa basadidi Bàanyi balùme, basadidi bakàjì, Nèngiìcikijè Nyumà Wanyì. Ne Nèndeje bimanyinu muulu mu maulu ne panshi pa buloba, ne makunji a mwìshì ne mabungi. Nebyèzekè kumpalà kwà Ditùkù dinènè dìdi dikwàcisha bwòwà dyà Mukalenge kulwadì ne, ewu yònsò wasòka Dìna dyà Mukalenge awu neàsungidiibwè.” Ki bwalu mbwòbù abu’s. Kaa, ekèlekèle.

¹⁷¹ “Lekèlaayi nwwàmbilè mudilekèlèle bwà nkambwà Davìdi,” mwàkambàye, “mmufwè ne mujiikìibwe, ne lukitá lwèndè lùdi munkàci mwètù too ne ku ditùkù edi. Ki bwà cinyì, bu mùvwàye mupròfetà, wákamòna. . . wákadyànjlila kuMumòna ku dyàbalùme Dyèndè: ‘Ne mémè ncyàkunyungishiibwakù to. Kàbidi mubidi Wányì newikishè mu ditèkemena bwalu Yèyè kàakushiya musùuka Wányì mu ifernò to, anyì kàakwitaba bwà Wa Cijila Webè àmonè dibola nànsha.”

¹⁷² “Ne Davìdi mmufwè,” mwàkambàye, “ne mujiikìibwe, ne lukitá lwèndè lùdi munkàci mwètù mu ditùkù edi. Kàdi bu mùvwàye mupròfetà, yèyè wákadyànjlila kumòna dilwa dyà Mwakàne Awu, Udi Nzambi muvwijè Mukalenge ne Kilistò.” Kaa, ekèlekèle. Ki Mifùndù yènu nyòyi ayi’s. Ki cintu ncyôci aci’s. Ki cyôci aci.

¹⁷³ Mpindyewu tudi tusangana kaaba aka ne, díbà adi, mùshindù mujaalàme, ne mùshindù mulelèlè, ne mùshindù wùmwèpelè wùvwàku mulongolola. . . Nènku Peetèlò nguvwa ne nsapì ayi, ne mu ditùkù dyàkayiishàye adi, bàakamba. . .

Mpindyewu tàngilàayi, ki Èkèleeziyè wa kumpàla nyèyè ewu. Nwènù beena Kàtòlikè tèèlejàayi Eci. Nwènù ba-Campbellites tèèlejàayi Eci. Nwènù ba-Baptistes ne ba-Méthodistes tèèlejàayi Eci. Ne nwènù beena Mpenta tèèlejàayi Eci. Beena Église de Dieu, ba-Nazaréens, ba-Pèlerins de la Sainteté, tèèlejàayi Eci.

¹⁷⁴ Peetèlò nguvwa ne nsapì ayi, ne yèyè nguvwa ne bukòòkeshi, bwà cyanàànà Yesù ùvwa mushimè. Kàdi pààbi kabyènakù mwà kwenzeka bwà Yèyè kushima nànsha, “bintu bibidì bidì kabiyi bishintuludiibwa, kabyèna mwà kwenzekakù to bwà Nzambì àshimè.” Yèyè nguvwa ne nsapì ayi. Yesù nguvwa mumupèeshe nsapì ayi. PàakabiikàYe ku lufù mu—mu ditùkù diisátù mùshindù awu, Yèyè ùvwa ne nsapì yà lufù, ne yà ifernò, kàdi kàvwa ne nsapì yà Bukalenge nànsha. Peetèlò nguvwa naayi! Ncyà bushùwà menemene.

¹⁷⁵ Kàdi mpindyewu tàngilà, Peetèlò, wèwè ngudi ne nsapì ayi milebeleja ku luseke lwèbè, ne ngwèwè awu munkacì mwà kuyiisha. Lukonko lùdi lùlwa, bakùdimùne mucimà bàà kumpàlà bàà èkèleeziya mupyamùpyà abu. Èkèleeziyà wa beena Kilistò wa ku cibangidilu awu. Mpindyewu wèwè mwena Kàtòlikè, mpindyewu wèwè Baptiste, Méthodiste, Presbytérien, udi pa dilongesha dyà Èkèleeziyà Mupyamùpyà awu adi anyi? Jandùlabi tǔng ní udipù.

...Balùmyànà ne bânà bèètù, citùdìku twètù mwà kwenza ncinyi?

...Peetèlò wàkajuuka e kwambayè...
Nyingàlalaayi, ...muntu ne muntu wa kunùdi...
 (dimukà, wèwè mulùmyànà; mùshindù wùdi wela nsapì ayi pànwapa awu, s'ki wàyèlà Kilistò mu Dyulu) ...*Nyingàlalaayi*, muntu ne muntu wa kunùdi, ne bàtijiibwàyi *mu dìnà dyà Yesù Kilistò...* (ki munùdi nubwela mu Eci nànkù) ...*bwà dilekelediibwa dyà mpèkaatù yènù, nènku nwènù nenùpetè kupà kwà Nyumà Mwimpè.*

¹⁷⁶ Ki nsapì ayi kwenzayi ne “cyak” pànwapa, ne yòyi kwenza “cyak” Mwàmwa. Ki bwà cinyi byàkakèngela bwà bayiidi bàà Yone kulwabò ne kubàtijiiludiibwabò, cyàkàbìdì, mu Dìnà dyà Yesù Kilistò (kumpàlà kwà kumònabò mwà kubwela mu Dyulu), kupetabò Nyumà Mwimpè. Yèyè wàkashààla mukwàte ku Dìyì Dyèndè. Pa nànkù mpindyewu kacýèna cinùpèesha cibwejàkàjì to, mmwómò anyi? Nwamònu anyi? Ncyà bushùwà ne, Maatàayi 28.19 yivwa mmyànzu, kacivwa Dìnà to.

¹⁷⁷ Èyo, tucidi ne dībà bǔngì kaayi? Tudikù mwà kwikala ne tukwàbò tusunsa dikùmi ne tùtaanu bwà kwandamunakù lùkàsàlùkàsà ku ndambù mukwàbò wa nkonko anyi? Tudi mwà kwikala naatù anyi? Èyo, netùlwijakajè ne lùkàsà lwònsò. Ndi naayi yìbìdì kwìnshì eku, yìmvwà njinga kwangata lùkàsàlùkàsà, yivwà yìpetanganà ne elu nùnkù, mèmè ne

mùshindù. Pashiishe ndi mwà kwangata mikwàbò yà ku yôyi ayi mu dyàlumingu mu dindà.

**57. Kaayinà ùvwa mwánà wa nyòka anyi? (Elu ndwà lwimpè.)
Pìikalàbi nàнку, bwà cinyi Evà kààkiimita difù ànu too ne
paanyimà pàà Adàmà mumanè kumumanya?**

Lùmwèlùmwè alu . . . Lukonko lùdi lùlondà lùdi mùshindù wùm wèwùm wè awu:

**58. Kùvwa nku mucì wètù wà—wà cyà bushùwà ewu kwàkadyà
Evà cimuma anyi? Yéyè's wàkamòna ne cìvwa cìmpè cyà
kudya.**

¹⁷⁸ Èyo, mwanèètù wa balùme, mwanèètù wa bakàjì, nànsha ní ùvwa nganyi, twánjìbi kwalukila mu Genèsè bwà tùjandulè cintu kampànda kaaba aka. Tùye mu Genèsè 3.8, pawikalà muswè. Èyo, ne tèèlejàaku ne ntèmà yònsò mpindyewu.

¹⁷⁹ Mpindyewu nêngààlujululè bwalu abu. Byònsò bìvwa bikezùke ne byà cijila, kakùvwakù mpèkaatù anyi dikooyika nànsha. Mpindyewu nêngàngatè . . . lwèbè . . . dyàmbedi lukonko lwà kumpalà elu. Muci mu nsòmbelu . . . munkaci mwà budimi, munkaci mwà mucì. *Muci* awu wùvwa “mmukàjì.” Mpindyewu nènnùjaadikilèci ku Mifùndu bu nwènu ànu mwà kwikala ne lutùlù bwà ndambù wa tusunsa.

¹⁸⁰ Netwánjì dyàmbedi kumòna yéyè ní ùvwa . . . ní wàkiimita difù kumpalà kwà kumanyanganayè ne Adàmà anyi to, anyi kumpalà kwà . . . Tèèlejàayi:

Ki kuumvwabò dîyi dyà MUKALENGE Nzambì wènda wèndakana mu budimi amu, ne mu citaleela cyà dituku, ki Adàmà ne mukàjèndè kusokomabò kule ne bwikadi bwà MUKALENGE Nzambì munkaci mwà micì yà mu budimi.

Nènku MUKALENGE . . . wàkabùikila Adàmà, ne wàkamba . . . Udi penyì?

Ki yéyè kwamba ne: Ngùm vù dîyi dyèbè mu budimi, ne mèmè kuumvwa bwòwà, bwalu mvwa butakà; . . . (mpindyewu, kàvwa mumanè aci ditùkù divwà didyànjlè to; cintu kampànda cìvwa cyenzèke, cintu kampànda cìvwa cimubuulwile ne yéyè ùvwa butakà) nènku mèmè kusokoma.

Ki yéyè kwamba ne: Wàkwambidì ne udi butakà nganyi? Udi mudyè ku mucì, . . . anyi?

¹⁸¹ Kwikala mudyè ku mucì awu ki kwàkamufikisha ku dimanya ne ùvwa butakà anyi? Múnkaadi misangu yàbúngì mwambàmbe, (eci kí mbilèlè ngeela to, ncyèna ncyàmbe bwà kwela bilèlè to) “Kàdi pìikalà kudya kwà bimuma byà pommes nk wàkafikishà bakàjì ku dimanya ne bàdi butakà, s’mbìmpè túbàbànyinè cyàkàbìdì bimuma byà pommes.” Nwamònu anyi? Kacìvwa mbutakà to. Kacìvwa mmucì, kí ncimuma cyà pomme

cyàkadyàbo to, cìvwa ndisangila dyà mulùme ne mukàji. Tàngilàayi:

. . . Udi mudyè ku mucì, kùmvwà mukutùmìne díyì ne kabìvwa bikèngela bwà wèwè kudyà anyì?

Ki mulùme kwambayè ne: Mukàji ùdi mumpèèshe, bwà kwikalayè naanyi awu, yèyè ngudi mumpèèshe . . . mucì, ne mèmè kudyà.

Ki MUKALENGE . . . kwambìlayè mukàji ne: Eci cyùdi mwenzè eci ncinyì? Ki mukàji kwambayè ne: Nyòka ngudi mungambishe, . . . (huh?) . . . Nyòka ngudi mungambishe, ne mèmè kudyà. (ntàntà mule kumpalà kwà kwimitayè, nwamònu's, difù dyà Adàmà)

¹⁸² Adàmà kumanyanganayè nendè, ki kwimitayè difù ne kulelayè—ne kulelayè Abèlè.

¹⁸³ Kàdi ndi muswè nnùkonkèku, ànu ku mmwènenù wetù wa cyà bushùwà ewu. Mpindyewu bwà kunùjaadikila ne mukàji nguvwa mucì, mukàji yònsò ewu mmucì wà bimuma. Mbanganyi bàdi bamanyi nankù? Wèwè kwèna cimuma cyà mamwèbè anyì? Cyà bushùwà, ki cyùdi. “Ne munkaci mwà mamuma, anyì munkaci mwà mucì, cimuma cìdiye kàyì ùlenga aci.”

¹⁸⁴ Bu nwènu mwà kumòna, Yesù kàvwa Mucì wà Mwoyi anyì? Yèyè kàakalayakù mu Maatàayi Munsantu, anyì, Yone Munsantu, nshapità mwi6 ne: “Mèmè ndi Dyàmpà dyà Mwoyi didi difùme kùdi Nzambi mu Dyulu” anyì?

¹⁸⁵ Muntu yèyè mudyè ku mukàji. . . Kàdi tàngilàayi, ku dilediibwa dyà . . . kùdi mukàji, twètù bònsò tudi tufwà; bwalu tudi ku bukòokeshi bwà lufù (mmwòmò anyì?) ku dilediibwa dyà kùdi mukàji. Ku dilediibwa dyà kùdi mulùme, twètù bònsò tudi ne mwoyi kashidi. Mukàji mmucì wà lufù, mulùme mmucì wà mwoyi; bwalu mukàji kèna nànsha mene ne mwoyi munda mwèndè to. Ncyà bushùwà menemene. Ci—civuba cyà mwoyi cidi cipàtukila munda mwà mulùme, menemene's. Cibwela munda mwà mukàji, ne mukàji kèna cingà cintu to ànu cyamù cyà ditooyishila; ne mwànà kèna mutwàngàne nendè to, anu ku mùfù. Katobà kàà mashi a maamù nànsha kakesè kakèèna mu mwànà awu to; mulediibwe mu mashi a maamù, kàdi katobà nànsha kakesè kakèèna mu mwànà awu to. Ndà ùmonè. . . anyì ùbalè mukàndà wà ngàngàbukà, anyì ùkonkè ngàngàbukà webè awu, neùmònè. Kaènamù to, to, mukalenge, katobà kààwù nànsha kakesè. Yèyè ùdi ànu díyì, kwàjikì. Ne mwoyi wùdi wùfùmina kùdi mulùme.

¹⁸⁶ Aci's ncifwànyikijilu cilenga bwà kuleeja ne ku mukàji, ku dilediibwa dyà mu bufùki, bikèngela bwà twètù bònsò kufwà, bwalu tudi bafwè ànu kwìnè kwònsò aku; ne ànu ku Mulùme Kìlistò Yesù nkutùdi mwà kwikadila ne mwoyi. Nènku ki micì yìbìdi yìvwà mu budimi bwà Edènà nyòyì ayì. Kanwènaayikù mwà kucimòna anyì?

187 Nènku tàngilàayi! Nènku mu ditùkù adi kwàkatèkiibwa Mukèlùbà mulamè mucu ewu. Bwà ne nkwèpi kwàlwàbo kulabula ku Muci wà Mwoyi awu, bafwànyine bònsò kwikala ne mwoyi kashidi. Mbanganyi bàdiku bamanyè nànkù? Bàvwa bònsò bafwànyine kwikala ne mwoyi kashidi. Ne musangu wà kumpàlà wùvwàbokù bafwànyine kukùlabula. . . Mwanjèlò wàkamba ne: “NetùWùlamè.” Ki kutèèkabò Bàkèlùbà muntwamu ne myelè yà mvità yà yilàkuka kapyà lwà ku esètè bwà kuWùlama. KuWàlujabò ku Esètè, ne bàlama Muci awu ne myelè yà mvità yà yilàkuka kapyà bwà kabàpeci mwà kubwela bwà kuWùpeta to (Muci ewu).

188 Kàdi pàakalwà Yesù, Wàkamba ne: “Mémè ndi Dyâmpà dyà Mwoyi, bwà muntu yèyè mudyè Dyâmpà edi kàyikù ùfwa to.” Ki Muci wènù ngwòwò awu.

189 Ki mukàji wenù nyéyè awu, ki disangila dyènù dyà mulùme ne mukàji didi ditwàla lufù ndyòdi adi. Ànu mùdibi bushùwà ne kùdi dijinga dyà disangila dyà mulùme ne mukàji, kùdi lufù lushiyakù. Ne ànu mùdibi bushùwà ne kùdi dilediibwa dyà mu nyumà, kùdi Mwoyi wa Cyendèlèlè mushiyàKù. Lufu lwàkalwila ku dilediibwa dyà kùdi mukàji, ne Mwoyi mmulwilè ku dilediibwa dyà kùdi Mulùme. Amen! Ki bwalu mbwòbù abu’s.

190 Mpindyewu twàlukilàayi kùdi Kaayinà. Nudikù bafwànyine kungambila kùvwà nyumà awu ne lwonji alu bifùmìne anyi? Piikalàbi ne Kaayinà. . . tàngilàayi, piikalàbi ne Kaayinà ùvwa mwànà wa Adàmà ùvwa mwànà wa Nzambì awu, bubì abu bwàkafùmìna penyi? Cintu cyà kumpàlà pàakalediibwàye, wàkakina, ùvwa mushipyanganyi, ùvwa ne mukàwù. Nènku mpindyewu angatàayi ngiikàdilù wa tatwèndè awu, mbangilu mwinè ku cibangidilu, Lusifèrè, ne yèyè ùkaavwa ku cibangidilu. . . wàkumvwila Mikàèlè mukàwu, cyàkabangà lutàtù mu kaabujimà aci. Mbanganyi bàdi bamanyè nànkù? Ne Kaayinà nguvwa ngiikàdilù wa tatwèndè, yèyè wàkumvwila mwanàabò mukàwu kàdi kumushebeyayè. Mukezùke awu. . . ngiikàdilù awu kàvwa mwà kupàtukila mu musùlù mukezùke awu to. Ùvwa mulwè. . . ùvwa ne cyà kupàtukila ànu mu musùlù munyangakaja ewu. Kàdi mònaayi Kaayinà, pènjiye anu ne wàlediibù.

191 Ne pashiishe Abèlè wàkalediibwa paanyimà pèndè, pashiishe kwimicilayè kùdi Adàmà, ne kumumanyayè—kumumanyayè ne yèyè kulela mwanèndè wa balùme Abèlè. Ne Abèlè ùvwa cifwànyikijilu cyà Kilistò; ne pàà—pàakashipiibwà Abèlè, Setè wàkangata kaaba kèndè; lufù, dijiikiibwa, ne dibìikà dyà ku lufù dyà Kilistò, mu cifwànyikijilu.

192 Kàdi, mpindyewu, Kaayinà ùvwa ùkuukwila; byenzedi byèndè byònsò byà musunya abi, ànu mùdi èkèleeziyà wa musunya leelù ewu emu: bàyaaya mu èkèleeziyà, bàdi bàkuukwila. Kaayinà ùvwa ùkuukwila; kàvwa mwena dyabùlù

to; kàvwa communiste to. Kaayinà ùvwa mwena kwitabuuja; wàkaya kùdì Nzambi, wàkiibaka cyoshelu. Wàkenza cintu cyònsò cyà butèndeledi cyàkenzà Abèlè aci, kàdi kààkapeta dibuulula dyà nyumà dyà diswa dyà Nzambi to. Dìna dyà Mukalenge dibeneshiibwè's wè! Ki bwalu mbwòbù abu's. Nudi nuCimòna anyi? Kàvwa mupeté dibuulula dyà nyumà to, nènku ki lutàtù lùdi naalù èkèleeziyà leelù ewu ndwòlò alu. Ne Yesù wàkamba ne Yèyè neibakilè Èkèleeziyà Wendè pa dibuulula dyà nyumà adi. Nudi nuCyùmvwa anyi? Kaa, ekèlekèle, mèsù enu's àdi mwà kutàbala mpindyewu. Nwamònu's, dibuulula dyà nyumà.

¹⁹³ Kaayinà kulwayè: kwibakayè cyoshelu, kukuukwilayè, kulwayè ne mulàmbù, kutwàyè binù, kutùmbishayè Nzambi, kukuukwilayè Nzambi, kwenzayè byònsò byà butèndeledi byàkenzà Abèlè abi. Kàdi Nzambi wàkamubènga mwoshè ne munu mwíkù bwalu kààkapeta dibuulula dyà nyumà to!

¹⁹⁴ Londèshaayi njila umwèumwè wa Kaayinà awu: mmuyè buludì too ne ku bwàtù abu, muumùkile ku bwàtù mukabwelè buludì mu Izalèèlà, muumùkile ku Izalèèlà muyè kabwela buludì mu Yesù, ne muumùkile ku Yesù too ne ku ditùkù edi; ne mònaayi ní èkèleeziyà wa musunya, wa maalù bu mudiwù mafùndiibwe, mukàyàbàlè ne muumàkàne, wa mamanya a mu tulaasà awu, ndi nswà kwamba bantu bàdi ne Mifùndu, bàdi bamanyè dilongesha dyònsò ne maateòlòjì, bàdi mwà kubyùmvwija's, balùmyànà wa yààyà, ànu mùshindù *awu*, kàdi kabàyi ne dibuulula dyà nyumà to! [Mwanèètù Branham ùdi ùtuuta cishòndò—Muf.] Ncyà bushùwà. Aci's ndilongesha dyà Kaayinà.

¹⁹⁵ Bible mmwambè ne: “Dyàkabi dyàbo! bwalu bààkalonda dilongesha dyà Kaayinà, bànyeemena mu bilèmà byà Baalàmà, ne bààkabùtukilà mu ditomboka dyà Koolà.” Mukàndà wùmwèwùmwè awu, Yudà, wàkamba ne: “Bàvwa badyànjila kulongolwela dipiilla edi.” Cyà bushùwà, ki cìvwàbo balongolwela. Nwamònu anyi? Baalàmà ùvwa nganyi? Ùvwa mwèpiskòpò. Ùvwa kumutù kwà èkèleeziyà mujimà. Wàkamwènèka mwaba awu mwikàle ànu mwitabi wa maalù mùvwàwu mafùndiibwe amu. Kulàmbulayè... Mutàngilaayi mùdìye mwimàne mwab'awu mu bantu bàà bamanyike bikolè, biimàne mwaba awu mu bantu bààbo bàà bamanyike bikolè abu. Ne bòbò kabàvwa beena dyabùlù to, bàvwa beena kwitabuuja.

¹⁹⁶ Cisàmbà cyà Moàbà aci—aci cìvwa cipàtùkile mu mwànà wa bakàjì wa Lotà. Lotà uvwa mulààle... Mwànà wa bakàjì wa Lotà wàkalààla ne tatwèndè awu, ne mwimite difù ne mulelè mwànà awu, ne mwànà awu ùvwa... ki kwàkajuukilà cisàmbà cyà Moàbà. Ne bòbò bàvwa dingumba dinène. Bantu banène, bàà tùyaayi tükamònè, ne bàvwa ne bânà bàà bamfùmù ne bamfùmù ne bantu bàà bamanyike bikolè. Bàvwa ne bèèpiskòpò ne baakàardinalè ne bikwàbò byònsò.

197 Kàdi ki musùmbà wà bansantu babùnguluki bàà mu malaba bàlwalwà aba, kasùmbù kakwàbò, Izàlèèlà; musùmbà mukesè wà kale wùvwà kawùyi wà màngumba, kawùyi wà bàsungulujangana bilondèshìle màngumba to. Ne bààkenza byònsò bìvwàku pa karta bìvwà ne cyà kwenjiibwa abi, bibi kàbìdì. Kàdi cìvwaku ncyà ne, bàvwa ne dibuulula dyà nyumà, ne Nzambì ùvwa naabò mu Dikunji dyà Kapyà.

198 Kaa, ndi—ndi mumanyè ne bàvwa ne bintu byà mu musunya, ne bantu baàkamba ne: “Musùmbà wà bantu bàà bènza bundù mùshindù awu, kabàyi ne cyà dyenza naabò to ànu kubiipata.” Kàdi bóbò bàvwa ne dibuulula dyà nyumà, ne bàvwa ne Lubwebwe lutuuta, bàvwa ne nyòka wa cyamù cyà kabanda, bàvwa ne Dikunji dyà Kapyà diikàle dyènda naabò. Àlèluuyàh! Ndi mumanye ne nudi—nudi nwela meeji ne ndi musalùke, kàdi ncyèna musalùke to. Ndi ndyùmvwa ànu bìmpè cyanààna.

199 Mònaayi! Pàndì ngeela meeji ne: “Nzambì umwèumwè awu, leelù ewu, udi ne mwoyi pàmwè neetù.” S’cìcidi anu dibuulula dyà nyuma dyà Dìyi. Ncyà bushùwà ne, ndyòdì. Ncyà bushùwà Cyendèlèèlè. Dìna dyà Mukalenge dibeneshiibwè! Èyòwà’s, mukalenge.

200 Ki yèyè uvwa mwimàne pààpa wàwa, mwitabi wa maalu mùdiwu mafùndìbwe amu; musùmbà wa ba-Baptistes ne ba-Presbytériens abu bàvwa biimàne pa kakùnà apu, ne bàvwa ne mwèpiskòpò wabò awu mwab’awu. Ne bàvwa ànu batèndeledi bàà menemene, ne ntèndeleelu wa mùshindù ànu wùm wèwùmwe awu, bàkuukwila Nzambì ànu wumwèwumwè awu. Bóbò ne: “Tàngilà musùmbà wà bùcyafù wàwa. Mòna’s, kabèèna nànsha ne dingumba to. Bàdi ànu musùmbà wà bansantu babùnguluki bàà mu malaba, benji bàà mutooyi’s, beela mbilà.”

201 Ncyà bushùwà anyi? Menemene’s, ki cìvwàbo. Wèwè kuyi wítabuuya ne bàvwa bansantu babùnguluki bàà mu malaba to, alùkila mu Genèsè ùjandulè pàakasabukàbo apu. Kàdi cishimà cyàkènjiiibwa, ki Miliyàmà kwangatayè dikasa kàdi kupweka ku mwelelu wa màyi, wènda wimba; ùja maja mu Nyumà, ne Mòsà wimba mu Nyumà. Aci kaciyi musùmbà wa batùdì tubiikila ne mbadìlekèlèlè. . . bansantu babùnguluki bàà mu malaba to, ncyèna mumanyè ne ncinyi to; bìmba bàtùpika, bàtùmbisha. Ne dìbà dyònsò matùnga àvwa mabàkine, kàdi Nzambì ùvwa naabò. Bàvwa ne dibuulula dyà nyumà, bàvwa bènda bàlonda Dikunji dyà Kapyà adi.

202 Ki Moàbà kwamba ne: “Mpindyewu, tàngilà kùneeku. Twètù netùbiikilè baakàrdinalè ne bèèpiskòpò bònsò, ne bakùlù bònsò, ne kubàfikisha kaaba aka. Netwènzè cintu kampànda pa bwalu abu, bwalu twètù tudi ditùngà dyà batèndeledi. Katwàkulekelakù dilàkà dyà mukana adi disambakanangana ne dingumba dyètù dilenga edi nànsha.”

203 Ki kuyabò naabò kuntwaku. Ki kwibakabò byoshelu dikùmi ne bibìdì; ki menemene cìvwà Izalèlèlà naabì, byoshelu dikùmi ne bibìdì. Bòbò kulàmbulapù milàmbù dikùmi ne yìbìdì, bimpàngà bya ngombe; ànu menemene bìvwà Izalèlèlà naabì abi, bìvwà Nzambi mulòmbe abi. Bòbò kutèèkapù mìkòòkò dikùmi ne yìbìdì, cileeja dilwa dyà Mukalenge Yesù Kilistò; mìkòòkò dikùmi ne yìbìdì mu myaba yònsò yìbìdì ayi.

204 Bantu bònsò bàà bamanyike bikolè abu, bèèpiskòpò ne bònsò, bimàne mu nyùngulukilu amu. Bààkateemesha mudilu pa mulàmbù awu. Bààkasambila, bààkeela byanza muulu kùdì Yèhowàh bàmba ne: “Yèhowàh, tùtèèlèjèku!” Cìvwàbò bàteeta kwenza aci ncinyi? Ki Baalàmà wabò wa kale awu kupàtukayè mùshindù ewu, ki Nyumà kumutùlukila Yè. Bushùwà’s (kàdì yèyè wa musunya).

205 Nyumà ùdì mwà kutùlukila mwena lubombo, mùdì Bible mwambè. Mpindyewu, nukàadi bangumvwè ndongesha cyòcì aci. “Mvùla ùtu ùlòkela bìmpè ne babì.” Kàdì bikèngela cìkumbanganè ne Dìyì, ki paùdì ucyùmwva.

206 Pashìishe pààkenzàye nàнку, ne . . . pàvwà Nyumà, nànsha nàнку, pambidì pèndè wàmba Bulelèlà, kuteetayè bwà kwela Izalèlèlà mulawu, kàdì kubènesshayè Izalèlèlà.

207 Mpindyewu, pìikalà cìdì Nzambi ùneemeka ng’èkèleeziyà mulenga, ne mwèpiskòpò mulenga, ne mpaasàtà mulenga wa dikèma, musùmbà wà bamanyi bàà mabàla, Yèyè’s ùvwà mwena dibànzà dyà kwitaba mulàmbù awu, bwalu bilondèshile maalu mùvwàwu yèyè ùvwà mu bulelèlà ànu mùvwà Izaleela mu bulelèlà amu; kadi yèyè kàvwà ne dibuulula dyà nyumà dyà Dìyì ne diswa dyà Nzambi to. Ki bwalu mbwòbù abu’s, ki dishìilangana leelù ewu ndyòdì adi.

208 Tàngilàayi Yesù. Bààkamba ne: “Muntu awu àyiilè kwàka. Tudi bamanyè ne Yèyè mmwena Sàmaalèyà. Mmupàle. Wèwè udi muswè kutùlongesha twètù anyi? Èè, wèwè’s udi mulela mu masandi. Kùvwà cingà cintu to ànu mwànà mulela mu masandi wetù ewu. Tatwèbè nganyi? Wamba pèèbè mùdì Nzambi tatwèbè, s’udi mupendi wa Nzambi’s! Mòna’s, udi ne cyà kutwàmbila anyi? Twètù’s tudi bayiishi, s’tudi bèèpiskòpò; kupicila ku baatatwèndè wa baatatwèndè wa baatatwèndè wa baatatwèndè wa baatatwèndè wa baatatwèndè wa baatatwèndè wa baatatwèndè wa baakatwètù bàvwà bayiishi ne bèèpiskòpò. Tudi balediibwe ne bakolèshìibwe mu èkèleeziyà. Tudi bapicile mu maasèminèrè a matàmbe kutùmbuka. Tudi bamanyè Dìyì ne Dìyì dyònsò ku dileeta ne ku dileeta. Uteeta pèèbè bwà kutùlongesha twètù? Mpenyi paùkaadiku wèwè ewu muyè mu kàlaasà? Edì dimanya udi mudìpetèle kwèpi?”

209 Yèyè ne: “Nudi bàà . . . tatwènú dyabùlù,” mwàkambà Yesù.

210 Bòbò kabàvwà ne bimanyinu ne maalu a kukèma munkaci mwàbò to. Kabàvwà ne dyondopa dyà kùdì Nzambi ne bikwàbò

munkaci mwàbò to. Kabàvwa ne mabènesha munkaci mwàbò to. Kàdi kakùyi mpatà to Yesù nguvwa dibuulula dyà nyumà dyà Mifùndu.

211 Bòbò ne: “Mòna’s, s’bààkafùnda *bikampànda-bikansanga*.”

212 Ki Yesù kwamba ne: “Èyowà, ne bààkafùnda kabidi ne.” Kàdi Nzambi ùvwa ùshìndika muntu Wendè ku bimanyinu byèndè.

213 Peetèlò wàkamba cintu cìmwècìmwè aci, mu Byenzedi 2, wàkamba ne: “Nwènu bantu bàà mu Izàlèlèlè; Yesù wa mu Nazàlèlètà, Muntu mwanyìshìlèbwe kùdi Nzambi munkaci mwènu, ku bimanyinu ne maalu a kukèma byàkenzelà Nzambi kùdiYe munkaci mwènu, ne binùdi nwènu bònsò bamanyè abi.” (ki bwalu mbwòbù abu’s) “Yèyè wàkafidiibwa kùdi... ku didyànjlil-... kùdi Nsangilu munène wa Tubàdi twà beena Yudà kuntu kwaka. Kàdi ku didyànjlila-kumanya dyà Nzambi, Nzambi ùdyànjlila kulongolola bwà Yèyè kufwà lufù elu. Nwènu kuMufidila ku byanza byà cikisu ne byà lwonji. Nwènu kupoopela Mfùmù wa Mwoyi pa nkùrusè, Udi Nzambi mubiishe ku lufù awu. Ne twètù tudi bantèmù bàà bwalu abu.”

214 Yoyòyò, muyiishe kaayipu’s wè! Kàyi...kàvwakù nànsha mumanyè mwà kufùnda dìnà dyèndè to, kàdi ùvwa mumanyè Nzambi. Bààkamba ne “bààkamanya ne yèyè ùvwakù ne Yesù.” Cyà bushùwà, ndibuulula dyà nyumà. Kaa, ekelekèle. Mpindyewu, ki bwalu mbwòbù abu’s.

215 Kaayinà ùvwa ànu mu njila awu menemene, èkèleeziyà wa musunya awu ùdi mu njila umwèumwè awu leelù ewu. Èkèleeziyà wa Nyumà ùcidi ànu ne Dikunji dyà Kapyà adi, ùcidi ànu ne bimanyinu, ne maalu a kukèma, ùcidi ànu ne Kilistò umwèumwè awu; cidi cishindikà kuumukila ànu ku mwànà wa mukòòkò ùvwa upùnga ne lufù awu, ne mu budimi bwà Edènà, too ne ku Dilwa dyà cyàkàbìdì dyà Mwànà wa mukòòkò. Kakùyi mpatà to, umwèumwè awu makeèlèlè, leelù, too ne kashidi.

216 Ne ndelàngànyì yà Kaayinà ayi, batèndeledi ne bàà kapelu ne bamanyi bàà mabàla, ànu byàmwomùmwè; ànu byàmwomùmwè, ditùkù dyònsò ànu byàmwomùmwè. Badyudi ne bakèngesheshanganyi, mùvwa Kaayinà mwikàle kùdi Abèlè amu, ki mùdìbo leelù ewu, ne ki mùtùbo ne ki mwikalàbo misangu yònsò; bàà musunya, beena bupidyà. Ncyà bushùwà.

217 Mpindyewu Genèsè 3.8, ne ndi kàbìdì mufùnde 20 kaaba aka, ùmvwà ntàngila kùkaadi katanci:

Ki Adàmà kubùikilayè...Ki Adàmà kubùikilayè mukàjèndè...Evà; bwalu yèyè ùvwa mamwèndè wa bònsò bàdi ne mwoyi. (nwamònu’s, pàvwa mpaanyimà pàà dyambisha edi dimanè kwenzeka)

218 Kaayinà ùvwa...“Mpindyewu, anjì indilà!” Wèwè udi wamba ne: “Mmunyi mùvwà nyòka, nyòka wetù ewu?”

219 Kàdi, mwanèètù, tàngilá kùneeku, Bible kèna wàmba ne ùvwa nnyòka to; Bible mmwambè ne: “Yèyè ùvwa mutàmbe budimù ku nyama yònsò yà mu mpàta.” Kàvwa nyama wa udikoka panshi nànsha, ùvwa nyama. Ùvwa...Ne mwaba awu...

220 Nènku ngǎnji nnùpèèshèku ànu eci bu kaacimanyinu kakesè munkaci mwètù, panwikalà baswè. Ki pàdi maalu a mamanya mapetèle cibwejàkàjì cikolè mpòpù apu. Cintu cyà citàmbe kwikala pabwípì ne muntu cidìbo mwà kupeta, nnsòkòmuntù. Mbanganyi bàdi bamanyè nàнку awu? Kàdi kùdi cintu kampànda pankaci apu. Kabèènakù mwà kwenza ne mifùbà yà nsòkòmuntù yìpetanganè ne mifùbà yà muntu to, pàaci's ki cintu cidi citàmbe kwikala pabwípì. Bàdi mwà kubànda nendè kuumukila ku civuba cyà ludimbà. Bàdi mwà kubànda nendè kuumukila ku civuba. Bàdi mwà kubànda nendè too ne ku nyama ne ku nyama yònsò ewu. Bàdi mwà kubànda nendè too ne ku ours. Angàtà ours ùmuuvulè cisèba, s'mmufwànàngàne ànu ne mukàjì wa mukesè ewu. Ànu cintu cìmwècimwè aci's. Angàtà nyimà wendè ne bikwàbò byònsò, ùbìmanyikè mwaba awu, ùseemejè mukàjì bu mùdì. . . wìmanyikè mukàjì mùshindù ewu. Cidi ànu mwomùmwe ne—ne—ne ours. Dikàsà didi dipàtuka mùshindù wà mwomùmwe, ne cyanza cidi cipàtuka mùshindù ewu, ànu mùdì muntu amu. Kàdi nsòkòmuntù ùdi yèyè ùseemena kutàmba aci. Mmwambè kwikala nàнку, kàdi bòbò kabèèna mwà kucipeta to.

221 Kaamùnsokòntù kakesè nkòkò aka, panwikalà baswè kukàmanya. Nudi bamanyè mwaba wùdiku anyi? Nkabàsokoka bòbò. Bàdi mwà kuumbula mifùbà yònsò yidìbo baswè kuumbula ayi. Bàdi mwà kuumbula...Basongi bàà mpìngù yà mabwe bàdi mwà kuumbula, ne maalu a mamanya, ne—ne mulondolodi wa maalu a bikondo ùdi mwà kupima bipiminu byà cikondo ne bipimu byà bòmbè bwà mushindà, kàdi kabaàdyàkwangulakù mpasu to. Bwalu awu ùvwa nnyòka uvwa mufwànàngàne ne muntu kutàmba ní ncinyi cikwàbò cyònsò civwàku pa buloba, kàdi Nzambi wàkamwela mulawu ne kumukùlula panshi bwà kwikalayè ùdikòkela mu difù, ne mmwalùkile buludi ku nyòka kàyì ne difwànangana ne muntu nànsha dikesè to. Mpindyewu anjì dikoonyààyì mu mitù, beena maalu a mamanya abu, ne bǎnji bàngatè cyòci aci bwà katanci kakesè.

222 Kàdi Bible ùdi wàmba patòòke ne: “Yèyè ùvwa ne budimù kutàmba nyama yònsò yà mu mpàta.” Aci ncyà bushùwà. Yèyè nguvwa dinungu didi disanganyibwà pankaci pàà muntu ne nsokò adi, kàdi Nzambi wàkamwela mulawu ne kumwaluja ku didikòkela mu difù bwà—bwà bwalu bwàkenzàye abu. Wàkambisha mukàjì ewu, ne mukàjì wàkalela mwanèndè wa balùme wa kumpàla uvwa Kaayinà awu, mwikàle ne ngiikàdilù wa disonsodiibwa sungasunga dyà nyòka, dyabulù, wàkabwela

mu nyòka, wàkenza cyôci aci awu.

²²³ Ki pashiishe kwimitayè ne kulelayè, kwimitayè cyàkàbìdì paanyimà pàà bamanè kumwambisha. Mpindyewu tàngilàayi, mukàjì wàkambisha, ùvwa ciibwìpi ne . . . Èè, yèyè wàkenza bibi. Kàdi yèyè, ànu byètù byà cyà bushùwà ebi, ùvwa mwanyishibwe pààkiimitayè difù dyà kùdì bayendè adi apu, bwalu aci cìvwa cìfwànyine kwikala misangu yàbùngì, yàbùngì pashiishe, ngondo yàbùngì ne matùkù àbùngì pashiishe; kakwèna mùshindù wà kumanya aci to, katwèna bamanyè to, kàdi cyà bushùwà yèyè wàkalela ku difù dyà kùdì Adàmà.

²²⁴ Ne muntu kampànda mmwelè mene ne lukonko, wàmba ne: “Èè, mwànà wa balùme . . . wàkamba mùvwàye mwà kwikala mwà . . . Pààkalediibwà Kaayinà, yèyè wàkamba ne ‘wàkapetela mwànà kùdì Mukalenge.’” Kakùyì mpatà to, cyà bushùwà, àbi mmùvwàbi ne cyà kwikala. S’cìvwa mmukenji wà bufùki. Mmùshindù awu menemene wùdì leelù ewu. Paùdì ulediibwa, Nzambì kèna ùtùùluka buludì ùkufùka nànsha. Wèwè udi mùtòlokù wà tatwèbè ne mamwèbè. Ne wèwè newikalè . . . nekwikalè . . . bânà bèèbè balela abu’s nebìikalè mìtòlokù yèbè wèwè. Cìdi ndivulangana dìbà dyònsò, dyènda diyà ànu nànkù, ànu mùdì micì yà mamiinu ne bikwàbò byà mùshindù awu abi; kàdi byalùkile ku cyà ku cibangidilu. Ndi ntèkemena ne aci cìdi cìcyùmvwija’s.

²²⁵ Tudi ne dìbà bùngì munyi? Katùcyèna naadi to. Tèèlejàayi lwà lwìmpè elu bwà yàlondà . . . yitwikalà mwà kwangata mu dyàlumingu: “Ku Nyumà umwe nkutùdì bònsò babàtìijibwe mu Mubidi wùmwè . . .” (Tudi baswè kumanya aci.) “. . . Kilistò.” Pa dìbà . . . Mpindyewu, ngeela meeji ne ndi nsangisha Mifundu ndambù, Mifundu mìmpè pa cyôci aci [Mwanèètù Branham ùdi wàndamuna ku elu nùnkù mu Citùpà II, lukonko lwà 60—Muf.].

²²⁶ Lwìmpè ndwòlò elu, ànu bu . . . Nudikù mwà kuntwàla bwà kasunsa kakwàbò kàmwè anyi túbìdì, bwà kwandamuna ku elu nùnkù anyi? Lùdì mwà kudyàndamuna lwòlò lwìnè.

59. Paùdì—paùdì wamba ne “beena lwonji kabààkwoshiibwa Cyendèlèlè” apu . . . (Èè, bwà mpindyewu kaayi ngàtàcishi Bantèmù bàà Yèhowàh, kí mmwòmò anyi?) . . . **Paùdì wamba ne beena lwonji kabààkwoshiibwa Cyendèlèlè apu, udi muswè kwamba mmu ifernò anyi mmu dijiba dyà kapyà? Mémè ndi mumanyè ne mbambè mu Bwàkabuulwibwà (Amu mmu nshapità wa 20) ne ifernò neèdiibwè mu dijiba dyà kapyà. Piikalàbo kabàyi bòoshiibwa Cyendèlèlè to, dìbà adi cìdì cìbènzekelà ncinyi?**

²²⁷ Ànu mùndì mfùma ku dyamba, mwanèètù wa balùme anyi wa bakàjì, nànsha byòbì ne ùvwa nganyi; bàdi bàbùtuka, kakùciyi kàbìdì cintu nànsha cimwè cyà ku bòbò to. Bàvwa ne ntwàdijilu, nènku ki bòbò bàfikì ku ndekeelu abu; kabàcyèna kabìdì cintu nànsha cimwè to. Mmuniyì mwikalà . . . nntàntà

bule kaayi wikalabò mwà kwoshika, aci cidi ànu cicolè bwà kucyamba. Kàdi, tàngilàayi, nekwikalè. . .

228 Bu nwènù ànu mwà kulama eci mu meeji, nwamònu's, ncipeepèlè ànu peepelee. Kùdi mùshindù ànu wùmwepele wà Mwoyi wà Cyendèlèlèlè, ngùdi wùfùminà kùdi Nzambi Yèyè mwinè awu. Ne Nzambi nkàayendè ngudi Mwoyi wà Cyendèlèlèlè. Nwènù ànu batàngile mu nkòngamyakù emu, kèbaayi mwakù wà mu cyena-Ngelikà *Zoe*. *Zoe* mbwena kwamba ne “Mwoyi wà Cyendèlèlèlè.” *Mwoyi wà Cyendèlèlèlè* n’“Nzambi.” Ne Yesù wàkamba ne: “Ndi mbàpèèsha Mwoyi wà Cyendèlèlèlè.” Kàdi nwènù batàngile mu nkòngamyakù emu, mbambè ne: “*Zoe*.” Kì Mwoyi wà Cyendèlèlèlè wùmwepele wùdiku. Kakwèna mwaba nànsha wùmwe mu Bible wùdiYekù wàmba ne nekwikalè ifernò wa Cyendèlèlèlè to, mmwambè ne nebòoshiibwè “kashidi ne kashidi.”

229 Mpindyewu, bwà kupeta mwakù *kashidi*, kèbaayi *aeon* awu. Nukààvwakù bamòne *apa*, mu Bible anyi? Mbanganyi bàkaadiku buumvwè bàmba ne: “Ne ma-acons ne ma-ae- . . .”? Mbanganyi bàdi bamanyè ne *aeon* n’“cipòòlò cyà cikondo”? Mòna's, cyà bushùwà, muntu kanà yònsò ewu mmumanyè ne *aeon* n’“cipòòlò cyà cikondo.”

230 “Ne bôbò nebòoshiibwè munda mwà ma-acons,” abi mbipòòlò byà cikondo. “Nebèèdiibwè mu dijibwa dyà kapyà, ne nebòoshiibwè munda mwà ma-acons.” *Ma-acons* mbwena kwamba ne “bipòòlò byà cikondo.” Bàdi mwà kwoshika munda mwà bidimu mìlìyò lukàmà byà dinyooka kàdi, ndekeelu wa byònsò, bàdi ne cyà kufika ku ndekeelu; bwà kubùtukabò, kashidi. Nwamònu's, bwalu cyònsò cidi kaciyi cipwàngàne cidi dinyangakajjibwa dyà Cipwàngàne; nènku cìvwa ne ntwàdijilu, pa nànkù cidi ne cyà kwikala ne ndekeelu.

231 Kàdi twètù bàdi biitàbùùje Mukalenge Yesù Kilistò tudi ne *Zoe*, “Mwoyi Sungasunga wà Nzambi” munda mwètù, nènku tudi ne Mwoyi wà Cyendèlèlèlè. Kì nnè tudi ne mwoyi bwà kashidi ne kashidi nànsha, ngènzàmpèkààtù ngudi ne mwoyi bwà kashidi ne kashidi, kàdi twètù tudi ne “Mwoyi wà Cyendèlèlèlè.”

232 Mwanèètù Cox, àbìdi aa, ùvwa musòmbe mu kajila kàà kumbèlù kwànyì kumpàlà kwà twètù kwela. . . paanyimà pàà twètù bamanè kwelamù nsàkàlàbwà, ki kwangulayè kaacishààdilè cikesè, kafùbà kàà kale, kwambayè ne: “Mwanèètù Branham, kàkaadi kàà ntàntà bule kaayi?”

233 “Kaa,” mùngàmbì, “bilondèshìle dilondolola dyà maalu a bikondo, wèwè's udi mufwànyine kwamba ne kàkaadi ne bidimu binunu dikùmi. Kaacinyama kakesè kàà mùshindù kampànda, kàà kale kàà mu mbù kàwàku ne mwoyi mu cikondo kampànda, kanyama kakesè kàà mu mbù, kafwànyine kwikala kashàale ne mwoyi mu bikondo bikaadi bipite byàbya.”

234 Yèyè ne: “Anji elàbi meeji mùdi mwoyi wà muntu mwîpi pa kuwufwànyikija ne awu mwoyi.”

235 Mèmè ne: “Kaa, kàdi, mwanèètù, cintu aci cìdi ne ndekeelu, kàdi Mwoyi wutùdi twètù naawù mu Kilistò kawènakù ne ndekeelu to. Aci cìdi mwà kulààla *kashidi* yìbidì anyì yìsàtù, kàdi kacýàkwikalakù ne Mwoyi wà Cyendèlèlè to, bwalu Mwoyi wà Cyendèlèlè wùdi wùfùmina ànu kùdi Nzambì nkààyèndè.”

236 Wà Cyendèlèlè: “Ewu udi umvwa Méyi Àanyi ne witabuuja Yèyè udi muNtùme, ùdi ne Mwoyi wà Cyendèlèlè ne KÁÁDYÁkupìcilakù ku cilumbulwidi to kàdi wàmanyi kuumuka ku lufù wàyi ku Mwoyi.” Ki bwalu mbwòbù abu’s, wèwè udi upeta Mwoyi wà Cyendèlèlè pa kwikala mwena kwitabuuja. Mwena bupidyà ùdi ne mwoyi bwà kashidi. Wà Cyendèlèlè...mwena kwitabuuja ùdi ne Mwoyi wà Cyendèlèlè, ne kèna mwà kubùtuka to bwalu Wòwù awu ngwà Cyendèlèlè.

237 Kàdi mwena kwitabuuja, yèyè neàye...Mwena bupidyà neàpicilè mu maalu a pa buloba, neàpetè makènga, dyàkabi; bìdiye yèyè ùbìikila ne nkupìcila kwà mu cikondo cyà dicyònkomoka abi, “èyi’s wè, ndi mpicila mu cikondo cyà dicyònkomoka.” Bakàji, maalà, ne bikondo byà dicyònkomoka, ùdi wèla meeji ne neàtungunukè. Neàfwe, neàbwelè mu dijiba dyà kapyà ne soufre kàdi koosha, mùdi dyosha kacya dyàtungunuka kashidi ne kashidi, ne pàmwàpa munda mwà bidimu mìliyò lukàmà mwàkèngeshiibwà musùukà wèndè mu dijiba dyà kapyà ne soufre.

238 Ndi...Wèwè udi wamba ne: “Neciikalè ànu mùdi soufre wetù wa ciibidilu ewu anyi?” Ngeela meeji ne neikalè mubi misangu mùliyò kutàmba awu nànkù. Ngeela meeji ne kwèna mwà kuumumvwijila ku kapyà to, ku kapyà kèètù kàà cyà bushùwà aka. Kabingilà kàmwèpelè kàdibo bàfundile ne “ku kapyà,” mbwalu kapyà ki cintu cìdi citàmba kulunguja citùdiku naaci. Kakùyi mpatà to kòkò kàdi kàlunguja ne kàbùtula kantu ne kantu, ki cìdi kapyà kèenza. Èè, dìbà adi, nekiikalè mwòmù amu, kàdi newikalè ne musùukà wìkalà ne cyà kunyookiibwa ku mùshindù kampàndà wà . . .

239 Mpindyewu, bikèngela nùtangilè mwakù awu *kapyà*, bwalu Nyumà Mwîmpè mmwangàciibwe bu “Nyumà Mwîmpè ne kapyà”; mbwalu kapyà kàà Nyumà Mwîmpè kàdi kòosha mpèkaatù kàmubùtula, nwamònu’s, ne kàkezula.

240 Kàdi *aka* kapyà kòkò, kàdi kàfùmina mu ifernò, mbambè ne “dijiba dyà kapyà.” Ne nànsha ciikalè cinyi, ndinyooka dyà ne dikèngeshiibwa. Muntu mubanji awu wàkabàndisha mèsù, mwikalè ùsanganyiibwa mu ifernò, kwambayè ne: “Tùmakù Lazàrò ne tuumàyi ku minu, bwà kutùndaabakù pa mishiku, bwalu ndimi yà kapyà eyi yidi yìnkèngesha.” Kanwèdikù meeji ne kakwèna ifernò wa wòsha to, ne ifernò wetù wa cyà bushùwà

ewu to, ùdikù. Pìikalàku dyabùlù wa cyà bushùwà, ifernò wa cyà bushùwà ùdikù.

241 Kàdi, nudi numòna's, cyònsò cìdì cinyangakaja cìdì ne ndekeelu waci, bwalu ndekeelu wa byònsò cìdì ne cyà kwalukila ku bukezùke ne cijila byà Nzambì abi. Ne Nzambì ngwa Cyendèlèlè; ne twètù biikàle ne Mwoyi wà Cyendèlèlè, Nzambì ùdi munda mwètù, ne katwènakù mwà kufwà to ànu mùdì Nzambì kàyì mwà kufwà amu. Ki bwalu mbwòbù abu's.

242 Mpindyewu, mufùndù wùdi wùDyùmvwija nkààyaawù, nwamònu's, ne wùdi wùcìvwija cijaalàme. Mpindyewu, twànjààyibì kumòna, mvwa ne... Ncyèna mumanyè ní... Èyowà:

“Cìikalà—cìikalà mwà kubènzekela ncinyi?”

243 Bàdi bàbùtuka, kakùciyi kabìdì cintu nànsha cìmwè cyà ku bòbò to: musùukà wùdi wùya, nyumà ùdi ùya, mwoyi wùdi wùya, mubidi wùdi wùya, meeji àdi àya, civùlukilu cìdì ciya.

244 Nènku kakwàkwikala kabìdì nànsha meeji mene a bubì to, ànyì, a nànsha ne bùvwakù bwenzèke mwinè, mu Butùmbi. Ncyà bushùwà, byònsò nebiikàlè... Nudikù bafwànyine kudifwànyikijila ne, pànwapa mpafwànyine kwikala bantu kaaba aka mu citùpà eci...?

245 Bible kèna wàmباكù ne: “Nànsha mene meeji a beena lwonji neàbutukè” anyi? Meeji a byòbì abi mene neàbutukè.

246 Nèkwikalè muntu lwà *apa*, nèkwikalè Nzambì Munène wa Cijila Awu *apa*, ne mumanyè ne mwàmwa nàka mene mùdì ciinà ciikàle ne misùukà munkaci mwà kwoshika anyi? Mòna's, aci kì ncifwànyinekù kwikala Dyulu nànsha. Meeji miinè, civùlukilu ciinè, byònsò bìdì binyangakajìbwe abi, meeji mabì ònsò, byònsò abi nebibutukè, ne byònsò byà bibì bìdì mwómò abi. Ne twètù netwikalè ànu bukezùke pa bukezùke, biikàle ne *Zoe*, Mwoyi wà Nzambì awu; too ne ku Cyendèlèlè, ne bikondo bipita, bipita, bipita, bipita; kaWàdyàkujikakù to, newikalèku Cyendèlèlè!

247 “Bààkabwela mu dinyooka *dyà kashidi*, kàdi baakàne bààkabwela mu Mwoyi wà Cyendèlèlè.” Nwacyùmvù anyi? Dinyooka *dyà kashidi*, Mwoyi wà Cyendèlèlè, dishiilangana kaayi's wè!

248 Mpindyewu, nwamònu's, kacyèna... Mpindyewu, ndi mumanyè ne, bwènù nwènù, bankòngà bàànyì, ncyèna—ncyèna ne meeji a kuteeta kudìleeja bu cimanya-byònsò to. Mémè ngenza nànkù,...

249 Mpindyewu, ncidi ne nkonko mikwàbò mimpè yisàtù anyi yinaayi. Nènyàngàtè mu dyàlumingu mu dindà, bu Mukalenge mwà kwanyisha.

250 Mpindyewu, tàngilààyi. Nwamònu's, ebi bìdì bijuula nkonko. Mémè ndi muiyishi mukùlumpè. Ndi—ndi—ndi—ndi ne bidimu

makùmi àbìdì ne bisambòmbò mu mudimu wà bwambi. Ne ndi—ndi ne kusàkidila kwàbùngì bwà cyòci eci, bwà mündiku mwà kwamba cyòci eci, wanyì. . . Kacya ncitukù muteetè bwà kuteeta kuleeja nì ncinyì nì ncinyì mu nsòmbelu wanyì kaciyi cyanji kubuuludiibwa dyàmbedi to. Ne ndi ne kusàkidila kwàbùngì mùdì Mwanjèlò wa Mukalenge. . . Bwalu ncitukù ne kàlaasà kalonga, ne dikùmbanyina to. Kàdi Mwanjèlò ewu wàkatùùluka, ne ùdì dikwàcisha dyànyì ditùma kùdì Nzambi. Ne Kàtukù mwanji kungambila cintu nànsha cìmwè cidì kakùyì mpatà to kaciyi cinwàngàne ne cyòci aci kuumukila ku Genèsè too ne ku Bwàkabuulwibwà to, mu mùshindù wà ne. . . Mémè kufùnda lùkàsàlùkàsà pàakambàYè ne “Ne wèwè—ne wèwè newàngatè dipà dyà dyondopa dyà kùdì Nzambi.” Ki mémè kucifùnda ànu menemene mùshindù wàkacyàmbàYe awu.

²⁵¹ Nènku bidimu bitwè ku bisàtù paanyimà, mulongolodi wa ndongamu kukòkayè ntèmà yànyì—yànyì ku cyòci aci, wàmba ne: “Mwanèètù Branham, ukààvwakù mumòne cyòci aci anyì? Ncipwàngàne menemene mu mùshindù wà ne Yèyè wàkawkambila ne ‘ndipà kampànda.’”

²⁵² Nwamònu’s, kàakambakù ne “dipà adi” to. Ne dyònsò—dyònsò dyà mu Bible. . . dipà dyònsò ditu “dipà adi” pa kuumusha dyondopa dyà kùdì Nzambi, nènku dyòdi ditu “dipà kampànda.” Dìdì “mapà a dyondopa.” Udi mwà kwikala ne mìshindù yàbùngì yà mapà a dyondopa, mishindù mishìilèshìilàngàne. Kàdi, dikwàbò dyònsò “ndipà dyà”: dipà “dyà” cipròfetà, dipà “dyà” *cikampànda*. Kàdi dyondopa dyà kùdì Nzambi dyòdi dìdì ku bùngì ne: “mapà.” Kàdi kacya ncìvwakù mumòne aci to, Nyumà Mwímpè mmupwàngàne be. Kaa, Mukalenge àbeneshiibwè’s wè!

²⁵³ Nudikù nuumvwa ne Nyumà Mwímpè umwèumwè wàkafùnda Bible awu awu, mufùndiibwe kùdì bantu nkàmà, bashìilàngàne ntàntà wa bidimu nkàmà. . . kàdi nànsha umwe wa kùdìbo kàakaseesukakù ewu kùdì mukwèndè to, yònsò wa kùdìbo ùvwa mukùmbànàngàne; ne kacya umwe kàvwakù muumvwè maalu a kùdì mukwàbò to.

²⁵⁴ Nènku Pòlò wàkaya, ne ùvwa ùsanganyiiibwa mu Arabie, ne kàvwakù nànsha mukendàkàne ku Yelusàlèmà to munda mwà bidimu dikùmi ne binaayi, kàdi wàkaya ku Yelusàlèmà ne wàkaya. . . wàkuumuka ku. . . kàvwakù muyè ku Yelusàlèmà to. Kàdi mu Arabie amu, kudìtwayè mu kuyiisha, kàyikù nànsha mwànji kumòna Peetèlò ne bakwàbò abu to munda mwà bidimu dikùmi ne binaayi. Kàdi pàakatwilanganàbo, bàvwa bàyiisha cintu ànu cìmwècìmwè aci: dibàtiiza dyà mu màyi mu Dìnà dyà Yesù Kilistò, ne dyondopa dyà kùdì Nzambi, ne bukolè bwà Nzambi.

Kaa!

Ndi nsànkà be mûndì mwà kwamba ne ndi umwe wabò.

Umwe wabò, ndi umwe wabò,
Ndi nsànkà be mûndì mwà kwamba ne ndi umwe wabò; (Àlèluuyàh!)
Umwe wabò, ndi umwe wabò,
Ndi ànu nsànkà be mûndì mwà kwamba ne ndi umwe wabò.

Kùdi bantu pàmwè ne myaba yònsò,
Bàdi ne myoyi yònsò yilákuka kapyà,
Ne Kapyà kààkamatà ku Mpenta aka,
Kààkabàkezulà ne kubàvwija bakezùke aku;
Kaa, ki kulákukaKù mpindyewu mu mwoyi wànyì eku,
Kaa, butùmbi kùdì Dìná Dyèndè!
Ndi nsànkà be mûndì mwà kwamba ne ndi umwe wabò.

Bàvwa basangile mu cibambalu cyà kuulu,
Bònsò munkacì mwà kusambila mu Dìná Dyèndè,
Bààkabàtìijibwa ne Nyumà Mwîmpè,
Ne bukolè bwà mudimu bwàkalwa;
Mpindyewu cyàkabenzelàYe mu ditùkù adi aci
Neàkwenzèle wèwè cìmwècìmwè aci,
Ndi nsànkà be mûndì mwà kwamba ne ndi umwe wabò.

Ndi umwe wabò, ndi umwe wabò,
Ndi nsànkà be mûndì mwà kwamba ne ndi umwe wabò; (Àlèluuyàh!)
Umwe wabò, umwe wabò,
Ndi nsànkà be mûndì mwà kwamba ne ndi umwe wabò.

- ²⁵⁵ Tèèlejàayi, ndi ne kaamukenji kakesè bwènù nwènù:
Lwàku, mwanèètù wanyì, kèbanganà ne dibènesha edi
Dyàkezulà mwoyi wèbè ku mpèkaatù,
Dyàbangà kudidisha ngonga yà disànkà
Ne dyàlamà musùukà wèbè wùlákuka kapyà;
Kaa, ki kulákukadi mpindyewu mu mwoyi wànyì eku,
Kaa, butùmbi kùdì dìnà Dyèndè,
Ndi nsànkà be mûndì mwà kwamba ne ndi umwe wabò.

- ²⁵⁶ Kwènàku wèwè ne disànkà mùdì umwe wabò anyì? Ncinyì aci? N'Nyuma udi ubuulula awu. Ndibuulula dyà kùdì Nzambì dyà ne: "Pa lubwebwe elu." Bwànyì mèmè nànsha bu mwèposkòpò wa mutàmbidile . . .

257 Nsaserdòsè wa Kàtòlikè ùvwa musòmbe, àbìdì aa, mu nzùbù mwànyì. Ki yéyè ne: “Mukalenge Branham, ndi mulwè bwà kukwelakù lukonko.”

Mémè ne: “Èyo, mukalenge.”

258 Yéyè ne: “Ndi mwab’ewu ne mukànda wà kùdì mwèpiskòpò, mukufùndila wèwè.”

Mémè ne: “Èyo, mukalenge.”

259 Yéyè ne: “Mèyì aùdì wamba, udikù mwà kulama cianza cyèbè cyela muulu bwà kudìcipa ne dísù dikolè ne newàmbè bulelèlà anyi?”

260 Mémè ne: “Ncyàkucyènta nànsha.” Mémè ne: “Bible mmwambè ne: ‘Kudìcipikù to nànsha kakesè, ní nku maulu ní nku buloba (bwalu bùdì citèèkedi Cyèndè cyà makàsà). Èyowà yèbè yikalè to ne èyowà.’ Mwèpiskòkò yéyè muswè kuumvwa cìndi ne cyà kwamba aci, neàngiitàbile ku dîyì dyànyì bwà cyòcì aci. Yéyè kàyi muswè to, mémè ncyèna ndìcipakù to.”

261 Nsaserdòsè mukesè wa èkèleeziyà wa Mwoyi Munsantu ewu kuntweku, kwambayè ne: “Wèwè nguvwa mubàtìize Pauline Frazier mu matùkù a ngondo búngì *kampànda* anyi?”

262 Mémè ne: “Mmémè, mukalenge, mu Musùlù wà Ohio mwàmwa.”

263 Yéyè ne: “Uvwa mumubàtìize bishi?”

264 Mémè ne: “Mvwa mumubàtìize mu dimwinyija mwinshì mwà màyi mu Dìna dyà Mukalenge Yesù Kilistò.”

265 Kucifùndayè. Yéyè ne: “Udi mumanyè’s, ki mùvwà èkèleeziyà wa Kàtòlikè ùbàtiiza kale wàwà.”

Mémè ne: “Dìbà kaayi adi?”

Yéyè ne: “Mu cikondo cyà ku cibangidilu.”

Mémè ne: “Cikondo kaayi cyà ku cibangidilu?”

Yéyè ne: “Èè, ku cibangidilu’s.”

Mémè ne: “Cibangidilu kaayi?”

Yéyè ne: “Mu Bible.”

Mémè ne: “Udi uswa kwamba ku cibangidil- . . . mu—mu bayiidi anyi?”

Yéyè ne: “Bushùwà’s.”

Mémè ne: “Udi ubiikila beena Kàtòlikè, anyi, ba—ba . . . ? Udi wamba ne bayiidi bàvwa beena Kàtòlikè anyi?”

Yéyè ne: “Bushùwà’s, s’ki cìvwàbo.”

Mémè ne: “Pàànyì’s mvwa ngeela meeji ne èkèleeziyà wa Kàtòlikè kàtu ùshintuluka to?”

Yéyè ne: “Kàtu ùshintuluka to.”

266 Mémè ne: “Dìbà adi mbwà cinyi Peetèlò wàkamba ne: ‘Nyingàlalaayi, nùbatijjibwè mu Dìná dyà Yesù Kilistò?’ Kàdi nwènu nudi nwamba ne ùvwa . . . ne yèyè ùvwa paapà?”

267 “Èyowà’s.”

268 “Kàdi bwà cinyi nwènu nudi nubàtiiza mu dìnà dyà ‘Taatu, Mwàna ne Spiritu Munsantu?’ Pèndè yèyè ùvwa winyijangana, kàdi nwènu numyaminangana màyi. Mpindyewu cidi cyenzèke ncinganyi?”

269 Yèyè ne: “Kàdi, udi umòna’s,” yèyè ne, “èkèleeziyà wa Kàtòlikè ùdi ne bukòokeshi bwà kwenza cyònsò cidibo baswè kwenza aci.” Huh.

270 Mémè ne: “Kàdi wèwè kwamba mùdi bayiidi beena Kàtòlikè?”

271 Yèyè ne: “Èyowà’s.”

272 Mémè ne: “Mukalenge, mémè ndi ne Josèphe, ndi ne *Mukàndà wà Bafwile Dìtabuuja wà Fox*, ndi ne *Bikondo byà ku Cibangidilu* byà Pemberman, ndi ne *Baabùlòna Yìbìdì yà Hislop*, maalu-malonda a matàmbe kwikala a kale àdi pa buloba, ndeejàaku mwómò amu mwaba wùkaadiku èkèleeziyà wa Kàtòlikè mupèeshiibwe dīyì dituma anyi mubwelè mu bulongolodi kampànda . . . bidimu nkàmà yisambòmbò paanyimà pàà lufù lwà mùpostòlò wa ndekeelu.”

“Kaa,” mwàkambàye, “twètù tudi twitaabuuja cidi èkèleeziyà wàmba.”

Mémè ne: “Mémè ndi ngiitabuuja cidi Bible wàmba.” Nwamònu anyi?

“Mòna’s,” mwàkambàye, “Nzambi’s ùdi mu èkèleeziyà Wendè.”

273 Mémè ne: “Nzambi ùdi mu Dīyì Dyèndè.” Ki mémè ne: “Bu . . .” Yèyè ne . . . Mémè ne: “Bible kèna wàmba ne Nzambi ùdi mu èkèleeziyà Wendè to, kàdi Bible ùdi wàmba ne Nzambi ùdi mu Dīyì Dyèndè. ‘Ku cibangidilu kwàkadi Dīyì, ne Dīyì dyàkadi ne Nzambi, ne Dīyì dyàkadi Nzambi; ne dyàkasòmbela munkaci mwètù.’” Aci ncyà bushùwà. Mémè ne: “Nzambi ùdi mu Dīyì Dyèndè.”

274 Kupàtukayè e kuya kamba cyòci aci. Yèyè ne: “Èè, katwèna bafwànyine kukòkangana to,” yèyè ne, “bwalu wèwè nyawù witaabuuja Bible, mémè ndi ngiitabuuja èkèleeziyà.”

275 Mémè ne: “Mémè ndi ngiitabuuja ne Bible ùdi Dīyì disonsola dyà Nzambi ne mu Yèyè kamwèna dibèngangana dyà mèyi nànsha òmwèpelè to. Ne Yèyè ngudi Dīyì dyà Nzambi, mpàngù Yèndè yà Cyèndèlèlèlè bwà bikondo byònsò bicilwalwà. Yèyè mmwambè ne: ‘Maulu ne buloba nebijiminè kàdi Dīyì Dyànyì kadyàkujimina to.’” Aci ncyà bushùwà. Mémè ndi ngiitabuuja Dīyì.”

276 Kupàtukayè e kuya kùdi Màndàmù Frazier. Kwambayè ne: “Màndàmù Frazier, udikù mwà kwela cyàlà pa dibèji apa wanyisha bwà mwanèèbè wa bakàji kwikalayè cidimba cyà èkèleeziyà wa Kàtòlikè anyi?”

277 Awu ne: “Mbipicìibwe ne mèmè muyè nendè ku majambu.”

278 Yèyè ne: “Bundù bwèbè.” Yèyè ne: “S’bivwa bikèngelakù wèwè kwikala ne kusàkidila mùdi mwanèèbè wa bakàji ùpàtuka mu lukutukutu alu, ùbwela mu èkèleeziyà wa Kàtòlikè.”

279 Awu ne: “Ambàbi tũng bu ne mwanèèbè wèwè wa bakàji nguvwa ulwa mu wanyì èkèleeziyà, wèwè uvwa mufwànyine kwamba bìshi pa bwalu abu?”

280 “Kaa,” mwàkambàye, “aci’s ncishìlàngàne.”

281 Awu ne: “To, kí ncishìlàngàne to.” Wàkamanya ne ùvwa mwaba kampànda pààkashiyanganàye ne mukàji mukesè awu kuntwaku apu’s. Kumanyayè ne ùvwa muyè mwaba kampànda’s. Mukàji awu kwambayè ne: “Mpindyewu, ciibi cimwècimwè cyùdi mubwelèlè aci cidi bwàshi.”

282 Nwamònu’s, mùshindù’s ki wòwù awu. Kabàkudyatakàjiku ku makàsà to, kabyèna bikèngela bwà wèwè kùdyatakajiibwa ku makàsà to. Pìikalàbi ne Nzambì mmutwè ku cyèbè, nganyì udi mwà kukùpumbisha? Cyà bushùwà’s! Lutàtù lùdiku leelù ewu lùdi ne, wèwè udi ne mufùbà wà cipumpù pamutù pàà mufùbà wà mwongo. Twà ku cyà Nzambì ne ku cidi cijaalàme!

283 Nyumà Mwìmpè umwèumwè wàkatùùlukila bàpostòlò abu ne mu bikondo byà kale wàwa awu, ùcidi ànu mu Èkèleeziyà Wendè leelù ewu, bònso bàdi Nzambì muDibuulùle kùdìbo abu. “Kì ng’ewu udi muswè, anyì ewu udi unyeema to, kàdi n’Nzambì udi uleeja luse.” Nzambì, ku disungula Dyèndè, ngudi utwàla bantu ne ùbàtabaja mèsù. Wèwè kwèna mufwànyine kuCimònakù to, wèwè udi mpofo, ne kùyikù mufwànyine kumòna to pàdi Nzambì kàyi mukukàngùle cyumvwilu. Bible mmwambè ne wèwè udi mpofo, ne kwèna mwà kumòna to. Kabyèna bikèngela bwà wèwè kuteeta to. Ne dilonga dyònsò dyà tulaasà, ne dimanya ditwè dyà mu tulaasà ngwengwengwe dyùdi mufwànyine kupeta adi, udi utàmba ànu kwenda kushàala mpofo díbà dyònsò.

284 Mpindyewu, nwènù beena Église de Christ aba, nutu “nwakula pàdi Bible wàkula, ne nupùwa pàdiye ùpùwa,” kàdi nudi nwamba bìshi bwà bimwè byà Cyòci eci? S’nudi bapùwe pa Cyòci aci byà bibi be. Cyà bushùwà’s.

285 Nwamònu’s, bikèngela Bulelèlà bubuulula mu nyumà. Pashìshe Nzambì ùdi ùtùuluka ne ùDibuulula ne ùshìndika ne Cidi Bulelèlà. Amen! Nudi baMunangè anyi? Ne mèmè pàanyì. Amen.

286 Èyo, nwênù ba-Méthodistes bônso nudikù baswè kulabulangana ku byanza ne ba-Baptistes mpindyewu anyi? Nwênù ba-Presbytériens?

287 “Mpindyewu,” mùdì wamba, “Mwanèètù Branham, wèwè udi ukòsa bwobùmwè ne ba-Baptistes ne ba-Presbytériens badi kabàyi bàbàtiiz- . . . ?”

288 To, mukalenge, ncyèna ngenza nàнку to. Ndi mbàngata bu bânà bèètù. Kakùyi mpatà to! Bwànyì mèmè nànsha wèwè kùyi mene mubàtìijìibwe to, nànsha wèwè mubàtìijìibwe mu dìnà dyà “Rose wa Shalònà, Mbata wa mu Cibanda, ne Mùtootò wà mu Dìndà,” aci kacìvwakù cifwànyìne kwikala ne . . . aci’s ncìfwànyìne kwikala cìmpè ànu mùdì “Taatù, Mwànà, Nyumà Mwìmpè amu.” Bìdì ànu myànzù yisàtù cyanààna. Yèyè’s ùvwa Rose wa Shalònà. NcìvwàYe anyi? Mbata wa mu Cibanda, Mùtootò wà mu Dìndà, byònsò abi. Bushùwà, mbìvwàYe. Bìdì ànu byà mwomùmwe eci anyi eci. Kàdì bwalu bùdì nùнку: mùshìndù mujaalàme bilondèshìle Mifùndù ngwà mu Dìnà dyà Yesù Kilistò. Wèwè muswè mùshìndù wà bilondèshìle Mifùndù, ki wòwù awu menemene, Ki mùshìndù mujaalàme ngwòwù awu.

289 Mpindyewu, wèwè mubàtìijìibwe mu dìnà dyà “Taatù, Mwànà, ne Nyumà Mwìmpè,” udyùmvwa ne bìdì ànu bìmpè, amen. Cyòci dyandamuna dìmpè dyà kùdì Nzambì bwà kondò kàà mwoyi katòòke kùdì Nzambì, amen. Ndà ànu kumpàla, wamònu’s.

290 Kàdì bwànyì mèmè, bwà ku lwànyì luseke, byòbì bikèngela ùnkonkè ne: “Mwanèètù Branham, bìvwa bikèngela mbatìijìibwè cyàkàbìdì anyi?” Ndi mufwànyìne kwamba ne: “Èyowà,” bwà ku lwànyì luseke.

291 Mukàjì mukesè awu mmulwè kaaba aka ditùkù adi, wàmba ne: “Mukalenge mmumbìikile bwà mèmè kwikala muyiishi.” Mèmè ncìvwa mwitàbùùje aci to, ànu mùmvwà nciyi mwà kwitabuujà ne—ne yèyè ùvwa mwà kutùpika kusambuka ngondo. Ki yèyè . . .

292 Mèmè kwamba ne: “Èè, abi mbìmpè be, mwanèètù wa bakàjì.” Mèmè ne: “Utu musèdìibwe anyi?”

“Èyowà.”

“S’udi ne bânà bàbìdì’s?”

“Èyowà.”

Mèmè ne: “Ncinyì cìdì . . . ? Bàyeebè ùkaadi musùngìdìibwe anyi?”

“To”.

Mèmè ne: “Newènzè nendè cinyi?”

“Nèmmushiyè kumbèlu.”

293 Mèmè ne: “Aci’s ki cìshì cyà kwela ku ndòbo citàmbe bwìmpè cìkaadiku dyabùlù mupetè kacya. Wèwè nyawù udi mudyànjlile

kwikala mukàjì mulenga kwísù, kàdi udifinda apa upàtuka uya mu budimi bwà bwambi, s'newikalè cishì cyà kwela ku ndòbo cyà díbà dyònsò ne cintu cyà diludikila mikete bwà dyabùlù. Ne bàyeebè awu, kumbèlu, nsongàalùme wa citende, wèwè umushiya ne bânà bàbìdì abu; s'neàbangè kwenda ne mukwàbò mukàjì, ne bânà abu's nebìikalè ne múngà papa àbìdì àdì panshì aa." Mémè ne: "Cya kumpàla, Nzambi Yéyè mubiikile muntu mukajì, Yéyè's wábèngyanganyi ne Díyì Dyèndè." Mémè ne: "Mpindyewu, wèwè muswè kucyenza, bìdì ànu bìmpè." Mémè ne: "Mpindyewu, dijingulula, udi wamba ne Mukalenge mmukupèshe dijingulula. Udi muswè kuya, pa cibumbà cyà ku cyambilu, bwà kuditeeta anyi?"

294 Kwambayè ne: "Èyowà." Ne nwènu's nudi numòna cìdì cyenzèke aci.

295 Nwamònu's, ndisaluka. Bìdì bìkèngela cìfikè ku Díyì. Cyòcì kaciyi mu Díyì to, díbà adi kí ncilelèlà to. Masaluka èbè nànsha miikàle a bishi, kí ncilelèlà to. Amen! Aci cìdì cyùmvwika cìmpè. Amen!

296 Èyo:

Netwèndelè mu Bukènkè, Bukènkè bulenga be,
Bùlwa mwaba wùdì mamata a lumuma a luse
àbàlakana;

Kenkèshàku mu nyùngulukilu wetù mwònsò
muunyà ne butùku,
Yesù, Bukènkè bwà bàà pa buloba.

Nwènu bònsò bansantu bàà Bukènkè ambàayi
patòoke ne:

Yesù, Bukènkè bwà bàà pa buloba;
Dìbà adi ngonga yà mu Dyulu neyìdìlè,
Yesù, Bukènkè bwà bàà pa buloba.

Netwèndelè mu bukènkè, bukènkè bulenga be,
Bùlwa mwaba wùdì mamata a lumuma . . .

Kenkèshàku mu nyùngulukilu wetù mwònsò
muunyà ne butùku,
Yesù, Bukènkè bwà . . .

297 Mpindyewu ndi muswè bwà muntu ne muntu àkudimukèku ne àlabulanganè ku cyanza, nseke yinaayi, ne bantu bònsò mpindyewu, patùdì twimba cyòcì eci cyàkàbìdì apa:

Netwèndelè mu Bukènkè, Bukènkè bulenga be,
(Amen!)

Bùlwa mwaba wùdì mamata a lumuma a luse
àbàlakana;

Kenkèshàku mu nyùngulukilu wetù mwònsò
muunyà ne butùku,
Yesù, Bukènkè bwà . . .

298 Nudi banangè ba-Méthodistes anyi? Ambààyi ne: “Amen.” [Disangisha didi dyamba ne: “Amen.”—Muf.] Ba-Baptistes? Ba-Presbytériens? Beena Kàtòlikè? Beena . . . kaa, nudi babàrangè bônso anyi? Ambààyi ne “Amen.” [“Amen.”]

Netwèndelè mu Bukènkè, buleng- . . .

Biikàle nulabulangana ku byanza, patùdi tuya apu.

Kaa, bùlwa mwaba wùdi mamata a lumuma a luse àbàlakana;

Kenkèshàku mu nyùngulukilu wetù mwônso muunya ne butùku,

Yesù, Bukènkè bwà . . .

299 Kumpàlà kwà twètù kwimba musambu wètù wà ditangalajangana naawù awu . . . Mpindyewu, bidi mwà kwenzeka ne ngìikalè cyàkàbìdì apa mu dyàlumingu. Mpindyewu, paanyimà pàà aci ncyàkwalukilakù kàbìdì to ànu paanyimà pàà Noël. Nwamònu’s, walu nèngìikalè mwà kuya ku Michigan, kuumuka ku Michigan kuya ku Colorado, kuumuka ku Colorado kuya kwàka ku Idaho, kuumuka ku Idaho kubwela mu Californie, nènku netwàlukilè. Ne bidi mwà kwenzeka (ndi muswè bwà nwànsambidilaayikù) nèngìikalè mu Waterloo, mu Iowa, kubangila ku ngondo wa kumpàla mu matùkù makùmi àbìdì ne ànaayi too ne ku ngondo mwibìdì mu matùkù àbìdì. Nwamònu’s, cipalu cinènè cyà manàyi aci kuntwaku, ndi mfùma ku dipeta dibìikila kùkaadi katanci, nènku binkèngela kubangila ku mpindyewu too ne ku dyàlumingu bwà kusambila. Nwamònu’s, ku Waterloo aku, mu Iowa, kùdi pabwìpi mpindyewu aku.

300 Kàdi mpindyewu, vùlukààyi, tèelejààyi tudyòmbà twà mwanèètù atu pa dîbà citèemà, mu diisambòmbò mu dindà. Netùmubìikilè ne netùmumanyishè. Ne neciikadilè ku WLRP, ngimbilù wa tungimbà tùnaayi wa Neville pa dîbà citèema, mu diisambòmbò mu dinda. Netwìkalè . . . Mémè—mémè nciyi mupetè mùshindù wà kuyàngata to, Mwanèètù Neville neàjikijè nkonko ayi. Mmwómò anyi, Mwanèètù Neville, bwà mu dyàlumingu mu dindà? [Mwanèètù Neville ùdi ùtùdika mu tuseku wamba ne: “Dìyì ditùma dikolè!”—Muf.] Èè, tàngilà, wèwè mupetè lutàtù, mémè nènkutwè mpàndà. Yèyè neàtangilè. Èyo.


301 Èyo:

Angàtà Dìnà dyà Yesù wèndè naadi,
Wèwè mwànà wa tunyinganyinga ne dikènga;
Nedikupè disànkà ne busàmbi,
Kaa, ndà naaDì kwònsò kùyaayà.

Dìnà dyà mushinga, Éyì dyà bupòle be!
Ditèkemena dyà buloba ne disànkà dyà Dyulu;
Dìnà dyà mushinga, (Dìnà dyà mushinga!) Éyì
dyà bupòle be! (Dyà bupòle be!)

Ditèkemenà dyà buloba ne disànkà dyà Dyulu.

³⁰² Mpindyewu, wêwè muswè kumanya Baptiste udi witabuuja dyela dyà mbilà, ki mùshindù wà dyela dyà mbilà wúndi mêmè ngiitabuuja ngwôwù awu. Maamù mukùlakàji awu musòmbè ànu mwaba awu, ki Nyumà kulwa pambidi pèndè. Kubangayè kwela mbilà mikolè, kàyi mwà kukàdamana to, kwalukilayè cyànyimà ne kuupukilayè mwanèndè wa bakàji awu. Ki mùshindù wúndi mêmè muswè kucimòna ngwôwò awu. Amen. Aci's ncîmpè be, cyà cyena-kale, cyà mu ndòndò wa mwoyi. Kaa, ekèlekèle, munsantu wa kale—wa kale, mutwè mukèlè, mubobesha, mudìlongòlòle bwà kwalukila ku Butùmbi. Kacya ànu wìndila dibìikila, nudi numòna's, mwikàle ànu ùpicila mu cikondo cilenga cyà dikèma.

Èyo, Mwanèètù Neville mpindyewu, cyònsò cìdìye muswè kwenza aci. 

57-0925 Nkonko Nè Mandamuna Pa Ebèlù Cìtùpà I
Branham Tabernacle
Jeffersonville, Indiana États-Unis

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilamininyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org